

Գիրքը յուսադատճեհահանվել է  
A-PDF DjVu TO PDF DEMO: Purchase from www.A-PDF.com to remove the watermark

"Նամահայկական էլ. Գրադարան"

կայքի՝ [www.freebooks.do.am](http://www.freebooks.do.am)

կողմից եւ ներկայացվում է իր

այցելուների ուշադրությանը:

The book created by "PanArmenian E. Library"



Գիրքը կարող է

օգտագործվել միայն ընթերցանության համար...

For more info: [www.freebooks.do.am](http://www.freebooks.do.am)

Library

ՄԱՅՑՈՒՄ ԿԱՐՈՂ ԵՔ ՁՅՐ ԵՐԿՐՈՒՄՆԵՐ ԱՐԿԵՐԱԸ ԼՅՅԱՅԱՍ  
ԳՐԱԿԱՆՈՒԹՅԱՆ ՏԱՐԱԾՄԱՆ ԳՈՐԾՈՒՄ ԵՎ ԻՆՏԵՐՆԵՏ  
ԼՈՒՄԻՆԱՏԵԿՆԵՐՆԵՐԻ ԳՐԵՐ:

ՔՐՈՑՆԵ ԳՐԵՐԻ ՄՏԵՐՈՄԱՆ ՄԱՆԸՄԱՐԱՆԵՐԸ ԿԱՐՈՂ ԵՔ  
ԻՄՈՒՍԱՆ "ՇԱՄԱԼՅԱՅԱԿԱՆ ԷԼԵԿՏՐՈՆԻԿԵՆ ԳՐԱԿՈՐՄԱՆ" ԿՈՑՔԻՑ

[www.freebooks.am](http://www.freebooks.am)

ԵՆԴՐՈՒՄ ԵՎ ՈՐԳԱՆԻՄ ԵՔ ՄՏԵՐ ԿՈՑՔԻՑ  
ՑԱՆԿՈՒՄ ԵՎ ԶԱՇԽՈՒ ԸՆԹԵՐՍՈՒՆԹՅԱՆ:




ԳՐԵՐ ՄԻՔ՝ [freebooks@rambler.ru](mailto:freebooks@rambler.ru)

Նորա յո  
Ադալան



ԿԱՂՈՒՅՏ  
ԵՐԶՆԿԱ


# Նորայր Ադալյան



«ԱՄՈՒՏԱԿԱՆ ԳՐՈՂ» ՀՐԱՏԱՐԱԿԶՈՒԹՅՈՒՆ, ԵՐԵՎԱՆ - 1985


ԳՄԴ 8427  
Ա 190

Նվիրում եմ հորս՝  
բնիկ երգչկացի  
ՄԱՐՏԻՐՈՍ ԱԴԱԼՅԱՆԻ  
հիշատակին



Այս ամենը կարող է հեքիաթ թվալ, սակայն  
ամենաճշմարիտ մի պատմություն է, որ  
ինչքան պատմական է, այնքան էլ ժամա-  
նակակից:

«Հրաժեշտ երկրին»



## ԱՐՏՈՒՅՏ

**Ա**րևը վաղուց ծագել էր, և շրջակայքն այժմ ողողված էր լույսով ու ջերմությամբ:

Ամեն ինչ երևում էր այնքան պարզ, որ թվում էր կարելի է շոշափել, մինչև իսկ՝ կապուտակ լեռնաշղթայի կնճիռները, որոնցից մի քանիսը ծոմովելով հասնում էին ձյունների սահմանին:

Այդ առավոտ բնությունն ասես ոչինչ չէր ուզում թաքցնել մարդուց:

Ճանապարհի փոշին բարձրացնելով նրանք սլանում էին դեպի Սեպուհ լեռան արևմտյան ստորոտները: Առջևից գնում

էր Մոթոյի ձին՝ շնչահատ ու քրտնած, հետո գալիս էին տասնապետ Նազիմը և իր տղաները՝ թվով տասնհինգ զինվոր: Տասնապետը Մոթոյին շտապեցնում էր՝ խումբը բոպե առաջ տեղ հասցնել:

Ասում էին Մոթոն քուրդ չէ, այլ թուրք: Նաև լուրեր էին պտտվում, թե հայ է, բայց արդեն քանի տարի հեռացել է տուն ու տեղից, ընկերացել գավազանին ու հրացանին:

Մոթոն հին հաշիվներ ուներ Մուրադի հետ: Մուրադը Ֆիդայի էր, խմբի ղեկավար:

Մի անգամ Մոթոն հայի ոչխարներ էր հափշտակել և առաջն արած քշում էր Մամախաթուն գյուղաքաղաքը՝ թուրքերին ծախելու, երբ ամառի վայրում, ասես գետնի տակից, Մուրադն իր առջև ելավ: Ինքը մինչև իսկ չհասցրեց հրացանն ուսից իջեցնել: Մուրադը խլեց հրացանը, սպառնաց, որ շանսատակ կանի, եթե խեղճ մարդկանց ունեցվածքը մեկ անգամ էլ փորձի գողանալ, ապա հրամայեց՝ ոչխարները վերադարձնել տերերին:

Մոթոն քշում էր ձին, և վրիժառության հիշողությունները ներսից ճանկռում էին նրան:

Մպրիամը... Այն ժամանակ Մարիամը եկեղյաց գավառի ամենագեղեցիկ աղջիկն էր: Մոթոն հո լավ է հիշում: Երկար հյուսքերից մեկը ետ էր գցում, իսկ մյուսը բաց թողնում առջևը՝ կրծքի վրա, իրանը դյուրաթեք էր, ինչպես Եփրատի շամբուտներից քաղված եղեգը, և Մոթոյին երբեմն այնպես էր թվում, թե այդ քաղված եղեգը նվագում է իր հրալիր աչքերով, եղջերվաձագի քայլվածքով, լեռնային աղբրակի նման

պղպջուն կրծքերով, որոնք նրան, պահեր էին լինում, խելագարեցնում էին ու քշում սարերը:

Հին մի դեպք գրեթե միշտ նրա հետ էր. տարիների մշուշը մեկ էլ ցրվում էր, և այդ անցյալը դառնում էր ներկա, հառաչանքի ձայներ հանելով նրա կրծքից:

Իրիկնադեմ էր: Աղջիկների երամը ծաղկաքաղից վերադառնում էր գյուղ: Հեռվից Մռթոն լսում էր նրանց մեղմօրոր երգը, որ հաճախ ընդհատվում էր վարակիչ ու անզուսպ ծիծաղով: Տղան զայրացկոտ մտածում էր, որ նրանք տեսել են իրեն ու ծաղրում են:

Մարիամը բավականին ետ էր մնացել ընկերուհիներից և աղբյուրի մոտ ծաղիկներ էր փնջում, ջուր ցանցնում վրաները: Ի՛նչ հրաշք աղբյուր էր, ի՛նչ սառնություն: Փորսող տալով, քարերի ետևում պահված, ուստնելով թփից թուփ՝ Մռթոն ամբողջ ժամանակ աննկատ նրան էր հետևել: Այժմ ամենահարմար պահն էր: Նա դանդաղ դուրս սողաց թաքստոցից, մի քանի վայրկյան կանգնեց փոքր-ինչ ճկված՝ ասես պատրաստվում էր ցատկել, ապա անձայն սլացավ դեպի աղբյուրը: Աղջիկը դեռ իր ծաղիկներով էր հմայված, երբ հասավ ու նրան ետևից գրկեց: Հետո շրջեց ձեռքերի օղակի մեջ, էլ ավելի սեղմեց մեջքը... «Մարիամ»... ուզեց շրթունքը համբուրել, դեմքը, վիզը... Մռթոն զգաց դիմադրության ահռելի ճիգը. աղջկա մարմինը կեռումեռ եղավ, նա դուրս պրծավ իր գրկից և, ծաղկեփունջը վայր գցելով, փախուստի դիմեց: Թափված ծաղիկները կարծես բռնեցին ոտքերը: Երբ շփոթմունքը անցավ, ծաղիկները ոտնակոխ անելով, քթի տակ հայիոյելով, նա մի քանի քայլ գցեց, նայեց կանաչ



սարալանջով արագ իջնող Մարիամին, ասես ուզում էր հայացքով հասնել նրան:

Մռթոն երկար ժամանակ թաքնված էր ապրում: Ներքին գործերի նախարարության հատուկ ցուցակներում նա դասվում էր Թուրքիայի ամենից վտանգավոր հանցագործների շարքը. նրա «գործը» բովանդակում էր մի քանի սպանություն և բազմաթիվ կողոպուտներ: Առաջին համաշխարհային պատերազմի նախօրյակին քրեականների հետապնդումը գրեթե վերացավ. նրանց չէին ներել, բայց և չէին հետապնդում: Եվ դա ավելին էր, քան ներում շնորհելը:

Լեռների մենակյաց կյանքը Մռթոյին ավելի էր վայրենացրել: Երբ զգաց, որ անպատիժ է մնալու և իջավ ներքև՝ բանուկ ճանապարհներն ու գյուղերը, գազանի պես էր՝ դյուրաբորբոք ու արյունռուշտ աչքերով: Ոչ մի պաշտոնական ձեռք նրան չկանգնեցրեց, և նա նույնիսկ մտավ Երզնկա՝ իր մանկության քաղաքը: Հասարակ ժողովուրդը վախենում էր նրանից. մեծից փոքր բոլորը գիտեին, որ նա Մռթոն է՝ սպանում է ու թալանում:

Այդ ժամանակ ճանապարհը նրան տարավ Կարմրի, որտեղ կարմիր էր հողը, և աճում էր ճերմակ լոբի ու մանր կորիզներով ձմերուկ: Գյուղ մտնելուց հետո միայն նա պարզ հասկացավ, որ Մարիամի մասին հիշողություններն են իրեն այդտեղ բերել:

Գյուղը ամառի էր: Ամեն ինչից երևում էր, որ այդտեղից անցել է թուրանական գորշ գայլերի ոհմակը: Հրդեհված տան ավերակներին նստել էր մի պառավ կին. թվում էր՝ ոչ թե նստել է, այլ ածխացել: Նրանից Մռթոն իմացել էր, որ Մարիամի

րուր հարազատներին սպանել են՝ որին գցել ձորը, որին սրախողխող արել: Իսկ մինչ այդ, Մարիամը պսակվել էր ու մեկնել գյուղից: Պառավը չգիտեր, թե նա որտեղ է գտնվում, ո՞րջ է, թե՛ մեռած:

Մռթոն Մարիամին մեռած՝ համարեց, որովհետև Ղարաքիլիսայով, Տաճրակով, Էրկանով և գավառի ուրիշ շատ գյուղերով նույնպես անցել էին գորշ գայլերը, բայց նրա սրտում բույն դրեց կենդանի, օրըստօրե խորացող մի վիրավորանք:

Կրնկելով ձիու կողերը, ատամները կրճտացնելով, Մռթոն այժմ էլ էր մտածում, որ Մարիամը կարող էր իր հարձը լինել, լինել իրենը, իր սիրուհին: Մուրադը չթողեց: «Դու ստոր ես, — ասաց, — դու չես կարող նրան ընկեր դառնալ»: Այս բառերը տարիների հեռավորությունից վերադարձան և նորից աղմուկով լցվեցին ականջները, Մարիամը նրա սիրտը ասես նորից կրակ տվեց, և նա արդեն որերորդ անգամ անաստվածաբար ճիպոտահարեց ձիուն:

Մայիսի վերջն էր:

Ճանապարհի աջ և ձախ կողմերում կանաչուտներ էին: Երբեմն-երբեմն ձիերի դոփյուններից վախեցած ինչ-որ թըռչուն ծվծվոցով օդ էր բարձրանում և կորչում հեռվում: Ծաղիկները մեղմ քամուց օրորում էին իրենց գլխիկները: Ձյուններից առուներ էին գալիս՝ մեկ կարկաչում քարերին, մեկ էլ պահ մտնում խոտերի մեջ ու լռում: Արևի շողերում թևածում էին պես-պես թիթեռներ:

«Չէր երևում միայն մարդը»:

Ոչ, այժմ Մռթոն չէր սիրում Մարիամին: Այդ զգացմունքը

երևի նախկինում էլ խոր արմատներ չունեի նրա հոգու մեջ: Իհարկե, եղավ մի շրջան, երբ ինքն այդ աղջկան կարծես սիրում էր, բայց նույն ժամանակ էլ կարող էր և սպանել նրան: Մուրադի խոսքում չափազանցությունն չկար: Եվ դրանից նա ավելի էր կատաղում: Կատաղությունը երբեմն հասնում էր այն աստիճանի, որ նա փորձում էր ապացուցել ոչ այլ ինչ, քան իր գազանությունն ու ստորությունը, և դրա համար ամեն բան անում էր:

Մռթոն նայեց ետ. Նազիմը և մյուսներն ընդհուպ մոտեցել էին իրեն: Ոչ ոք չէր խոսում: Հետո նայեց լեռներին, որոնք տեղ-տեղ ծածկված էին անտառով, և նրա գլուխը հիշողություններից դատարկվեց: Բայց դա տևեց ընդամենը մի քանի րոպե: Հաջորդ պահին Մուրադը նորից արթնացավ նրա մտքում՝ փամփուշտակալները կրծքի վրա խաչաձևված, հաստ, սև բեղով, հրացանն ուսից կախ, իսկ ձեռքը միշտ կաշեփոկի վրա՝ պատրաստ ամեն վայրկյան զենքը կրակային դիրքի բերելու:

Մուրադի կերպարանքում, ամբողջ գործունեության մեջ չկար մի բան, որ Մռթոյին դուր գար: Որոշ տարածություն էլ անցնելով, նա հասկացավ, որ ինքը նախանձում է նրան՝ նրա խիզախությանը, շիտակությանը, նվիրվածությանը լեռներին, աղբյուրներին, այդտեղի մարդկանց, դաշտերին, անտառներին: Նրան թվաց, թե այդ ամենը, որ երկիր են կազմում, իրենց հերթին սիրում են նրան, համարում Մուրադին իրենց հարազատը, իրենց որդին: Մռթոն սաստիկ չարացավ. նախանձը ավելի ցավոտ զգացմունք էր, քան

ատելութունը, քան նրանից վրեժ լուծելու կիրքը, որ շատ վաղուց ի վեր ապրում էր իր մարմնի մեջ:

Նա բարձրացրեց մտրակն ու թափով իջեցրեց, և տակի սևաթուլյր ձին նոր ուժով սլացավ առաջ: Մռթոն խթանում էր ձիու փորը, հետո հրացանի կոթով սկսեց խփել գավակին: Հանկարծ մտածեց, որ ինքը գուցե սխալ է անում՝ Մուրադին գցելով թուրքական գայլերի երախը, գուցե պիտի վրեժը լուծի անձամբ՝ իր ձեռքով, իր հրացանով, իր դաշույնով, ինչպես վայել է իսկական տղամարդուն, կամ գուցե ավելի ճիշտ կլինի՝ նրանից հեռու մնալ... Կասկածը սողոսկեց նրա մաշկի տակ: Նա սարսռաց: Կասկածը կատաղության նոր ալիք առաջ բերեց նրա ներսում: Մռթոն շարունակ կրնկում էր ու խփում, չէր վազեցնում ձիուն, այլ ծեծում էր: Ձին խրխնջաց: Ծանր շնչելով Մռթոն շարունակում էր ծեծել, կարծես ուզում էր դուրս տալ իր մարմնի ամբողջ զորությունը. ձին շրջեց գլուխը և նայեց նրան. աչքերում ողբալի զարմանք կար, իսկ բերանի մեջ՝ սպիտակ փրփուր: Մռթոն ճիպոտը շեշտակի իջեցրեց ձիու դեմքին՝ աչքերի ու բերանի միջև: Ձին որոշ տեղ էլ գնաց՝ նույն ողբերգական հայացքը դարձրած նրան, և վրնջալով ծառս եղավ: Մռթոն սանձը հավաքեց բուռը և հարվածներ էր շնչասպառ հասցնում. մեկ հարված, երկու, երեք, չորս... Հերթական հարվածին իսկույն հաջորդում էր նորը՝ նաև վրեժի, ատելության, նախանձի հետզհետե կուտակվող խառը մի զգացմունք էր դնում յուրաքանչյուրի մեջ:

— Ի՞նչ է պատահել, — հասնելով նրան և սանձելով իր ձին, հարցրեց Նազիմը:

Մռթոյի ներսում կրկին խլրտաց քիչ առաջվա կասկածը.

միգուցե այդ գայլերին չտանի Կարմրի, որտեղ Մուրադն է, տանի ուրիշ գյուղ, մուլորեցնի այս լեռների մեջ: Նա ասաց.

— Ձիերը հոգնել են: Լավ կլինի հանգստանանք:

— Ոչ մի դեպքում, — խստութեամբ ընդդիմացավ Նազիմը: — Դեռ շատ ենք գնալու:

Ձիու փորքաշն ուղղելու նպատակով Մռթոն շրջվեց նրանից, որ նրա խուզարկու հայացքի տակ չընկնի: Ապա զգալով, որ Նազիմը պատասխան է սպասում, կամաց գցեց.

— Շատ:

— Առավել ևս պիտի շտապել: Ոչ մի բոպե դանդաղելու իրավունք չունենք:

Նազիմը ասպանդակեց, ձին: Թուրք զինվորները, որոնք նույնպես կանգ էին առել, հետևեցին նրան:

Մռթոն իջել և ձիու կրծքանդն էր ձգում, որ թուլացել էր քիչ առաջվա մուլեզին վազքի ժամանակ: Պնդավուն կաշեգոտու ծայրը անցկացնելով ճարմանդի միջով, նա մտամուլոր քաշեց մի կողմ, և թեև հայացքն ուղղված էր զինվորներին, որոնց ձիերը ճանապարհի փոշին արդեն վեր էին հանել, զգաց, թե ինչպես երկաթագամը մտավ գոտու ծակի մեջ:

Մտքերը օձերի նման խճճվել էին նրա գլխում:

Երեք անգամ կրակեցին. Մռթոնին շտապեցնում էին հասնել իրենց:

— Բուվան... — շոյելով ձիու ճակատը, որտեղ մտրակը նկատելի խարան էր թողել, ասաց Մռթոն:

Նա ոտքը դրեց ասպանդակին, և մինչև մյուսը կանցկացներ ձիու գավակով, ականջին նորից հրացանի ձայն հասավ: Այդ կրակոցը ցրիվ տվեց նրա մտքերի կծիկը: Նա նայեց ետ իր

անցած ճանապարհին, հետո՝ առաջ: Ճանապարհը գնում էր դեպի քարափը՝ մարդու կերպարանքով ահռելի մի ժայռ, ժայռե հսկա, որի ծեր ու իմաստուն հայացքը կարծես ասում էր՝ ամբողջ բնությունն իմն է: Այն հեռու կողմերում, Մռթոն լավ գիտեր, գտնվում էր սառն ու վճիտ Ջարա լճակը: Ամռանը լճակի ջուրը այնքան հաճելի է շոգած մարմնին: Որ լճակը անցար, մինչև Կարմրի մտում է քիչ տարածություն. հարկավոր էր շրջանցել Սեպուհի անտառոտ լանջը և գնալ վերև, միշտ վերև՝ ծաղկաշատ արոտավայրերի կողմը: Մռթոն նորից ետ նայեց, բայց այս անգամ՝ մտքով: Մտքով նա ձին քշեց եկած ճանապարհով, և սիրտը անհանգիստ էր մի տեսակ, կարծես մազից էր կախված:

— Դե լավ, էլի, Բուլան, — ասաց նա, թփթփացնելով ձիու վիզը, — դե լավ, էլի...

Ձին հնազանդորեն քայլեց առաջ: Մի քիչ գնալով, ծռեց վիզն ու ճամփեզրից մի երկար խոտ պոկեց: Մռթոն տեսավ, որ նրա աչքերն արդեն խաղաղվել են: Բուլանը առանց մտրակի սկսեց վազել: Ինչ-որ ուրախ տրամադրություն էր թափանցել արյան մեջ:

Մռթոն զգաց, որ ձին ներել է իրեն, և նեղվեց, կուչ եկավ թամբի վրա:

Նազիմի տղաները խառնիխուռն կերպով կծկում էին ճանապարհը: Մերթ ընդ մերթ որևէ մեկը անջատվում էր խմբից և անցնում առաջ, իսկ հետո՝ աստիճանաբար ետ ընկնում, իր դիրքը զիջելով ուրիշին: Ձիերին պարտադրված արագությունը, որ նրանց ուժասպառ էր անում, պայտերի դոփյունը, մռայլ, ասես կացնով տաշած դեմքերով

հեծյալները, որոնք փոքր-ինչ կռացած, ամուր բռնել էին սանձերից, նրանց անդորդվելիությունը՝ այդ ամենը անհամատեղելի էր ողորմած բնության անդորրին, որտեղ հողը, ամբողջ բուսականությունը, որ արևի շարժման հետ շարունակ նոր ու նոր գույներ էր հագնում, երկինքն ու ջուրը՝ ամեն-ամեն բան հաստատում էր կյանքի մաքուր և լուսավոր սկիզբը:

Բուլանը արագացրեց վազքը, կռահելով, որ պետք է հասնել առջևից ընթացող ցեղակիցներին: Այնպես թեթև ու ազատ էր գնում, կարծես նոր էր ճանապարհ ընկել ու բոլորովին հոգնած չէր:

Չիու ներողամտությունը Մռթոյին դուր չեկավ: Ինչո՞ւ է մոռանում քիչ առաջվա ծեծը: Ի՞նչ է, հիմա էլ սա՞ է ուզում իր ստորությունը ապացուցել: Իրեն ինչո՞ւ թամբից չի գցում: Նա ձիավարի քացի տվեց Բուլանի փորին, հետո մտրակով դադեց ազդրը: Բայց ձին չնեղացավ, թեև ետևի ձախ ոտքը, հոգնածությունից էր, թե՛ այդ վերջին հարվածից, ցավագին ձգվեց. նա կարծեց, թե տերն ուզում է, որ ինքը ավելի արագ վազի, և, զրնգուն մի խրխինջ արձակելով, սլացավ առաջ:

«Ոնց որ մարդ լինի», — աչքերը չռելով ձիու վրա, չարացավ Մռթոն, թունոտվեց: Թքոտելով աջ ձեռքի ափը, որ մտրակի բռնատեղը ձեռքից դուրս չթռչի, նա մի քանի անգամ մտրակը պտտեց օդում ու խփեց ձիու դեմքին: Այդ հարվածի մեջ ներդրեց այնքան ուժ, որ ձեռքը, մտրակի հետ, թուլացած կախ ընկավ:

Նազիմը շրջեց գլուխը և նշանացի հասկացրեց Մռթոյին, որ իրենցից առաջ անցնի:

Մռթոն երրորդ անգամն էր հանդիպում Նազիմին: Նա իր ցեղակիցների նման սակավախոս էր ու մռայլ: Նրա լռութունը, սակայն, միշտ ուներ թաքնված իմաստ, կոշտ ու բթամիտ չէր մյուսների պես: Թվում էր՝ նա ամեն րոպե ինչ-որ բան է ծանր ու թեթև անում, աչքերը, դեմքի մկաններն անվերջ խաղում էին, և դա երկյուղալի էր:

Երկնքում գիշանգղներ երևացին: Օդը լցվեց գորշ ու վիթխարի թևաբախումներով: Մռթոն ինը գիշանգղ հաշվեց, հետո դրանց ավելացան ևս չորսը: Օդում տասներեք գիշանգղներ էին պտտվում՝ մռայլ կռնչյուններով, անշտապ, ասես ուսումնասիրելով ներքևում գտնվող յուրաքանչյուր կետ: Շուտով դրանց թիվը հասավ քսանմեկի, իսկ այնուհետև արդեն անհնարին էր հաշվել՝ բոլոր կողմերից գալիս էին ու խառնվում իրար: Վերջին ժամանակները այդ թռչունները աննկատելիորեն շատացել էին: Առաջ Մռթոն դրանց հանդիպում էր միայն բարձր լեռներում, այն էլ՝ ոչ միշտ, գիշանգղները այնքան էլ չեն սիրում մարդկանց աչքին երևալ, իսկ այժմ դրանց կարելի է տեսնել գետահովիտներում, ձորերի վերևում, դաշտերում, մինչև անգամ քաղաքների երկնքում՝ ավելի ցածր թռչելիս, քան իրենց սովորությունն է:

Խառնիխուռն պտույտներ գործելուց հետո՝ գիշանգղները սկսեցին մաս-մաս ցրիվ գալ: Հեռանալով ավելի ու ավելի էին իջնում, և կասկած չկար, որ, արյան ծարավ ճիրանները պարզած, իջնում էին ծովից ծով հողերի վրա:

Խումբը այժմ գնում էր լճակի ափով: Զարայի ջրերում արտացոլվում էր գիշանգղների թևերից ազատված երկինքը: Եվ լճակը, որ սովորաբար ծաղկադաշտի նման կանաչերանգ



էր, այդ պահին կապույտ էր թվում: Մռթոն սիրում էր կանգնել Ջարայի փին և նայել, թե ինչպես են ջրերը ճողփում քարերի վրա, ինչպես է իր դեմքը արտացոլվում այնտեղ: Իսկ այժմ նա հայացքը այդ գեղեցիկ տեսարանից փախցրել էր հեռուները և իրականում չէր տեսնում ոչ մի բան՝ ոչ ձիու ոտքերի առջև բացվող ճանապարհը, ոչ լեռները, ոչ երկինքն ու գետինը, որը ասես բուռն հուզմունքից մեկ բարձրանում էր՝ դիզվում-սարանում, մեկ էլ թուլացած փռվում՝ դառնում հարթավայր:

Գիշանգղները տխրություն էին ներարկել Մռթոյի արյան մեջ:

Մտովի նա տեսնում էր, թե ինչպես սև ու ահռելի մի գիշանգղ ոստնում է դիակից դիակ, փնտրում ինչ-որ բան, միգուցե՝ իր մարմինը, որ դեռ կենդանի է: Մռթոն հավատում էր իր բախտին այն, ինչ գրված է ճակատի վրա, բայց չի երևում, և երբեմն-երբեմն մի տեսակ էր նայում եկող օրվան, մարդկանց, նույնիսկ բնությանը: Հիմա նրա հոգում թերահավատության ժամանակն էր: Թվում էր՝ Նազիմի տղաները հետապնդում են իրեն, իսկ ինքը փախչում է: Եվ այստեղ մտրակը վրա-վրա խայթեց ձիուն:

Արդեն մոտեցել էին Սեպուհ լեռան ստորոտին:

Առջևում խիտ անտառ էր: Մռթոն գիտեր, որ այնտեղ արևի հատուկենտ շողեր են գետնին հասնում, և կեսօրից անմիջապես հետո մութն սկսում է ընկնել: Անտառը այդտեղից տարածվում է հեռու հեռուները: Վերևներում քարայրներ կան, լեռան կուրծքը վերքի պես մխրձված խորխորատներ, որոնք քեզ կախարդելով քաշում են դեպի իրենց խորքը: Որ կողմ նայում ես՝ լեռներ են, կարծես աշխարհը լեռնաստան

լինի: Ո՛վ ում կարող է գտնել այդ վայրի ու անծայրածիր ընտանիքի մեջ:

Մի միտք էր շարժվում Մռթոյի գլխում, գուցե իսկապես թեքի ճամփան, փախչի անտառ ու կաշին փրկի, ի՞նչ գործ ունի թուրքերի հետ, ուզում են Մուրադին բռնել, ինքն էլ է ուզում, ավելի շատ... թող առանց իր օգնության գնան բռնեն... Բայց այդ միտքը շարժվում էր ավելի դանդաղ, քան իր ձին:

Պայտերի դոփյունը արձագանք էր գտնում նրա գլխի մեջ նրան թվում էր, թե Բուլանը արշավում է իր գլխի ներսում գտնվող ինչ-որ ճանապարհներով:

Այդպես սլանալով, Մռթոն կորցրեց թուրք զինվորներից խույս տալու մի քանի հարմար պահեր: Անտառի փեշերը արդեն քաշվել էին: Տեղանքը բաց էր ու արևաշող: Փախուստի փորձը հիմա կարող էր թանկ արժենալ նրան, ո՛վ գիտե, գուցե ծանր պատիժ, բանտարկություն կամ նույնիսկ օր ու արև:

Մի գիշանգը էլ երևաց երկնքում, պտույտ գործեց և գնաց ոլակի հարավ՝ Եփրատի կողմերը:

Մռթոն երկու կրակի արանքում էր՝ Մուրադի ու ետևից եկող թուրքերի, և այժմ դա շատ լավ էր գիտակցում: Նա սեփական նախաձեռնությամբ էր ընկել այդ փորձանքի մեջ, ոչ ոք նրան չէր հրել այնտեղ: Երզնկայի կառավարիչը հարյուր օսմանյան հնչուն ոսկի էր խոստացել այն մարդուն, որը Մուրադի գլուխը կհանձներ իրեն: Երեք շաբաթ էր, ինչ հայտարարությունը փակցված էր սերայի, կառավարչատան, գորանոցի և պաշտոնական ուրիշ շենքերի պատերին: Անցած երեկոյան ձեմինից քաղաք վերադառնալիս Մռթոն հեռվում նկատել էր Մուրադին երկու իր նման ֆիդայիների հետ, ձին

կապել էր ծառից ու գաղտնի հետևել նրանց: Մուրադը կաղում էր, ընկերները թևանցուկ էին արել, երևի վիրավորված էր: Նրանք հասել էին Կարմրի և թաքնվել Մարիամենց անտերանտիրական տանը: Մռթոյի հոգում նորից զարթնել էր վրեժխնդիր անցյալը, ոսկին զրնգացել էր ականջների մեջ ու ամբողջ մարմնում: Եվ նա առավոտյան կողմ, քրտինքն աչքերին, հասել էր Երզնկա...

Հոգնությունից, ցավից ու ոգևորությունից բթացած Բուլանը բաց էր թողել իր ոտքերի ամբողջ արագությունը: Մռթոն քաշեց սանձերը, և տասնհինգ հեծյալները աստիճանաբար մոտեցան նրան, որոշ տարածություն գնացին մեկտեղ, հետո անցան առաջ: Ճանապարհն արդեն ինքն էր տանում Նազիմի խումբը՝ ժապավենի պես ոլոր տալով Սեպուհի լանջն ի վեր: Այդտեղից չքնաղ տեսարաններ էին երևում, և մի պահ կարելի էր կարծել, թե աշխարհում ամեն ինչ լավ է ու գեղեցիկ:

Նրանց միջև տարածությունը հետզհետե մեծանում էր, երկարում, և Մռթոն մտածում էր, որ դա գլուխն ազատելու ամենավերջին հնարավորությունն է:

Ծանոթ-անծանոթ մի հարց տնկվեց նրա առջև. ումից: Բուլանի ուժասպառ վազքի հետ հարցը ավելի ու ավելի էր տանջում Մռթոյի մարմինը, որը մտքերից, անքնությունից, տագնապներից արդեն խելագարվում էր:

Մռթոն գիտեր, որ Մուրադի հետ հաշիվ մաքրելը հեշտ գործ չի. նրա ետևում ժողովուրդ կա, նա շատ ընկերներ ունի, որոնք կարող են իրենից վրեժ առնել, եթե իմանան... Իսկ արյունը... իր երակներում հայի արյուն է... միթե հայի է... գուցե՝ քրդի, թուրքի, հույնի... Ինքը կարող է թքել արյան

վրա, — թքելով շարունակեց մտածել Մռթոն, — զարհուրելին մենակությունն է, մենակ մեռնելն է՝ լուռ քարի կողքին, լուռ անտառում, հետո կգա արջն ու կսկսի հոշոտել, պատառ-պատառ անել իր մարմինը, լափել, կամ կհայտնվի մի գիշանգըղ այն գիշանգղներից:

Նրա միտքը տենդորեն որոնում էր այնպիսի հենարան, որի վրա կարելի լիներ ապահով կանգնել:

Իսկ Նազիմը, իսկ թուրքերը... Մռթոն փշաքաղվեց: Նրանք գիտեն սպանել այնպես, ինչպես ուրիշ ոչ ոք՝ չարչարելով սպանել, մաս-մաս: Հողը նրանց ձեռքին է, ամբողջ բնությունը, մարդկային ամբողջ կատաղությունը նրանցն է, զենքը, նենգությունը, ձիերը... Մռթոյի ուղեղը սաստիկ լարվել էր և չափուձևում էր այնպիսի մտքեր, որոնք այնքան էլ հաշտ չէին նրա ծանրամիտ էության հետ: Ըստ երևույթին, շարժվում էր ոչ այնքան ուղեղը, որքան՝ մի ներքին զգացողություն, որ բնազդաբար ելք էր փնտրում՝ դուրս պրծնելու այդ վտանգավոր դրությունից. «Նրանք կառավարություն են, — բարձրաձայն, ասես իրեն վստահեցնելու համար ասաց Մռթոն, — օրենքը, իրավունքը նրանց ձեռքին է»: Օրենքի տերը տերն է աշխարհի, — հայացքը թափառում էր բնության մի անկյունից մյուսը, — այս քարերը, խոտը, ծաղիկները, այն առուն, որ, նոր ջրեր հավաքելով, վազում է ներքև, նրանը չեն, բայց ահա նրանն են, ամենամեն ինչ նրանն են, ինքն էլ է ոտից գլուխ նրանը, ուր որ գնա՝ նրանն է, թեկուզ լեռ քարի մեջ մտնի, հաստաբուն ծառի

արմատի տակ, թեկուզ հող կամ ջուր դառնա: Մուրադի հանդեպ վախը դատարկ բան է այդ սարսափի մոտ, ինչ վախ է դա... ինքը բուրրովին էլ չի վախենում նրանից, այլ ատում է այստեղ վրեժ կա, — նա աջ ձեռքը դրեց կրծքին, — վրեժ ատելություն... Հիմա ավելի ձեռնտու է վրեժ լուծելով Մուրադից գլուխն ազատել, քան թշնամանալ թուրքերին: Նա ժպտաց, կարծեց՝ Նազիմը կանգնած է իր առջև ու նորից ժպտաց, հետո ուզեց հլու-հնազանդ վերաբերմունք ցույց տալ նրան, տպավորել իր համերաշխությունն ու հավատարմությունը և ժպտաց երրորդ անգամ: «Ուզեն՝ սևը սպիտակ կանեն, — քթի տակ ասաց Մռթոն, և դեմքը թորշոմած էր, ժպտուն ու դալուկ, — մի ստոր արարածի՝ կարգին մարդ»: Նա կառչեց վերջին մտքից. օրենքի պաշտպանությունը իրեն շատ է հարկավոր... Նա քիչ մտածեց ու ասաց. «Կյանքի չափ»: Օրենքը կարող է իրեն նոր կյանք տալ, իրավունքներ: Նա այլևս չի վախենա: Գիշերները սարսափելի պատկերներ են գալիս աչքին: Այն որսորդը, որին նախանցյալ տարի կողոպտեց, սպանեց ու թաղեց անտառում, երբեմն-երբեմն սողալով մոտենում է և ուզում կրծոտել իրեն: Սարսափելի այդ մտապատկերն արագացրեց Մռթոնի խորհրդածությունների ընթացքը: Հիմա դեմքը ավելի գունատ էր, մի տեսակ ժանգոտ: Նրանք կներեն իր չարագործությունները: «Արդեն ներել են», — զգուշորեն շուրջը նայելով, շշնջաց նա: Թալանելու իրավունք էլ կտան, ինչո՞ւ չէ, սպանելու էլ, եթե... Մռթոն այնքան հուզված էր, որ անմիջապես չկարողացավ իմանալ, թե ինչ է այդ «եթե»-ն: Հետո գլխի ընկավ ու շարունակեց. եթե այս գործը հաջողությամբ վերջանա՞ Մուրադին, ողջ կամ

Վեռած, Մեմտուհի Մալթա կառավարչին հանձնեն: Հապա  
ոսկին... Մռթոն այդքան ոսկի մինչև իսկ երազում չէր կարող  
ունենալ: Երա ձեռքը ամենաշատը յոթը ոսկի էր անցել: Դա  
տարիներ առաջ էր գողացված անասուն էր ծախել քաղաքում:  
Ոչ, յոթը չէր, ութը ոսկի, ութը դեղին ու զնգուն ոսկիներ:

Մռթոն չզգաց, թե ինչպես հասավ Նազիմի խմբին և  
նույնիսկ առաջ արշավեց:

Մուրադը... Ահա թե ումից է հարկավոր գլուխն  
ազատել, — մեկ անգամ ևս մտմտաց նա, ասես ուզում էր  
ուղեղում ամրապնդել իր որոշումը:

Հիմա թեթև ու ազատ էր շնչում:

Մռթոյի ներսում հանկարծ վառվեցին ուրախության կայ-  
ծեր, որից և երեսը պայծառացավ. նա հիշեց շատ հին մի  
դեպք, որ նոր թույն էր կաթեցնում իր և Մուրադի թշնաման-  
թին՝ եվ իսկույն էլ սիրեց այդ դեպքը:

Ամռան շոգերին երզնկայի փոքրերը սովորություն ունե-  
ին լողանալ Եփրատում՝ հին ու փլատակ կամուրջի մոտ: Մի  
տղա կար, հայոց թաղից, որին բուլորը «գիժ Նեսո» էին ասում:  
Քչախոս էր, նիհար, հիվանդոտ աչքերով և չափազանց բարի  
ու հնազանդ...

Մռթոյի գլխում կենդանացավ հեռվում մնացած այդ օրը՝  
իր մանրամասներով, և նա ձիու փորը եռանդազին  
կրնկահարեց...

Ուռենու ճյուղով օդը թրատելով Մռթոն մոտեցավ գե-  
տին՝ Տասնյակ տղաներ՝ վարտիքով ու անվարտիք, մողեսնե-  
րի պես մեկնվել էին գետեզերքի տաք քարերին ու անշարժա-  
ցիւ Այդտեղ էր և «գիժ Նեսոն»: Ճյուղը շարտելով գետը,

Մռթոն նրան կոշտ ու կոպիտ հրամայեց՝ բերել այն: Նեսոն իսկույն նետվեց ջուրը և շատ չանցած ճյուղը ձեռքին վերադարձավ: Երկրորդ անգամ Մռթոն ճյուղը գցեց ավելի հեռու, և Նեսոյին դեպի գետը հրեց: Տղաները հետաքրքրությամբ նրանց էին նայում: Մռթոն լպիրշությունից ուռել էր: Երբ Նեսոն ծանր շնչելով հասավ ափ ու նրան հանձնեց ուռենու ճյուղը, նա թափ առավ և փայտը շարտեց շատ հեռու՝ գրեթե մինչև գետի մեջտեղը, որտեղ, ստորջրյա խութերի պատճառով, ջուրը կոհակ-կոհակ էր լինում: «Գիժ, գնա բեր», — ասաց նա, հետո թունոտ ժպտալով գոռաց. «Դե շնուտ»: Ոչ ոք չէր համարձակվում միջամտել այդ ծաղրուծանակին: Նեսոն իրեն նորից գցեց ջուրը: Գետամիջի աշխույժ հոսանքը փայտը քշում տանում էր ներքև՝ գետի վտանգավոր մասերը: Նա հոգնած էր, ափ ելնելիս ոտքերը զարկվել էին քարերին և ցավում էին, բայց լարեց մնացած ուժերն ու լողաց դեպի ջրերի խորքը: Բոլոր տղաները արդեն ոտքի էին կանգնել և զարմացած ու հիացմունքով նայում էին իրենց «գիժ Նեսոյին», որովհետև մինչև այդ պահը ոչ ոք չգիտեր, որ նա այդքան լավ լողորդ է: Երբ նա, ճյուղը ատամներով բռնած, դանդաղ, ուժասպառ մոտենում էր ափին, բոլորը, Մռթոյին աչքաթող արած, արձակեցին ուրախ բացականչություններ, իսկ մի քանիսը վեր-վեր խաղալով ծափ զարկեցին: Նեսոն ջրից դուրս ելավ և, շնչահեղձ լինելով, կապտած, բայց երջանկությունից ժպտալով քայլեց դեպի Մռթոն...

Բուլանը կրծքին այրուցք զգաց, հասկացավ տիրոջ մտրակից էր: Այնուհետև մտրակը աջ ու ձախ դաղում էր ձիուն, ասես գրառելով Մռթոյի այդ պահի զայրույթը. «գիժ

Նեսոն» Մռթոյի մտապատկերներուն շարունակում էր ժղպտալ, տղաները գոռում-գոչումով ծափ էին տալիս, և նա այդքան տարիներից հետո թթվում էր ու փրփրում...

Մռթոն ճռթոցով թքեց ատամների արանքից: «Գնա բեր», — ուռենու ճյուղը չորրորդ անգամ զցելով գետը, ասաց նա և նորից ճռթացրեց: Նեսոն խեղճ-խեղճ նայեց Եփրատին, հետո տղաների կողմը: Ժպիտը կոտրվել էր, որից և դեմքը ծոմնված էր թվում: Նա մի քանի քայլ արեց դեպի գետը, կանգ առավ, կիսաշրջվեց: Այժմ դեմքը գունատ էր ու տխուր: Ճայռոտ աչքերը նայում էին այնպես սառն ու մտացիր, որ կարելի էր կարծել, թե ոչինչ չեն տեսնում, ոչինչ չեն լսում, ոչինչ չեն զգում արդեն: Հետո մի քիչ էլ մոտեցավ ջրին, նույն ցրված հայացքով որոնեց ուռենու ճյուղը և ոտքերը էլի առաջ տարավ: Ներկաներից շատերը հասկացան, որ նա ուժ չունի լող տալու:

Ժողովրդի մեջ տարածված հավատալիք էր՝ ամեն տարի մեկը պիտի զոհ գնա Եփրատին: Բոլորը վախից քարացան. կարծեցին՝ այս անգամ «զոհը» «գիժ Նեսոն» է:

«Նեսո, գիժ, կանգնիր»: Բղավողը Մուրադն էր: Քարերով ոստոստելով նա հասավ Նեսոյին, որ արդեն ուզում էր իրեն ջուրը զցել, և ետ քաշեց: «Թող դրան», — հոխորտաց Մռթոն և Նեսոյին հրեց դեպի գետը: «Ինչի՞ ես ուզում խեղդվի»: «Հենց այնպես», — Մռթոն իր ձևով թքեց: Նա չէր սպասում, որ Մուրադը կխփի. ետ-ետ գնաց, կծկվեց ցավից, ապա կրունկը դեմ առավ քարին, փռվեց ջրի մեջ...

Բուլանի երակները պրկվել էին, և նա անդադար վրնջում էր Ձայնի մեջ աղաչանք կար, հուսահատությունն ու բողոք:



Բայց Մռթոն այդ ամենը չէր նկատում՝ այնքան որ զգայարանները ենթարկվել էին հիշողության ընթացքին: Շոշափեց դեմքը. թվաց, թե արյունը քիթ-բերանից դեռ թափվում է: Արյուն չկար, կրծքի տակ կատաղության հասնող վրեժի հեքն էր...

Ուշքի գալով, նա լողաց դեպի ուռենու ճյուղը, որ դրանով Մուրադի ճաշը եփի: Գետափին լարվածությունը մեծացավ, սպառնալիքներ տեղալով, Մռթոն արդեն ետ էր վերադառնում և հենց ելավ ջրից՝ վրա քշեց նրան: Հարվածը դիպավ ուսին և այրող ցավ պատճառեց, բայց երկրորդը մնաց օդում՝ Մուրադը բռնեց նրա դաստակը, փորձում էր ուլորել: Հետո... գիրկընդխառն ընկան և իրար ոտք, մեջք ու թև էին ծռում: Մուրադից պոկ գալով, Մռթոն չորեքթաթ հասավ մի որձաքարի, մտքով անցել էր՝ քիթ ու բերանը մեկ անել, նրա կյանքին վերջ տալ: Քարը գիրկն առած շրջվեց, բայց Մուրադը պառկած տեղից մեկ էլ քացով տվեց փորին, և նա քարի հետ ծանր-ծանր նորից ընկավ ջուրը...

Հիմա աղիքներում զարթնել էր այդ հին ցավը, այնքան իրական, որ նա կուչ եկավ թամբին, կարծես Մուրադը հենց նոր էր խփել: Աչքերի առջև կանգնեցին տղաները, գծագրվեց ամբողջ գետահովիտը, բայց՝ մշուշների մեջ ու բավականչափ ձևափոխված: Երձեք էր, թե՛ իրականություն: Տավի, մշուշների, երազի մեջ նա լսեց Բուլանի խռպոտ վրնջոցը: Թվում էր՝ ձայնը գալիս է հեռուներից, կարծես ուրիշ ձի էր, օտար ձի: Եվ նա, վերջին րոպեների ընթացքում արդեն քանիերորդ անգամ, խարազանեց ձիու կուրծքը, ազդրերը, փորը՝ ուր որ մտրակի շիկացած ու թունոտ ուլորքները հասնում էին...

Ուռենու ճյուղը գետնին էր: Մուրադը վերցրեց, մեկ ուզեց ազդրին ծռելով կոտրել, բայց չկոտրեց ու շարտեց գետը: «Դե, հիմա գնա բեր»: Մռթոն նույնիսկ շուռ չեկավ տեսնելու, թե որտեղ է ճյուղն ընկել, գետաբերանի քարերին կպած՝ նա շունչը հազիվ տեղն էր գցում:

«Բեր...», — հենց որ նա ջրից ելավ գոռաց Մուրադը և նրան ետ հրեց:

«Դե, գնա...», — ոտքով զարկեց Մռթոյի կրծքին, և նա յորրորդ անգամ ընկավ գետը:

Ջրից դուրս էր սողում թե չէ՝ Մուրադը մեկ-երկու հարվածով նրան ետ էր շարտում: Մռթոն սկսեց բխկբխկալ: Վերջապես, ծանր շնչելով կանգնեց ափին, մի պահ չգիտեր ինչ անել, ապա լուռ ու դանդաղ հեռացավ: Գնում էր ծեծված շան նման և ստեպ-ստեպ նայում էր ետ, մինչև որ չքվեց գետախորշի թավուտներում...

Մռթոն իրեն հայիոյեց այն բանի համար, որ գլխից հանել էր այդքան կարևոր մի դեպք: Սրտի հուզմունքները հասել էին դեմքին. արյունը աչքերն էր կոխել, շրթունքները դողդողում էին, յուրաքանչյուր մկան արտահայտում էր աշխարհում ամեն ինչ ուրանալու վճռականությունը:

Արևը ահագին ճանապարհ էր անցել: Լեռնահովիտներում ստվերները կարճացել էին: Հողը աստիճանաբար քերմանում էր: Մարգագետիններից ցողերը ելնում էին վեր և անհետանում երկնքի կապույտում:

Հանկարծ Մռթոն վախեցավ. օրն արդեն կես էր լինում, յլինի՞ Մուրադը դուրս գա այդ տնից, աներևութանա...

Նա նորից ու նորից խփեց ձիուն: Բուլանը ձգել-

երկարացրել էր վիզը, գլուխը բարձր ու փոքր-ինչ թեք, իսկ բերանը՝ ծայրաստիճան բացազատ. նա արդեն ճչում էր, բայց ճիչ չկար, վրնջյունն չկար, նրա ամբողջ մարմինը համապարփակ լռություն էր՝ ոսկեփայլ մշուշում լողացող դաշտերի ու լեռների մեծ, ահագո՞ւ, խորհրդավոր լռության մասը:

Վերջապես գյուղը երևաց: Մի քանի րոպեից նրանք հասան առաջին տանը: Ծառերը ծաղկել էին, խոխոջում էր առուն: Իսկ հյուղակները խոլ էին ու համր: Երեկ Մռթոն չէր զգացել այդ խոլ-համրության ամբողջ ծանրությունը: Հիմա մարմինը փշաքաղվեց: Դա արդեն նոր վախ էր. թվում էր՝ լռությունը իրեն տանում է մահվան ցուրտ ու խավար գիրկը, որտեղից վերադարձի ոչ մի ճանապարհ չկա:

Մռթոն ձգեց սանձերը և, չսպասելով, որ Բուլանը կանգ առնի՝ ցած թռավ:

Քիչ հետո տեղ հասան նաև մյուսները:

Մռթոն մտրակով լռելյայն ցույց տվեց միայնակ խրճիթը, և դեմքը այդքան գունատ երբեք չէր եղել:

— Տունը շրջապատեք, — հրամայեց Նազիմը, — պիտի ողջ-ողջ բռնենք:

— Այստեղ, տան ուղիղ ետևում անդունդն է, — դողացող ձայնով բացատրեց Մռթոն, — նա փախուստի ոչ մի ճանապարհ չունի:

— Ասա...

— Ի՞նչ...

— Ասա թող դուրս գա, հանձնի զենքը, մենք բարի նպատակով ենք եկել, — դեմքին խորամանկ մի ժպիտ

յրոշմելով, տասնապետը ցուցամատով սղալեց բեղը, — ասա Մեմտուհի Մալթան մեծահոգի է, եկել ենք հաշտվելու, մենք գլխի վրա ենք պահում իսկական հերոսներին... Հասկաց՛ւր:

— Շատ լավ հասկացա, — Մռթոն ծուռ ժպտաց, որը և վախ էր արտահայտում, և հնազանդություն:

Նազիմը ձեռքի կտրուկ շարժումով նրան հրամայեց՝ մոտենալ խրճիթին:

Թուրքերը շոշափեցին հրացաններն ու յաթաղանները:

Մռթոն դանդաղ, զգուշորեն առաջ գնաց և ծաղկած խնձորենու տակ կանգ առավ: Երեկ գիշեր նա հասել է մինչև այդ ծառը... Հիմա նա ահաբեկվեց, որ մեն-մենակ եղել է Մուրադին այդքան մոտիկ:

— Է՛յ...

Վախից էր, թե՛ հուզմունքից՝ Մռթոյի ձայնը խզվեց: Աչքերը կամաց գնացին խրճիթի պատով, թեքվեցին, հասան ձորաբերանին, ապառաժներից կառչած՝ մտքով իջան ձորի հատակն ու բարձրացան, պտտվեցին տան շուրջը, եկան ետ, մի պահ կանգ առան ավեր գոմի մոտ, հետո մոտեցան ու քսվեցին անհանգիստ, սպասումից չարացած զինվորներին, քայլեցին ավելի հեռու և ներքև՝ դեպի կանաչ մարգագետինը, ուր ազատ արձակված, հոգնատանջ ձիերի երամակն էր: Մռթոյի աչքերը նույն ճանապարհով ետ-ետ եկան և դարձյալ կանգնեցին խրճիթի պատին, որտեղ ծանրկեկ մի դուռ կար՝ ճկիկը վրան, և երկու նեղլիկ լուսամուտ: Լուսամուտների ապակիները մաքուր էին, նույնիսկ պսպղուն: Նրա աչքերը ճեղք գտան, մտքի թելերով ներս գնացին և սենյակի կիսամթում նշմարեցին նրան:

— Է՛յ... Մուրճ...

Մեռելային լուսությունն իջավ ամեն ինչի վրա՝ մարդկանց, խրճիթի, որ այդ պահին ավելի խեղճ ու միայնակ էր թվում, ծաղկած ծառերի: Ապա մեղմ շնկշնկոց լսվեց. զեփյուռն էր խաղում ծառերի մատների հետ: Խնձորենուց մի ծաղկաթերթիկ պոկ եկավ և դողդողաց օդի մեջ:

Մռթոն մի քանի քայլ էլ առաջ գնաց, գլուխը շրջելով հանդիպեց Նազիմի լուրջ ու խոժոռ հայացքին, և այն վայրկյանին, երբ աչքերը նորից դարձան տանը, նրան թվաց, թե դռան փեղկը թեթևակի շարժվում է, նույնիսկ ականջին ինչ-որ չխկոց հասավ կարծես մեկը ներսից դուռը լինգով փակեց:

— Մուրճ... Լսում ես... Է՛յ... դուրս արի, — գոռաց Մռթոն: — Ես գիտեմ, այդտեղ ես, դուրս արի, հո շուն ու գայլ չենք, ինչի՞ց ես ահ քաշում... դուրս արի մի քիչ խոսք ու զրույց անենք...

Նա որոնում էր «մեծահոգի» բառը, որով Նազիմը քիչ առաջ բնորոշել էր Երզնկայի կառավարիչ Մեմտուհ Մալթային, բայց չէր գտնում՝ մեկ մոտենում էր, մեկ էլ հեռանում, և հիշողության այդ լարումը նեղում-չարչարում էր նրա մարմինը: Վերջապես մի բառ նրա հիշողության խորքից եկավ ու կանգնեց լեզվի ծայրին, կարծես հենց այդ բառն էր.

— Տասնապետ Նազիմը բարի է, լսում ես, դուրս արի... տասնապետ Նազիմի հոգին մեծ է... մեծ...

Մռթոյին թվաց, թե մի ամբողջ ժամ անդադար խոսել է ու բղավել: Շունչը կտրվում էր: Նայեց ետ: Նազիմի դեմքը

գոհունակություն էր արտահայտում: Մռթոն խորը շունչ քաշեց և նորից գոռաց.

— Մուրահ... է՛յ... գոնե մի ձայն հանիր... Մուրահ...

Նազիմը հավանության նշան արեց գլխով, որից Մռթոն սրտապնդվեց:

— Փաշաները, լսո՛ւմ ես, ներել են բուլորին... մարդասպաններին, թալանչիներին... հասկացա՞ր... ներել են .. ներե՛լ... թալանչիներին, ով անասուն է ալան-թալան արել, հարստություն, տուն-տեղ... է՛յ... մարդասպաններին էլ. . կյանք ու արև փաշաներին... երկար կյանք... ներել են... կյանք ու արև փաշաներին... ներել են... ներել են... ներել են... Շատ երկար կյանք ու արև...

Մռթոյի ձայնը կրկին խզվեց, բայց այս անգամ վախը չէր պատճառը: Մի պահ ինքն էլ հավատաց, թե իշխանությունը հանցագործներին ներելու կարգադրություն է արել, և ուրախությունից կարծես շունչը կանգ առավ:

Շարունակելով նայել խրճիթին, Մռթոն մտածեց, որ սխալ է թույլ տվել, սակայն չգիտեր՝ որտեղ և ինչ: Հետո այդ միտքն ուժով հեռացրեց իրենից: Երբ մտածմունքը, ասես խրճիթի պատին զարկվելով, նորից եկավ և դողացրեց նրա մարմինը, նա պարզորոշ լսեց լռության ձայնը: Դա զարհուրելի ձայն էր. թվում էր՝ միլիոնավոր կատաղած շներ ուզում են վնգստալ, բայց չեն կարողանում և դառնում են ավելի արյունարբու: Նա դանդաղ, զգուշորեն շրջվեց և տեսավ, որ թուրքերի աչք-ունքից ժանգեր են կախվել:

— Արև... կյանք... փաշաներին... — ժպտալով գույնը թոցրեց Մռթոն:

Կարծես արձաններ էին: Մռթոն, չգիտես ինչու, հաշվեց նրանց և մեկ անգամ ևս համոզվեց, որ տասնհինգ հոգի են: Նա փորձեց մի նոր ժպիտ խաղացնել դեմքին, բայց միայն վերին շրթունքը ցնցվեց: Թվում էր՝ արձանները հրամայում են սև աշխարհ գնալ: Նա այնքան էր ուզում ապրել, որ պատրաստ էր ոչ միայն Մուրադին այդ տասնհինգ մարդկանց հանձնել, այլև լեռներն ու երկինքը՝ ամեն-ամեն ինչ, որ արևի տակ աշխարհ են կազմում:

— Ո՛ր է Մուրադը:

Մռթոն ասես սարսափելի մի երագի մեջ էր ու հանկարծ ուշքի եկավ: Տասնապետ Նազիմի ձայնն էր: Իրենց դեմքի գծերով նույնն էին հարցնում նաև մնացածները՝ «Ո՛ր է Մուրադը»:

— Մուրադը չկա, — Նազիմը ետադարձ հայացքով տեսավ իրենց անցած ամբողջ ճանապարհը՝ խորդուբորդությունները, փոշին, որ շաղախվում էր իրենց ու ձիերի քրտինքին, քարերը... և նոր միայն զգաց, թե որքան է հոգնել: — Տանը մարդ չկա, ոչ ոք:

Բառերը հնչեցին ծանր մեղադրանքի նման: Մռթոն ահուսարսափով միտք արեց, որ գուցե տանը, իրոք, մարդ արարած չկա, և անմիջապես էլ պատկերացրեց դրա հետևանքը... Թուրքերը իրեն չեն ների... և արյունով, նյարդերով, աչքերով, սրտով հավատաց, թե Մուրադը այնտեղ է... ինքը կարող է բռնել նրան, կարող է սպանել... Նրա ամբողջ մարմինը զգաց հույսի շարժումը, որ մեկ արագանում էր, մեկ էլ դանդաղում՝ դառնալով գրեթե ոչինչ:

— Նա տանն է... Երեկ գիշեր եմ տեսել... Նա վիրավոր էր,

հազիվ էր քայլ անում... Իմ այս աչքերով եմ տեսել, այս աչքերով... Նա չի կարող ճղել, ո՛րք պիտի գնա, ոչ մի տեղ էլ չի կարող գնալ...

Մռթոն ոտքերի ու ձեռքերի ջղաձիգ շարժումներով փորձում էր ամրապնդել իր խոսքի հավաստիությունը: Հետո էլ ավելի մոտեցավ խրճիթին և այնքան էր հուզված, որ արդեն ուշադրություն չդարձրեց շատ է առաջ գնացել, թե՛ քիչ:

— Է՛յ, հիմա՛ էլ ես քո վատությունը անում, ուզում ես սրանք ինձ ջարդեն, քիթ ու բերանս մեկ անեն, հա՛... Մուրադ... Տնից դուրս արի, է... Քեզ փրկություն չկա, ոչ մի փրկություն... Թե ուզում ես կյանքդ մի օրով երկարի՝ մինչև կախաղանդ, սուսուփուս դուրս արի տնից, լսո՛ւմ ես, թե չէ տունը հիմա կրակի կտամ: Քեզ կախելու են, լսո՛ւմ ես, քեզ դա էլ քիչ է, ցից են հանելու... Դուռը բաց արա, դուրս արի... Հիմա տունը կվառեմ, մոխիրներից ոսկորների կհանեմ ու կտանեմ Մեմտուհի Մալթային... Է՛յ... սևացած ոսկորների, գանգո, սևացած գանգո, ոսկորների...

Խրճիթից կրակեցին: Մռթոն ընկավ գետնին, չոքեչոք արագ ետ քաշվեց և, հասնելով խնձորենուն, որտեղ իր հրացանն էր, պառկած դիրքից երկու գնդակ արձակեց տան վրա, հետո անմիջապես պահ մտավ բնի ետևը: Խրճիթից կրակեցին երկրորդ անգամ: Երկու դեպքում էլ նշան էին բռնել իրեն, և նրա մարմնով դող անցավ:

Նազիմը հրամայեց չկրակել, բայց անակնկալի եկած զինվորները, դիրքեր բռնելով, գնդակ գնդակի ետևից էին արձակում:

Պատուհանների բոլոր ապակիները փշրվեցին, իսկ



ծառերից սպիտակ ու կապույտ ծաղկաթերթեր ընկան ներքև:

— Նա այնտեղ է... է-էյ... Մուրադ... ասում էի, չէ, նա այնտեղ է, էյ... — չարանենգ հրճվանքով գոռաց Մռթոն և իրար ետևից երեք գնդակ արձակեց դեպի ծայրի պատուհանը, որտեղից, ըստ նրա ենթադրության, կրակել էին իր վրա: — Նա այնտեղ է, բա ո՛ր պիտի գնար, այնտեղ է... էյ... աղոթք արա... էյ... կաշիդ քերթելու եմ, տիկ եմ հանելու, տիկ... այնտեղ է...

— Չսպանեք, — իր հերթին բղավեց Նազիմը, — ողջ-առողջ պիտի հասցնենք երգնկա, Մեմտուհ Մալթան է այդպես ուզում:

Ծեր խնձորենու բնի տակ բերանքսիվայր պառկած Մռթոն ժպտում էր երանությունից, քիչ առաջվա մարմնական ծանր տագնապներն արդեն խաբկանք էին թվում՝ հեռավոր ու անիրական: Սիրտը ծիծաղեց, ոտքերի մկանները խթխթացին, մեջքը քոր եկավ: Նա ծոմռեց թիկունքը, որ քորն անցնի, և ախորժելի գրգիռ զգաց:

Երբ ամեն ինչ այդպես բարեհաջող էր դասավորվել՝ Մուրադը թակարդում էր, ինքը՝ ողջ և առողջ, թուրքերը՝ իրենից գոհ ու շնորհակալ, նա միայն այժմ նկատեց այն տեղը, ուր քիչ առաջ կանգնած՝ ճիգ ու ջանք էր թափում, որ Մուրադին տնից դուրս հանի: Դա բացազատ տեղ էր, խրճիթից հրացանի գնդակի մի հասողությունից շատ պակաս հեռավորության վրա: Մռթոն հասկացավ, թե ինքն ինչ փորձանքից է ազատվել, և ճակատը պատվեց՝ սառը քրտինքով: Մուրադի ձեռքը երբեք չի դողում, դիպուկ հրաձիգ է, դեռ տարիներ առաջ նրա գնդակը չէր վրիպում, իսկ հիմա, երևի, ավելի շեշտակի է

դարձել, ո՞նց տեղնուտեղը չի գնդակել իրեն... Անսահման էր Մռթոյի զարմանքն ու տարակույսը: Մի՞թե Մուրադի աչքերը այդ պահին պղտորվել էին, կամ դողացել էր ձեռքը, հրացանի նշանահատիկը՝ ծռվել... Նշանահատիկը ծռվել կարո՞ղ է, — մտքում հարցրեց նա և, պատասխան չգտնելով, ավելի ապշահար եղավ: Հետո դեմքը լուսավորվեց. բախտը բերել է, բախտը, աստված իր հետ է եղել...

Խրճիթից դարձյալ կրակեցին, և գնդակը կպավ խնձորենուն: Մռթոն վերջնականապես համոզվեց, որ Մուրադն ուզում է նախ և առաջ իր արևը սևացնել, բայց նրան ինչ-որ բան խանգարում է: Մռթոն նենգ ու ծաղրական քռքռաց, որ նրա երեք փորձից և ոչ մեկը նպատակին չի հասել: Նա զգուշորեն ոտքի ելավ և, կրակ մաղելով պատուհաններին, ծառից ետ քաշվեց դեպի թուրքերի դիրքը, որտեղ ավելի ապահով էր:

Արևը կիսել էր երկինքը: Հողից գաղջ խոնավություն էր բարձրանում, օդը թրթռում էր: Ինչ-որ տեղ ձկձկում էր արտուլյտը:

— Ի՞նչքան աչք պահենք, — ասաց առաջին թուրքը, — տունը կրակ գցենք՝ պրծնի գնա:

— Թող խորովվի կրակի մեջ, — ասաց երկրորդ թուրքը:

— Ճիշտ է, թող կաշիները պճպճան, միսը ծուխ անի, մնան ոսկորները, — ասաց երրորդ թուրքը:

— Աչքերը փորենք, լեզուն կտրենք, ականջները քյալփաթինով պոկենք, — ասաց չորրորդ թուրքը:

— Կաշին քերթենք, — ասաց հինգերորդ թուրքը, — կաշին քերթենք, չորացնենք, տանենք տանք փաշաներին:

— Չէ, իր հրացանի վրա ցցենք, — ասաց վեցերորդ թուրքը:

— Տկլորացնենք, իշամեղուներն ուտեն, — ասաց յոթերորդ թուրքը:

— Ծեծ ու ջարդ տանք մեռնի, աղիները թափենք, — ասաց ութերորդ թուրքը:

— Երկու ուժեղ ճյուղ կորացնենք, — ասաց իններորդ թուրքը, — ոտքերը կապ տանք ճյուղերին, հետո ճյուղերը բաց թողնենք, թող ճղվի, երկու կես լինի:

— Գցենք ձորը, քարշ տանք ձիու ետևից, ուղեղ-մուղեղը ցրիվ գա, ոտքերից կախենք թե՛ թոնրի մեջ, — ասաց տասներորդ թուրքը:

— Մեծ պղինձը սառը ջուր լցնենք, նրան ողջ-առողջ գցենք մեջը, դնենք կրակին, թող կամաց-կամաց եփվի, — ասաց տասնմեկերորդ թուրքը:

— Ձեռքերը կացնահարենք, նա երգ է սիրում, մենք արյուն, նրա արյունը խմենք, օխայ... — ասաց տասներկուերորդ թուրքը:

— Մազերը պոկոտենք, քիթը կտրենք, ձեռքերը ջարդենք, — ասաց տասներեքերորդ թուրքը, — ոտքերը ջարդենք, աչքերը փորենք-հանենք, լեզուն խանձենք:

— Ատամները մեկ-մեկ դուրս քաշենք, եղունգների տակ ասեղներ խոթենք, թող ցավերից գոռգոռա, գլուխը տանք քարին, ջարդենք վիզը, ոտքերով տափակեցնենք՝ հավասարվի հողին, — ասաց տասնչորսերորդ թուրքը:

Մի մեծ քարի ետևում դարանած՝ տասնապետ Նազիմը լուռ և աչքերը փակ լսեց այդ խոսքերը: Արտույտը դեռ

դալլալում էր: Դալլալը և մահավճիռները գարնանային ջինջ ու արևոտ օդում ասես խփվում էին իրար և սարսուռներ դարձած իջնում հողին: Նազիմի կոպերը դանդաղ բացվեցին, կանաչ աչքերի հայացքը սահեց զինվորների մարմիններով, գնաց ետ, հետո եկավ առաջ, էլի ետ գնաց և կանգ առավ տասնմեկերորդի վրա: Դա Խալիդն էր՝ միջահասակ, իր ցեղին հատուկ հավկթաձև գլխով, ամրակազմ մի արու, որ Անատոլիայի բորենիների ոհմակից էր, Եփրատի ափերին էր եղել, Տեր-Ջորում, և միայն վերջերս էր տեղափոխվել արևելյան հողեր: Տասնմեկերորդին Նազիմը, կկոցելով աչքերը, բերանի ծայրով թեթևակի ժպտաց:

— Կրկնում եմ, — նշան բռնելով ասաց նա, — պարտավոր ենք ողջ-ողջ տանել քաղաք, իսկ եթե ինքը չուզի, եթե համառի, եթե դիմադրի՝ կսպանենք:

Նազիմի հրացանը տրաքտրաքվեց: Պատուհանի երկաթե վանդակորմից ձգվող թոկի վրայի լաթը, որ երեխայի վարտիքի էր նման, վայր ընկավ:

Խրճիթից կրկին մի գնդակ սուրաց և, անցնելով դիրքերի վրայով, կպավ թիթեղե տաշտակին, որ ծուռումուռ ու ժանգոտ ընկած էր անցյալ տարվանից մնացած չոփ-չոր լոբածաղիկների մեջ: Քիչ անց լսվեց մի կրակահերթ՝ հինգ-վեց գնդակներ, փոքր ընդմիջումներով, ծակծկեցին օդը: Ըստ երևույթին, կրակում էին տարբեր կետերից: Այնուհետև մեկ-երկու րոպե լռություն եղավ: Նորից, բայց այս անգամ մեկ ուրիշ տեղ, ծվլաց արտուլտը, որ կրակոցների ժամանակ ձայնը քաշել էր: Լսվեց նոր կրակոց, և քիչ էր մնում գնդակը կպներ տասնապետի գլխին:

Տասնապետ Նազիմի հրացանից գնդակներ թռան դեպի խրճիթ: Նրա օրինակին հետևեցին մնացածները:

— Ինձ են ուզում խփել, ինձ, — մռչտաց Նազիմը և շարունակեց կրակել պատուհանների վրա: — Երևում է, նրանք շատ են:

— Շատ չեն, Մուրադը և երկու ֆիդայիներ, — ասաց Մռթոն, որ նրանից քիչ հեռու էր դիրք բռնել:

— Ի՞նչ գիտես:

— Գիշերն եմ հաշվել, երեկ գիշեր:

— Երեկ գիշեր երեկ գիշեր էր, իսկ այսօր այսօր է:

Հրացանները պայթում էին մեկը մյուսի ետևից կամ փոքր ու մեծ խմբերով: Խրճիթից ոչ մի գնդակ չէր գալիս: Վերջապես, թուրքերը դադարեցրին կրակը և լռելյայն նայեցին իրար:

— Սպանվեցին... — հարցրեց մեկը:

Ոչ ոք ձայն չհանեց:

Նորից լսվեց արտուլյտի գեղգեղանքը: Այժմ նա շատ հեռվում էր՝ մասրենիների մոտ, որոնք անվար, տեղ-տեղ կորեկի ծիւեր արձակած արտը բաժանում էին սարալանջի քարքարոտ տարածություններից:

— Սպանեցինք... — ասաց մեկ ուրիշը:

Նրանց աչքերում ուրախություն կար, ինչպես նաև մաղձոտ ափսոսանք, որ ֆիդայիները ազատվել են իրենց հոգու դատաստաններից: Նրանք ուզում էին, որ խրճիթից կրակոցներ լսվեն, թեկուզև իրենցից մեկը կամ մի քանիսը վիրավորվեն կամ նույնիսկ սպանվեն... բայց հակառակորդը կենդանության որևէ նշան ցույց չէր տալիս:

— Տեսք սպանվել են, — կարգադրեց Նազիմը և արմունկներով կռթնեց քարին: — Երևում է սպանել ենք:

Մի քանի զինվորներ տարբեր կողմերից սողեսող մոտեցան խրճիթին: Հաստապինդ դուռը ներսից փակ էր:

— Այնտեղ զարհուրելի ձոր է, — գոռաց մեկը:

— Ելումուտի ուրիշ ճանապարհ չկա, միայն այս դուռն է, — հայտնեց մեկ ուրիշը, որ հասցրել էր տան դրսի բուրբ ծակուծուկերն ուսումնասիրել:

— Պատուհանից նայեք, պատուհանից:

— Մեկ էլ տեսար խփեցին:

— Կամ մեռած են, կամ էլ ողջ:

— Իհարկե, հաստագուլխ, — փնթփնթաց Նազիմը, — եթե մեռած չեն՝ ուրեմն ողջ են, իսկ եթե ողջ են՝ ուրեմն մեռած չեն, — և թունդ հայհոյեց:

Արևը սկսեց շարժվել դեպի հորիզոնը: Դաշտերում և լեռներում ոսկե մշուշը խտացավ: Հանկարծ, մեկ այս կողմում, մեկ այնտեղ, մշուշը ցրվում էր, ոսկե վարագույրի ծայրը ասես գնում էտ, և երևում էր կապույտ երկիրը:

Նազիմը հազաց ու ծիծաղեց: Ծիծաղում էր ու հազում: Հազն ու ծիծաղը տակնուվրա էին անում նրա կուրծքը և թափվում բերանից, աչքերից, քթից: Վերջապես, տաք ու կարմիր ճակնդեղի նման իր դեմքը նա դարձրեց Մռթոյին: Ծիծաղի ու հազի փոխարեն՝ դեմքին աստիճանաբար դրոշմվում էր ինչ-որ օձություն: Նկատելով օձային այդ գծերը, որ ստվերի պես դանդաղ ու զգուշորեն քսվում էին իրար, Մռթոյի մարմնով դող անցավ, և ճակատին քրտինքի կաթիլները սառեցին:

— Գնա դուռը ջարդիր, — ասաց տասնապետը նրան:

Մռթոն կռացած վազեց դեպի խրճիթը և, ուսը դռանը դեմ տալով, սկսեց հրել: Նրան միացան չորս թուրքեր: Դուռը ճռճռաց, բայց չբացվեց նույնիսկ այն բանից հետո, երբ նկատելիորեն գնաց ներս: Այդ վայրկյանին հենց գոյացած ձեղքից մովս ու կրակ թռավ:

Բոլորը փախան ետ:

Փոխհրաձգությունը վերսկսվեց:

Գնդակների կարկուտը խրվում էր դռան հաստ տախտակների մեջ: Քիչ անց խրճիթից արդեն չէին կրակում:

Արտույտի երգը լռությունն ավելի բացարձակ դարձրեց: Պայծառ ու ընդարձակ լռություն էր: Երգի ելևէջները հողից դուրս եկած ծիլերի նման էին:

— Հը... — Մռթոյին նայելով նեղսրտեց Նազիմը:

— Ի՞նչ...

— Ծտի ձայնը կտրիր, — ասաց նա:

Մռթոն արագ քայլեց դեպի ձայնը, կանգ առավ, հետո զգուշորեն առաջ գնաց ու, մասրենիներին չհասած, կրակեց: Օդում մոլորված նրա հայացքից բոլորը հասկացան, որ վրիպել է:

Այժմ արտուտիկը խրճիթի առջև, սանդի վրա էր: Իր ձայնի պես նազելի, գույնզգույն մի թռչնակ էր, փոքրիկ-փոքրիկ, ինչպես խաղալիքը, և անհավատալի էր, որ նրա մեջ շունչ կա, կան այն բոլոր բաները, որոնք հարկավոր են ապրելու համար:

Տասնվեց հրացանների փողերն ուղղվեցին այնտեղ: Արտույտը ճռվողում էր: Հանկարծ զեփյուռը քսվեց նրա

փետուրներին, և նա, համազարկից ակնթարթ առաջ, թռավ: Ձգաններն արդեն ետ էին քաշվել, շիկացած գնդակները կպան սանդիկն և ցաք ու ցրիվ եղան:

Թուրքերը հայիոյեցին խրճիթում պատսպարված հայերին, կարծես նրանք էին այդ անհաջողության մեղավորները, իսկ երբ արտույտի անհոգ ու զվարթ ձայնը եկավ ձորի կողմերից, ու բուլորը մի ավելորդ անգամ համոզվեցին, որ նա կենդանի է, նույնիսկ չի էլ վիրավորվել, հայերի նկատմամբ նրանց արյունարբու կատաղությունը ավելի բորբոքվեց:

— Տունը կրակ գցենք, ո՞ւմ ենք սպասում:

— Արևը իջնում է, շուտով մութ կլինի:

— Է՛յ, Մուրադ, լավ է քո ոտքով դուրս գաս... Է՛յ... Լսո՞ւմ ես... թե չէ մոխիրդ դուրս կհանենք, — գոռաց Մռթոն:

— Տան հետ թող վառվի, դրանից էլ լավ պատիժ:

— Մեմտուհ Մալթալին կասենք մութն ընկնում էր, տունը կրակ տվինք, սրանք էլ, ահա, մոխիրներն ու ոսկորները:

Բուլորը լռեցին, որովհետև տասնապետ Նազիմը ոչինչ չասաց, նույնիսկ չնայեց նրանց վրա:

Ուշադիր աչքը նրա քունքին կարող էր տեսնել, թե ինչպես է աշխատում զարկերակը: Դա արյան հասարակ շարժում չէր, այլ մի խփխփոց, որ առաջանում է լարված մտածմունքից: Նրա գլխում խճճվել էին բազմաթիվ հարցերի թելեր. ո՞վ է «հայ»-ը, Մռթոն ինչո՞ւ է դավաճանում իր հայրենակիցներին, ի՞նչ բան է, վերջի վերջո, կոտորածը, ի՞նչ է դավաճանությունը... իսկ հայրենասիրությունը, խի՞ղճը... դավաճանին ինչպե՞ս են պատժում, թե նա մնում է անպատիժ,



ինչ է պատերազմը, ինչ է սերը... Դրանցից և ոչ մեկի պատասխանը չգտնելով, նա լուռ ու մունջ տառապում էր: Նույնիսկ չգիտեր՝ ո՞ր սերն է ելք որոնում իր մեջ՝ կնոջ նկատմամբ սերը, հայրենիքի, թե՛ բնության: Հարցերը այնպես էին եփվում, որ գլուխը ցավում էր, պտույտ գալիս, և աչքերը, ցավից, թե՛ կատաղությունից, պղտորվում էին:

Կարելի էր ենթադրել, թե տասնապետի հոգում շարժվում է խիղճը կամ նման մի բան, բայց դա բոլորովին էլ այդպես չէր: Մանկության օրերին, ձմռան գիշերները նա գողեգող բարձրանում էր ծառերի վրա և հավաքում քնած ճնճղուկներին, հետո ցուցամատով ու միջնամատով պոկում գլուխները: Ճնճղուկներին նա փետրում էր, քաշում շշին ու խորովում: Իսկ այժմ՝ կոտորածների ու թալանի ժամանակ, մարդկային ամենածանր տառապանքներին անգամ նա նայում էր սառն ու անտարբեր, կարծես ապակե աչքերով: Միայն մի բան կար Նազիմի ներսում՝ մտածելու հատկությունը, որով նա տարբերվում էր իր շատ ազգակիցներից: Նա մտածում էր, դատողություններ անում, և դա գնահատվեց. զորակոչվելուց կարճ ժամանակ հետո՝ նա արդեն տասնապետ էր: Այդ բարձրացման մասին նա նամակով հայտնեց հորը և նրանից բավականին տարօրինակ պատասխան ստացավ: Հայրը գրում էր, որ ինքը գերադասում է հողագործությունը, քան՝ ծառայել բանակում, որ լավ կլինի Նազիմը շուտ գա տուն և իրեն թե ու թիկունք դառնա: Նազիմը երկրորդ նամակն ուղարկեց. նախանձում էր փաշաներին, ուզում նրանց ճանապարհով գնալ, այդպես էլ գրել էր՝ «նրանց ճանապարհով, դեպի վերև»:

Հիշեց Նազիմն այդ նամակները, — դժվար է ասել, — սակայն նրա ներսում խլրտաց ինչ-որ բան: Դա հոր կարոտն էր, որ նա զգաց, բայց չգիտակցեց:

Վերջապես, իրեն տանջող հարցերի կծիկը նա հանեց գլխից: Իսկապես, ինչու տունը չվառենք, — արդեն մտածում էր նա, — վառենք, քանի դեռ մեզանից որևէ մեկը չի խփվել:

Հանկարծ լսվեց լացաձայն մլավոց:

— Կատո՛ւն, — բղավեցին այս ու այն կողմից:

Մեծ ու բրդոտ մի կատու էր կուչ եկել խրճիթի դռան վերևի քիվին:

— Թողեք, — գոռաց Նազիմը, — ես եմ խփելու...

Նա այնպես հանգամանորեն, ատամները կրճտացնելով էր նշան բռնում, կարծես ուզում էր սպանել ոչ միայն կատվին, այլև արտույտին, որի նվագը ձորից հասնում էր նրանց, այլև Մուրադին, նրա ընկերներին, ազգակիցներին, կարծես ուզում էր ամբողջ Արևմտյան Հայաստանը մի տրաքոցով մաքրել հայերից ու բուսական, կենդանական աշխարհից, այո, նաև բուսական, որովհետև հանկարծ նա ասեց խնձորենիների ծաղկած գեղեցկությունը, զգաց, որ դա գեղեցիկ է, և բարկացավ: Վերջապես կրակեց: Կատուն ցավից ոլոր-մոլոր եղավ և, հասնելով քիվի եզրին, թրմփաց դռան առջև: Գետնին նա մի քանի ջղաձիգ շարժումներ էլ արեց ու, տնկելով ոտքերը, կողքի վրա անշնչացավ:

Հաղթական բացականչություններին հետևեց լռությունը: Բոլորը գիտակցեցին, որ այդտեղ գալու իրենց նպատակը կատվին սպանելը չէր, և դա նրանց մեջ նյարդային նոր շարժում առաջ բերեց:

Խրճիթն էր, կատվի դիակը, Նազիմն իր գինվորներով ու Մռթոն:

Արտուկյտի երգն այլևս չէր լսվում: Գուցե նա ձորի խորքերում էր, որտեղով հոսում էր լեռնային ձյուններից ծնվող Ջմրուխտ գետակը:

Եվ այդ պահին կատարվեց տարօրինակ, կարելի է ասել՝ խորհրդավոր մի բան. կատուն չէր շարժվում, շունչը փչել էր, բայց չափազանց պարզորոշ, նույնիսկ ավելի լեցուն ու ամբողջական հնչեղությամբ լսվեց քիչ առաջվա լացաձայն մլավոցը: Բոլորը տարակուսանքով իրար նայեցին:

— Վառել... — կիսապառկած դիրքում՝ ձեռքը դեպի խրճիթը մեկնելով, հանկարծ բղավեց Նազիմը: — Վառեք...

Խանդավառված, գոռում-գոչումով նրանք սկսեցին չոր ձյուղեր, այստեղ-այնտեղ թափթփված անցյալ տարվա խոտը տեղափոխել խրճիթի կողքերն ու ետևը՝ պատերի տակ:

— Շո՛ւտ, շո՛ւտ... արևը գնում է, ահագին ճանապարհ ենք կտրելու, — գոռգոռում էր Նազիմը:

Արևի շողերն արդեն ծակծկում էին լեռների գագաթները: Լեռնոտ հորիզոնը կարծես ուղտերի քարավան էր՝ արևի մեծ ու հրաշեկ գունդը մեջքին: Հիմա լեռները կապույտի ու ոսկու երանգներով էին ներկված:

Մի քանիսը վազեցին մոտակա ամալի տները՝ վառելիքի նոր խրճեր բերելու:

Ամեն ինչ պատրաստ էր. խրճիթը երեք կողմից շրջապատված էր չոր խոտով ու ձյուղերով, թիթեղե տաշտակում բորբոքվում էր կրակը, որ պիտի մոտեցնեին վառելիքին:

Այդ ժամանակ ինչ-որ բան չրիսկաց, ապա խրճիթի դուռը

անսպասելիորեն բացվեց: Դռան բացվածքում ոչ ոք չկար:  
Երեկոյան քամին կպավ դռանը, և այն ճռռալով ավելի ներս  
գնաց:

Բոլորի թուրքը չորացավ: Կախարդվածների նման  
անշարժացան իրենց տեղերում:

Տասնապետ Նազիմը կրակեց դռանը, ստուգելու՝ մուրթ  
բացվածքում մարդ կ'ա, թե ոչ:

Կրակոցից թուրքերը սթափվեցին և մեկ անգամ ևս պարզ  
տեսան, որ դուռը բաց է: Եվ մռնչյուններով խուժեցին ներս:

Մի պահ Մռթոն այգում մենակ մնաց: Ասես մոլորվել էր:  
Հետո հոգնած, ինչ-որ թախիծ կրծքում, դանդաղ քայլեց դեպի  
խրճիթը:

Մտնելով սենյակ, Մռթոն ամբողջ մարմնով ցնցվեց:  
Թախտին կուչ էր եկել Մարիամը և երեխային ծիծ էր տալիս:  
Մռթոյի հոգում վայրկենապես կենդանացավ Մարիամի հան-  
դեպ իր հին ու հեռավոր զգացմունքը, և դա այնքան մրմռալի  
էր, կարծես աղ լցրին բացված վերքի վրա:

— Ուր է Մուրադը, — հարցրեց Նազիմը, որ մի պահ  
նույնպես շփոթվել էր:

Մարիամը չպատասխանեց: Երեխային ամուր սեղմել էր  
կրծքին և դողում էր:

— Բոլոր ծակուծուկերը ստուգեք, — կարգադրեց Նազիմը:

Սենյակը բավականին ընդարձակ էր: Անկյունում մեկ  
ոտք բարձրությամբ սեղան կար՝ վրան փայտե գդալներ,  
պղնձե մի բաժակ՝ մանուշակներով, երեք կավե աման,  
որոնցում թանապուր էր եղել: Թարեքի վերին դարակները  
դատարկ էին, իսկ ցածի լայն մասում կային երկու կուժ և երեք

կաթսա: Վեցհարվածյան հրացանը, որով մի քանի ժամ շարունակ կրակել էին, իբրև մի անպետք իր ընկած էր գետնին՝ սենյակի մեջտեղը: Ծալքում՝ պատի մեկ այլ խորշում, խցկված էր մեկ-երկու ձեռք անկողին: Առաստաղի գերանից կախված էր ճոճը, որ թեթևակի օրորվում էր: Միջանցքի տախտակե հատակի տակ նկուղն էր, բայց այն թաքստոց չուներ և ոչ էլ փախուստի որևէ անցք:

— Ո՛ւր է Մուրադը, — արդեն փրփրած կրկնեց Նազիմն իր հարցը: — Ո՛ւր է:

— Մուրա՛դը... Մուրադը գնաց ձեր գալուց քիչ առաջ... նրանք գնացին:

— Դու նրա հինչն ես:

— Կինը:

— Ո՛վ էր կրակում մեզ վրա...

— Ես, — շարունակելով դողացնել, ասաց Մարիամը:

Թուրքերն իրար երեսի նայեցին: Անսահման էր նրանց ապշանքն ու շփոթմունքը:

— Մեզ էջի տեղ է դնում, — այս ու այն կողմից վրա տվին նրանք:

— Սրանո՞վ էիր կրակում:

Մարիամը դրականորեն շարժեց գլուխը:

— Շարունակեիր կրակել, — նենգ ժպիտ խաղացնելով դեմքին, ասաց Նազիմը: — Շարունակեիր, ինչի՞ չշարունակեցիր, շարունակեիր, — բարկությունից աչքերը խոշորացան: — Կարող է, ով գիտե, մեկ էլ տեսար, գնդակը կպներ, սպաներ մեկնումեկիս, — և նա այնպես վայրագորեն ծիծաղեց, որ նույնիսկ թուրքերը սարսռացին:



— Փամփուշտները վերջացան, — ասաց Մարիամը:

— Դուռը բացեցիր, որովհետև էլ փամփուշտ չկար, բացեցիր, որ ներենք:

— Չէ, — ասաց Մարիամը: — Դուք ուզում էիք տունը վառել, ես տեսա: Սա իմ ծնողների տունն է, նրանք են շինել: Ես չեմ ուզում տունը վառվի: Ինձ սպանեք, բայց տունը թող մնա:

— Ծնողներդ որտե՞ղ են:

— Նրանց սպանեցին:

— Առանց մարդ արարածի տունն ի՞նչ է պետք:

— Տո՛ւնը... Տունը մեզ կապում է հողին, — դողացող ձայնով ասաց Մարիամը:

— Կապում է հողին, — ծաղրաբար ասաց Նազիմը, շեշտելով «կապում» բառը: — Հետո ի՞նչ... — աչքերը արյունոտվեցին: — Առանց ժողովրդի ի՞նչ հող, ի՞նչ բան, — ասաց տասնապետը, զայրույթի շեշտն այս անգամ դնելով «հող»-ի և «բան»-ի վրա:

— Հողը հայրենիք է:

Տասնապետ Նազիմն ուզում էր գոռալ՝ շան քած, բայց վերջին ակնթարթին խոսքը կուլ տվեց, որովհետև ապշած էր կնոջ զգացմունքներից ու նաև հիացած, ամոթ չէր իր համար՝ պատվազրկել նրան:

— Այստեղ մի փամփուշտ է մնացել, — հրացանի փամփուշտատուփը ակամա բացելով ասաց Նազիմը:

Մարիամի դեմքին երևաց ցավոտ մի ակնարկ: Մտածում էր, որ գուցե այդ փամփուշտը պիտի կատարեր իր ցանկությունը՝ սպաներ Մոթոյին: Նայեց նրան, որ միայնակ

կանգնել էր պատուհանի մոտ, և զգաց, որ սրտի կողմերից  
ինչ-որ հեկեկոց բարձրանում է դեպի կոկորդը:

Նազիմն էլ նայեց Մռթոյին:

Բոլորը նայեցին նրան:

— Շուտով ոչ մի հայ չի լինի, — Նազիմը ծլփացրեց  
լեզուն: — Տես, Մռթոն թրքացել է:

— Անտառ չկա, որ իր գայլը չունենա, — ասաց Մարիամը  
դողացնելով: — Ստոր մարդ, ստոր... ազգի դավաճան...

Որքան էլ Մռթոն գիտեր, որ ինքը դավաճան է, բայց և  
այնպես այդ բառերը սաստիկ խոցեցին նրան: Նա ձեռքը  
տարավ մեջկապին, որ դաշույնը քաշի, բայց տասնապետ  
Նազիմը նրան հայացքով սաստեց:

— Թրքությունն ընդունիր, — ասաց նա:

Մարիամը հեկեկաց:

— Աչքերդ թրքուիու աչքերի պես սիրուն են, թրքացիր,  
որ ապրես:

— Չէ:

Շրջվելով, Նազիմը հանդիպեց կնոջն ուղղված  
գինվորների վավաշոտ նայվածքներին, և իր արյունն էլ եփ  
եկավ:

— Կլինես մեր կնիկը... երեխաներ կծնես, լսո՛ւմ ես,  
երեխաներ կծնես մեզանից, շատ երեխաներ կծնես...

Նազիմը մոտ գնաց նրան:

Սրբիչը, որի տակ Մարիամը երեխային էր կերակրում,  
փոքր-ինչ տեղաշարժվել էր. Նազիմը տեսավ, թե ինչպես է  
երեխան մոր ծծակը բերանով քաշում, և մարմինը հուզվեց  
տռփոտության հեշտալի գրգիռներից:



— Դե... — նրա ձայնը դողաց:

Տեսնելով, թե Նազիմն ինչ ցանկություններ ունի, Մռթոն մոռացավ իր վիրավորանքը: Եթե նա Մարիամին մի քայլ էլ մոտենա, — ձեռքը դաշույնի կոթին՝ մտածում էր Մռթոն, — ես նրա աղիները կթափեմ: Մռթոյի ներսում շարժվեց այն հին-հինը, բայց այս անգամ ինչ արտակարգ բերկրանք էր ու քնքշություն: Նրան թվաց՝ հնարավոր չէ ապրել առանց Մարիամի, որ Մարիամի համար նույնիսկ կարող է մեռնել՝ թողնել արևը, լեռներն ու գետերը, բուսականությունը, ամեն-ամեն ինչ:

— Դե... — ասաց Նազիմը, հայացքը երեխայի բերանից չկտրելով:

— Մուրադի մազը չեմ փոխի բոլորիդ հետ, — հեծկտոցից խեղդվող ձայնով խոսեց Մարիամը: — Սպանեք, չեմ ուզում...

— Շան քնձ, — այնուամենայնիվ ասաց Նազիմը:

— Չեմ ուզում:

— Հիմա շան սատակ կանեմ...

Մռթոյի սիրտը գցեց, մկանները պրկվեցին: Սրբիչը աննկատելիորեն սահեց ներքև, մերկացնելով Մարիամի ծանր ու լիք կուրծքը: Երեխան ցնցվեց աղմուկից և, մոր ծծակը բաց թողնելով, ուլունք աչքերով ժպտուն նայեց Նազիմին: Կարմրոտ ծծակից մի քանի սպիտակ կաթիլներ ընկան: Երեխան չփչփացրեց բերանը և, ոչինչ չգտնելով, մլավելու պես լաց եղավ: Մարիամը նոր միայն տեսավ, որ սրբիչն ընկել է, շփոթվեց ու ամոթ զգաց և, երեխայի գլուխը դարձնելով իրեն, հապճեպ ծածկվեց:

— Չեմ ուզում քեզ սպանել, — ցանկամոլությունից Նազիմի աչքերը խոշորացան ու փայլփլեցին, — բայց կսպանեմ, տես, կսպանեմ, եթե հենց հիմա ազգդ չուրանաս:

— Սպանիր, — արցունքների միջից երկյուղած նայելով նրան, ասաց Մարիամը:

— Ո՞ւմ համար ես ապրում:

— Մերոնց:

— Ձերոնք չկան, վերջացել են:

— Սպանիր:

— Ո՞ւմ համար ես մարմինդ պահում, մարմինդ, մարմինդ...

— Սպանիր, — կրկնեց Մարիամը: — Մենք նորից աշխարհ կգանք: Հողից կծնվենք, հողը մեր մեծ մայրն է, ծաղկից, ամպրոպից, ջրից կծնվենք, աղբյուրներից... Միշտ այդպես է եղել, բարությունից կծնվենք, սիրելուց, քար, ջուր, մարդ սիրելուց... Սիրողի մարմինը կմեռնի, բայց ոչ հոգին:

Բուռն հեծկտուքից շնչակտուր՝ Մարիամը չիմացավ, թե ինչ ասաց. նրա շուրթերով հնչել էր իր նախնիների արյան ձայնը:

Նազիմը նյարդայնորեն շրջեց վեցհարվածյանի փակադակն ու հրեց առաջ, և վերջին փամփուշտը հայտնվեց կրակային դիրքում:

— Խնայիր, մարդ աստծո, — ճչաց Մարիամը, երեխային այնպես սեղմելով կրծքին, որ նա բարձր ու մեղք ձայնով լաց եղավ:

Դա ամենաիրական բանն էր, որ նա ասաց. նա այնպես ուզում էր ապրել:

— Ուրան՞ում ես, — զայրույթից կաս-կարմիր՝ հարցրեց Նազիմը, վեցհարվածյանի փողն ուղղելով նրան:

— Չեմ կարող... — թարգմանեցին նրա շուրթերը իր հոգու ամբողջ տառապանքը:

Նազիմը մատը ցուցադրաբար դրեց հրացանի ձգանին: Մռթոն, դաշույնը քաշելով, վրա վազեց նրան: Նազիմին թվաց, որ նա ուզում է, իրենից առաջ ընկնելով, Մարիամին խփել, և, օդում բռնելով դաշույնով ձեռքը, նրան նախ կանգնեցրեց, ապա և նողկանքով հրեց մի կողմ:

— Մռթո, — հևալով ասաց նա, — ի՞նչ ես ուզում այս խեղճից, Մռթո:

Նազիմին, իսկապես էլ, դուր չեկավ, որ նա փորձել էր իր ազգի կնոջն սպանել: Ինքն այդպիսի բան երբեք չէր անի: Լսվում էր միայն Մարիամի արդեն անուժ հեկեկոցը:

— Թող ապրի, — մի րոպե աչքերը կկոցած խորհելով, ասաց տասնապետ Նազիմը և վեցհարվածյանի կաշեփոկը քաշեց ուսին: — Վերադառնում ենք երգնկա:

Առաջինը սենյակից դուրս եկավ Մռթոն, որ մեռելի գույն ուներ: Նրան հետևեցին մնացածները: Նազիմը վերջինն էր. նա դուռը իր ետևից մինչև իսկ ծածկեց:

Ձիերը կուշտ կերել էին ու լավ հանգստացել:

Թուրքերը ձգեցին թամբակապերը և ճանապարհ ընկան:

Գյուղից դուրս գալով, Մռթոն ճիպոտով մեկ-երկու անգամ դաղեց ձիուն և բոլորից առաջ անցավ: Նա ուզում էր թուրքերին արագ հեռացնել այդ կողմերից:

Արևը մայր էր մտնում: Գունատ էր, կարծես տխուր ու

նեղացած: Թվում էր՝ ամբողջ օրը երկրի վրա հոգեհարազատություն է որոնել ու չի գտել:

— Տասնապետ, դու ջահել ես, չես հասկանում, — Նազիմի ետևից հասնելով, ասաց Խալիդը, — այն կնկան ու երեխին չի կարելի ողջ թողնել:

Նազիմը շրջվեց և քամահրանքով նայեց նրան:

— Չի կարելի, — կրկնեց Խալիդը: — Թույլ տուր գնամ մահը բերանները տամ:

Նրանց ձիերն արդեն կողք կողքի չափ գցեցին:

— Մի քիչ էլ այսպես գնանք, կիրամայեմ ձիերի գլուխները ետ դարձնել, — առանց Խալիդին նայելու՝ ասաց Նազիմը: — Մուրադը չի կարող տուն չգալ, այդպիսի կնկա հետ անկողին մտնելը գիտես ինչ քեֆ է, կամ էլ... կամ էլ կինը կառնի երեխին ու կգնա նրա մոտ, նրա ծոցը... նա գիտի մարդու տեղը... գիտի... աչքերը կապես էլ կգնա... Ամբողջ գիշերը գաղտնի հետևելու ենք դրան, պետք է նրանց հավաքել մի տեղ: Երեքին քո ուզած ձևով կպատժենք, մի մեծ պղինձ է պետք, մեծ-մեծ, միայն այդ ձևով...

— Ի՞նչ ձևով, — Խալիդն արդեն մոռացել էր իր սարսափելի առաջարկությունը:

Պատասխանելու փոխարեն՝ Նազիմը եռանդուն կերպով խթանեց ձիուն և նրա հարևանությունից պոկ եկավ:

Նա հետզհետե մեծացնում էր արագությունը: Շուտով անցավ իր առջևում գտնվող բոլոր թուրք հեծյալներից և Մռթոյի հետ մենակ մնաց տարածության ու ժամանակի մեջ: Նրա ձին հաճույքով էր ենթարկվում մտրակի հրամաններին:

Մռթոն չէր նաւում ետ: Նա գիտեր, որ թուրքերն այժմ

կույր-կույր հետևում են իրեն, և դա՛ այդպես հետևելը, նրա ներսում արթնացրել էր երանելի մի հանգստություն:

Նա էր, և իր այդ հանգստությունը, որ, մթնող օրվա սպանիչ լարվածությունից հետո, թվում էր՝ նրան Բուվանի չորս ոտքերով թռցնում էր դեպի երջանիկ վայրեր... Հեռավոր անտառներում հողի մեջ կիսով չափ թաղված մի մատուռ կա, ով գիտե որ ժամանակներից է գալիս, — հանկարծ հիշեց Մռթոն, — առավոտ դեռ լույսը չբացված դուրս կգամ քաղաքից ու կգնամ այնտեղ, մենակյաց կդառնամ, — ասաց նա մտքում, — կմաքրեմ մարմինս մեղքերից, կմոտենամ իմ մորը, կլինեմ այնպես, ինչպես ծնվել եմ... Նա թոքերի բոլոր ծալքերով ներշնչեց երեկոյի սառն ու կապույտ օդը և հիացած նայում էր քուն մտած գոգահովիտներին:

Մռթոյի և Նազիմի միջև ընկած ճանապարհի հատվածն արագորեն կրճատվում էր:

Նազիմն ուսից իջեցրեց վեցհարվածյանը և, երբ մնում էր մի քանի ձիաքայլ տեղ, փողը Մռթոյի թիկունքին ուղղելով՝ կրակեց:

Մռթոն սուր ճիչ արձակեց և, դանդաղ թեքվելով առաջ, ձեռքերով փաթաթվեց ձիու վզին: Շուտով ձախ ոտքը դուրս եկավ ասպանդակից: Աստիճանաբար կախ էր ընկնում: Իսկ քիչ հետո, աջը ասպանդակին կպած, նա քարշ եկավ ձիու փորի տակ:

Բուվանը դիվաշունչ խրխնջաց, վեր-վեր թռավ և, դուրս գալով ճանապարհից, խելագար թափով իրեն գցեց ժայռ ու քարի մեջ...

Մռթոյի վրա կրակելուց առաջ ինչ մտածեց տասնապետ Նազիմը: Ոչ ոք չի կարող ասել:



## ԵՐԲ ԵՍ ՄԵՌՆԵՄ, ՈՒՐԻՇՆԵՐԸ ԿԳԱՆ ՌՄ ՏԵՂԸ

ՄՈՒՇԵՂ ԳԱԼՇՈՅԱՆԻ հիշատակին

**Մ**ելքոն Տեր-Պերպերյանը մի քանի աննման, երանելի ժամեր անցկացրեց իր համերկրացի Ավետիսի տանը, որը հիվանդ պառկած էր անկողնում՝ մեջք ու գլխով բարձին հենված:

Տարիներ շարունակ նրանց ասել-խոսելու գլխավոր նյութը նույնն էր՝ լեռան ստորոտին փռված ծննդավայր Տաճրակը, ապա Երզնկան, որ հեռու չէր, մեկ-երկու ժամ էր հարկավոր ավանակով կամ ձիով նրան հասնելու համար, և Եփրատը,

որը ամբողջ տարին խաղաղորեն հոսում էր դաշտի միջով և միայն գարնանը հորդում ավերից՝ ողողելով ընդարձակ տարածություններ: Գալիս անցնում էին համաշխարհային պատերազմներն ու այլևայլ մեծ-մեծ երևույթներ, բայց նրանց չէին կաշում, թվում է՝ անցնում էին լուռ ու մունջ, առանց նրանց անհանգիստ անելու, և ինչպես կաշեին, երբ նրանք սրտով, աչքերով ու մտքով իրենց մանկության երկրում էին, կապույտ լեռնապարից այն կողմ: Ծննդավայրի բոլոր առարկաները՝ քար ու ծաղիկ, առու, այգի, մարդ, անասուն, աստղ ու գետին, փոքր ու նշանավոր ամեն բան նրանք արդեն հազար անգամ իրենց հոգում շուռ ու մուռ էին տվել, բայց միշտ հանդիպելիս՝ տանը, թե դրսում, նույնիսկ՝ հեռախոսով զրուցելիս, հիշում էին այդ ամենը կարծես առաջին անգամ, հայտնության պես, սխրանքի, հպարտության բացականչություններ էին ելնում նրանց կրծքից, տխրության ու ցավի ախ ու վախեր, կարոտի թառանչ, դեմքի խորշոմները շարժվում էին, բառը դողդողում էր, ու երբ աչքերը խոշորանում էին և լցվում մշուշով, նրանք (ասում էին՝ դա կատաղությունից է) լաց էին լինում:

Այդ օրը Մելքոն Տեր-Պերպերյանին քույր Մարթան սուրճ հրամցրեց, իսկ եղբորը՝ Ավետիսին՝ թեյ, որովհետև նրան, հիվանդության պատճառով, սուրճը խստիվ արգելված էր: Բայց հենց քույրը (նրանք ամուսնացած չէին, որբանոցից հետո նույն հարկի տակ էին ապրում) սենյակից մի պահ դուրս ելավ, Ավետիսը շնչալով աղերսեց.

– Գավաթդ տուր, մի պուտ առնեմ:

Տեր-Պերպերյանը, զգուշորեն դեպի կիսաբաց դուռը նայելով, սուրճի գավաթը մոտեցրեց Ավետիսի խռիվ, ալևոր բերլի տապ կուչ եկած բերանին և թույլ տվեց, որ նա երկրորդ կումն էլ անի և, մինչև իսկ, երրորդը:

— Մարթան սուրճը եփում է ճիշտ մեր մայրիկի նման, — Ավետիսը, սուրճի պատճառած հաճույքից, թե՛ անուշ հիշողության ազդեցությամբ, աչքերը գոցեց: — Նա էլ՝ մեր Հայկուհի մայրիկը, մեր մեծ մոր պես: Դու մեր մեծ մորը՝ Փամբուխ մեծ մայրիկին հիշո՞ւմ ես:

— Ինչպես չէ, — ասաց Մելքոն Տեր-Պերպերյանը: — Փամբուխ մեծ մայրիկը, հիմա էլ, ահավասիկ, աչքիս առջևն է, — նա ձեռքը մեկնեց սենյակի անկյունը, որտեղ մաշված կարպետով ծածկված հին մի բազկաթոռ կար, — ամեն օր, երբ մեր արևը իջնում էր Սեպուհ լեռան լանջին, ծեր ու փոքրին շուրջը ժողոված, նա սկսում էր պատմել Անահիտ Ոսկե Աստվածուհու հեքիաթը, մեջեմեջ էլ խաղ կանչում:

Տեր-Պերպերյանը գավազանին կռացած, հայացքը գետնին, դնդնաց. երգը եղանակ չուներ և ոչ էլ բառեր, բայց ծորում էր սրտից՝ տաք ու երազային:

— Դա Ոսկե Անահիտի երգը չէ, — նկատեց Ավետիսը:

— Մի՞թե...

— Ոսկե Անահիտը երգում էր այսպես, — Ավետիսը հազաց, խեղդվում էր, ինչ-որ ցավ ու ծանրություն ճնշում, քրքրում էին կուրծքը, հետո շունչը դանդաղ, դժվարությամբ հետ եկավ: — Գոհար վարդըն վառ առեալ ի վեհից վարսիցն արփենից, — հազը դարձյալ բռնեց նրա կոկորդը:



Մելքոն Տեր-Պերպերյանն ընկերոջ խոսքը շարունակեց.

— Ի վեր ի վերայ վարսիցն ծավալեր ծաղիկ ծովային:

— Մեր Փամբուխ մեծ մայրիկը նստած էր շեմին, կեսօր էր, արևը ծաղկեցնում էր ծառերը, այդ ժամանակ նրանք բակ մտան, — ասաց Ավետիսը: — Նրանք խլեցին մեր աննման Փամբուխ մեծ մայրիկի արծաթ գոտին, մի քանի մարդով, ոտ ու գլխից բռնած, քաշեցին ներս, վրան կողպեցին դուռ ու լուսամուտ և տունը կրակի մատնեցին: Ես ու Մարթան այգու խորքում էինք՝ մասրենու թփերի մոտ, իսկ ետևը, դու կհիշես, փոս է, որտեղ հաճախ թաքնվում էինք պահմտոցի խաղալիս, նրանք մեզ չտեսան, մենք շրջվեցինք և փախանք: Աստված մեզ կյանք տվեց, որ մեր քույրերին, հայրուձայրերին, եղբայրներին հիշենք: Տեր-Մելքոն, մեզանից հետո ղվ է Փամբուխ մեծ մայրիկին հիշելու:

Մելքոն Տեր-Պերպերյանը մտքի մեջ ընկավ:

— Գիրը, — ասաց նա:

— Գիրը...

— Գիրը մարդուց երկար է ապրում, նա հազար տարի իր մտքում կպահի մեծ մայրիկին:

Ավետիսը խաղաղվեց: Նորից փակել էր աչքերը: Կարծես սենյակում չէր: Եվ մեկեն անհանգստացավ:

— Տեր-Մելքոն, իմ հույսը գիրը չէ:

— Հապա՞...

— Արյունը... Արյունը գրից հին է, ավելի երկարակյաց: Արշակը ասում է, նա երզնկացիներիս մեջ ամենագիտունն է, ինչպե՞ս չհավատանք մեր Արշակին, նա ասում է, որ մեր արյունը այս հողի վրա հինգ հազար տարեկան է:

— Օհն՛, — բացականչեց Մելքոն Տեր-Պերպերյանը:

— Մեր Փամբուխ մեծ մայրիկին պահելու է արյունը: Արյունն է, որ չի մեռնում: Արշակի խոսքն է. հայը արյան մարդ է: Բնավ չկարծես, թե մեր հիշատակները մենք ենք պահպանում, մենք ի՛նչ, տկար մարդիկ, հիշատակների ծանրությունը ինչպե՛ս կարող ենք տանել, այժմ էլ, այժմ էլ դա արյունն է անում, որ մեր ամբողջ ցեղի մեջ է: Երկու օր առաջ Արշակը մոտս էր, քո աթոռին, այսպես դեմ-դիմաց, ասում էր՝ արյունը խորհրդավոր, անմահ բան է, Ավետիս, մեզ համար արյունից բարձր միայն բնությունն է, մեր լեռները, ի՛նչ կասես:

— Լեռները կպահեն սիրելի Փամբուխ մեծ մայրիկին, — ասաց Մելքոն Տեր-Պերպերյանը:

— Հը...

— Արարատը միլիոն տարի կա, նա ամեն ինչ տեսավ, մեր բոլոր ձայները լսեց, հիմա էլ վկա է, Արարատը մեղք է, Ավետիս:

— Մեր Արշակն էլ նույն տեսանկյունն ունի:

Մելքոն Տեր-Պերպերյանն անհանգիստ, փշոտ շարժվեց, կարծես ուզում էր վեր կենալ, և մնաց տեղում:

— Երևում է՝ Արշակին հրաշալի բարեկամացել ես, — նրա ձայնում Արշակի նկատմամբ խանդ կար, Ավետիսի՛ նախատինք ու հեգնանք:

— Այսպես մի բան կա, — շշնջաց Ավետիսը:

— Է...

Ավետիսը ձայնն ավելի իջեցրեց.

— Արշակն ուզում է կին առնել մեր Մարթային:

— Օհն, — բղավեց Մելքոն Տեր-Պերպերյանը: — Մարթան համաձայն է:

— Յոթանասուներկու տարի չեմ ամուսնացել, կյանքիս վերջալույսին պիտի ամուսնանամ:

— Իրավացի մերժում է: Է, Արշակը հնչ...

— Յոթանասունհինգ տարի կարգված չեմ, այժմ Մարթայի հետ պիտի ընտանիք կազմենք՝ ի սեր ազգի:

— Վերջը... — շշուկով, ծայր աստիճանի շփոթված հարցրեց Տեր-Պերպերյանը:

— Վերջը լավ կլինի, — բարձրաձայն ասաց Ավետիսը՝ հայացքը կիսաբաց դռանը:

— Տա աստված, — ամբողջ սրտով բարեմաղթեց Տեր-Պերպերյանը:

— **Ծավալեր ծաղիկ ծովային:**

Տեր-Պերպերյանը ժպտաց:

Ավետիսը ինչ-որ բան ուզեց ասել, բայց հազը դարձյալ կախվեց նրա կոկորդից: Աչքերը ջղացնցումից խոշորացան, վզի երակները արկվեցին, խոսքը, սրտից հազիվ բարձրացած, բերանի խոռոչում խեղդվում էր:

— Ի նչ... — վախեցավ Տեր-Պերպերյանը, — քեզ ինչ եղավ, մարդ աստճո:

Քիչ անց, դեռևս հազալով, Ավետիսն ընդհատաբար ասաց.

— Արարատը... Երզնկայի ճամփան... հիշում է...

— Իհարկե, հարկավ:

— Իսկ... իսկ Եփրատի կամուրջը...

— Արարատի ձերմակ ձյուները հիմա էլ, այս րոպեին էլ

տեսնում են Եփրատի կամուրջը, նրանց աչքերի առջև մեր Տաճրակն է, այնտեղ էլ հիմա աշուն է, Ավետիս, ծովսը կապույտ գալարներով բարձրանում է երդիկներից: Մերոնք լավաշ են թխում և անժուր գաթա, արևը չորացնում է ընկույզը, շարոցներն ու պաստեղը, մառաններում, զգհմ ես, Ավետիս, կախան պտուղների բուրմունքն է: Արարատի ձյունները նայում են Երզնկա տանող ճանապարհին, ոլորմոլոր գնում է ճամփան անտառի եզրով, ձորակներով, դաշտահողերի՝ միջով, ահա և կամուրջը, հանգստանանք մի քիչ, ձիերն ու ավանակները ջուր են խմում գետից, ամպգուլ է, մենք էլ լողանանք, խորքերը չգնաս, Ավետիս, Փամբուխ մեծ մայրիկի սիրտը կալեկոծվի: Ի՞նչ հրաշք... Արարատի ճերմակ-ճերմակ հայացքում Երզնկան է: Ահա մենք էլ հասանք քաղաք:

— Ի՞նչն է, ինչ... — հարցրեց Ավետիսը, — թոփ մը կտավ ունիմ, կծալլեմ, կծալլեմ՝ չհատնիր:

— Ճամփան, — ասաց Մելքոն Տեր-Պերպերյանը, — մեր կյանքի ճամփան:

Նրանք լռեցին: Այդ պահին ամեն մեկը միայնակ էր, ինքն էր և իր հիշողության թելը, որ, սկսվելով ուղեղի ծալքերից, երկարում էր դեպի անցյալի խորքերը:

Մարթան ներս մտավ: Նրանք սթափվեցին: Դավերադարձ էր դեպի ներկա:

— Մարթա, — Ավետիսը դիմեց քրոջը, — հիանալի սուրճ էիր պատրաստել:

— Դու ինչ գիտես, — զարմացավ Մարթան:

— Խմեցի:

Մարթան՝ հանդիմանանքով նայեց հյուրին:

— Ընդամենը մեկ պուտ... — շփոթվեց Տեր-Պերպերյանը:

— Ինչպէս... — դիմադիր եղավ Ավետիսը: — Ես երեք կում եմ արել, լավ հիշում եմ, ոչ թե մեկ, այլ երեք:

— Ամմա երեխա ես, ո՛հ, — տագնապեց Մարթան: — Դոկտոր Պարթևին ի՛նչ պատասխան պիտի տանք:

— Սիրոս սուրճ ուզեց, — ասաց Ավետիսը: — Այս գիշեր մեռնելու եմ:

— Փիլաֆը բերե՛մ, փիլաֆ կուտես:

— Ախորժակ չունես:

Բազկաթոռին նստած, Մարթան ձեռնոց էր գործում:

Երզնկայում ձմեռը ցուրտ է ու երկարատև, — մտածեց Մելքոն Տեր-Պերպերյանը:

Ավետիսը քնած էր ծանր ու խռպոտ շնչով:

Արդեն կեսօր էր, երբ Մելքոն Տեր-Պերպերյանը հրաժեշտ տվեց Մարթային և, գավազանի կեռ գլուխը թևին անցկացրած, դուրս ելավ:

Այն թաղամասը, որով դանդաղ, մեջքը կքած քայլում էր նա, խաղաղ էր, մեկ-երկու հարկանի տներով ու ծառաշատ: Աշնան դեղին տերևները նստել էին ցանկապատերին, դիզվել բակերի ու նեղլիկ փողոցների անկյուններում: Արևը իր մեղմ ջերմությամբ քաղցրացնում էր ժամանակը: Այնտեղ էլ էր ճիշտ այսպես, երկրում, հոկտեմբերի վերջին շաբաթը արևը, մեր դեղնած այգիները, իրիկնադեմին ճահճուտից հետ դարձող մեր գոմեշը դառնում էին քո անուշ արյունը, — դանդաղ անցավ նրա մտքով:

Հանապարհի մեջտեղը Մելքոն Տեր-Պերպերյանը կանգ առավ և, ուղղելով թևը, հենվեց գավազանին:

Տներից մեկի առջև, կարծես դիակներ, հաստ ծառաբներ էին թափված: Երկու տարեց մարդ, սիգարեթը շրթունքներին, սղոց էին քաշում, իսկ երկրորդը, որ համեմատաբար երիտասարդ էր, ջարդում էր կոճղերը:

Մելքոն Տեր-Պերպերյանը ավելի մոտեցավ նրանց:

Սղոցի սուր-սուր ատամները կրծում էին ծառաբնի հաստ մաշկը և խրվում մարմնի մեջ, խմում էին նրա արյունը, անտանելի ցավ պատճառելով ծռում ողնաշարը, ալյուրաղցան անում ջիղ ու մկանունք: Իսկ կացնով մարդը, քրտինքն աչքերը կապած, ծառաբնի տանջալից մահը հասցնում էր ավարտի. նա կացնի սառը, փայլուն, զարհուրելի շեղբն ուժգնորեն, շունչը պայթեցնելով իջեցնում էր կոճղի գլխին, ճեղքում գլուխն ու սիրտը, ապա նրան, կացնի երախն առած, հանում բարձրացնում էր վերև, ֆռռացնում օդում և թնդյունով զարկում ցած. այդպես ջարդուփշրվում էին ծառաբնի ոսկորները, հոգին մի վերջին անգամ տնքում էր և մյուս աշխարհը գնում:

Մելքոն Տեր-Պերպերյանը երկար նայեց-դիտեց: Մեկը սաստիկ և արագ բախում էր սիրտը: Աչքերի առջև խառնիխուռն պատկերներ էին: Գլխում բզզում էր մեղուն: Հանկարծ լռություն եղավ: Այդ պահին նա տեսավ արևաշող մի դաշտ, որի միջով հոսում էր դրախտի գետը: Ականջները լցվեցին հեռավոր օրերի ձայներով, և նա խփված թռչունի պես ճչաց:

Նա նետվեց սղոցի բերանը և մարմնով փակեց ծառաբնի

մեջքին բացված խոր վերքը: Հետո, գավազանը թրի նման պարզած, հարձակվեց կացնավորի վրա:

— Ես քո սուլթանն ապտույ համիտ... — կացնավորի օձիքից կառչելով, հայիոյեց նա: — Դու եղ ղում ծառն ես ջարդուկտոր անում, հը, ղում, ղում ծառը:

Կացնավորը հրեց նրան: Գավազանն ընկավ: Նա հազիվ մնաց ոտքի վրա: Գետնից գավազանը բարձրացնելով, վրա պրծավ սղոց քաշողներին: Հետո դարձյալ նետվեց դեպի կացնավորը:

— Ես ձեր սուլթանն ապտույ համիտ... — մոլեգնած գոռում, հայիոյում էր Մելքոն Տեր-Պերպերյանը: — Անաստվածներ, գողեր, ազգի դավաճաններ, բորենիներ, որդնոտք, փտք, որդնոտք, շան բաժին դառնաք:

Մելքոն Տեր-Պերպերյանը շնչակտուր կանգ առավ և մոլոր ու անօգնական լռեց: Նրա դեմքի ծալքերով համրորեն գնում էր արցունքը:

— Ախր, ինչի՞ ես լացում, մեծ ախպեր, — մոտենալով, հարցրեց փայտահատներից ամենատարեցը: — Ախր, մի ասա տեսնենք մեր մեղքն ինչ է:

Արցունքի միջից Մելքոն Տեր-Պերպերյանը վիզը ծուռ նայում էր մոտիկ ծառաբնին:

— Սա իմ ծիրանի ծառն է, — տխուր-տրտում ասաց նա: — Իմ Սեպուհի հայրն է տնկել, ջրել, մեծացրել: Այս աննման ծառը յոթանասուն անգամ ծաղկել է, ծաղիկները անուշաբույր, դեռ հեռուներից հոտը առնում էիր, նեկտարը շատ: Յոթանասուն տարի քաղցրացրել է մարդկանց իր խոշոր, հյուսված պտուղներով, իսկ աշուններին... աշուններին

հագել է ոսկե զգեստ, հետո մեր սարերից քամիները իջնում էին և դանդաղ մերկացնում նրան: Չմեռը իմ ծիրանի ծառը նման էր ճերմակ, լուսավոր հեքիաթի, նա մեր ձյուններից էր այդպես ճերմակում, մեր ճերմակ, լուսավոր ձյունները տաքացնում էին նրան մուժ, երկար-երկար, ցրտաշունչ գիշերներին: Իմ լավ, իմ մեղք ծիրանի ծառ, — ծառաբնին կռանալով, շշնջաց Մելքոն Տեր-Պերպերյանը, — ես եմ, քո Մելքոնը, իմ ընկեր, իմ դժբախտ հարազատ, իմ Սեպուհի հոր զավակ, իմ քաղցր, քաղցր, քաղցր արյուն: Դուք գող-գող մտել եք մեր այգին, — հուսահատ ասաց նա, — ոտնակոխ արել ծաղիկ, ռեհան ու խոտ, դուք կտրել եք իմ ծիրանի ծառի վիզը, արյունախում մարդասպաններ, ջարդել ողնաշարը, պոկել ոտք ու թևերը, աչքերը հանել-կուրացրել, մեր երկնքի պես կապույտ աչվըները, որոնք, էէ՛, յոթանասուն տարի ժպտացել են, ծիծաղել, տխրել, կարոտել են յաթաղանից հրաշքով, հրաշքով մազապուրծ Մելքոն Տեր-Պերպերյանին, գաղթական Մելքոնին, թելասեղ բանեցնող վարպետ Մելքոնին, այժմ թոշակառու Մելքոնին, Նոր Արեշի բնակիչ Տեր-Մելքոնին, որը Սաթենիկ կնոջ էրիկմարդն է, Վարուժան, Գրիգոր, Սմբատ, Անդրանիկ արու զավակների հայրը, տասնևութ թոռ-թոռնուկիների պապը... Ես, ես ի՞նչ, ի՞նչ թշնամություն էի արել ձեզ, անհրավներ, շան փայ, շան փայ դառնաք: Օ՛հ, կարոտ...

Փայտահատները թողել էին բան ու գործ և շվար, բացբերան կանգնել մնացել:

— Այ մեծ ախպեր, մեզ մի անիծիր, մենք մշակ մարդիկ ենք, մեզ ինչ ասում են, են ենք անում, ասում են երկար կտրեք, երկար ենք կտրում, վառարանի չափով, կարճ՝ կարճ:



էստեղից էլ մեր վարձը, մարդագլուխ տասնհինգ, փուչ փող, և մի-մի քոթուկ, թե հաց բան էլ տան՝ իրենց պատիվը: Էս ծառերի տերը, ախր, Աբոն է, շուկայի հետևը կոշիկի-բանի խանութ կա, դրա վարիչը: — Ամենատարեցը դեմքով դարձավ դեպի երկհարկանի տունը, որի ընդարձակ պատշգամբի բազրիքին աթլաս բարձեր ու վերմակներ էին արևկող արել, չորանում էին սուջուխի օղակներն ու բաստուրմայի յուղալի պատառները: — Կարող է Աբոն է ծառդ կտրել-գողացել, կարող է՝ մեկ ուրիշը, մեկ ուրիշը կտրել է, բերել ծախել Աբոյին, մենք ինչ գիտենք, մենք արդար, արդար քրտինքով ենք մեր մի կտոր ապրուստը վաստակում: Էս էլ Աբոն:

Իր ավտոմեքենայից Աբոն դուրս ելավ, մյուս դռնից էլ կինը՝ Լաուրան, երկուսն էլ կիրակնօրյա պերճ հագուստ-կապուստով:

— Ինչի՞ եք պարապ-սարապ կանգնել, — հետաքրքրվեց Աբոն, — գործ արեք, գործ:

— Էս լավ մարդն ասում է, — խոսեց կացնավորը Մելքոն Տեր-Պերպերյանին մատնացույց անելով, — ցախը գողացված է, ասում է՝ դու ցախը գողացել ես:

— Չտո՞ գովորիտ, — հարցրեց Լաուրան, — ինչ է ասում:

— Ասում է՝ դուք ցախ եք գողացել, ցախ:

— Ոչ թե ցախ, այլ ծառ, — միջամտեց Մելքոն Տեր-Պերպերյանը, — իմ Սեպուհ հոր մեծացրած ծիրանի ծառի գող:

— Ե՛ս, — Աբոն ապուշ կտրեց:

— Դու, հենց դու, — շեշտեց Մելքոն Տեր-Պերպերյանը՝ յուրաքանչյուր վանկի հետ գավազանը խփելով գետնին:

— Իաա՛, էս ով է, տո, — Աբոյի աչքերը ոլորկծիկ եղան ճարպոտ ակնափոսերում, — տո, ինձ քո ապրանքը հազար տարի պետք է, էս քու նմաններին բարև էլ չեմ տալիս:

Աբոն խփելու շարժում արեց: Մելքոն Տեր-Պերպերյանը սպառնալից բարձրացրեց գավազանը: Փայտահատները մեջ ընկան: Լաուրան ճչաց:

Մելքոն Տեր-Պերպերյանը գավազանը սլաքի նման ուղղեց հեռուները: Բոլորը լարված նայեցին այնտեղ:

— Կղմինդրե տունը տեսնո՞ւմ եք... Այդ կղմինդրե տան ծխնելույզի աջ, աջ կողմից գնացեք դեպի բարդին, բարդուց աչք բացեք, էէ՛, հարավ և աչքը մի քիչ, մի քիչ ծռեք արևմուտք, — Տեր-Պերպերյանը փոխեց գավազանի ուղղությունն ու մարմնի դրվածքը: — Հիմա այլևս պետք չէ կանգ առնել, — այնպես ոգևորվեց նա, կարծես տակը ձի կար, — անցեք Արաքսի ջրերը, արագ, արագ, վեր, վեր ելեք լեռնաշղթայի լանջով... Մեր աչքի առջև, տեսեք, մեր երկիր դրախտավայրն է, տեսա՞ք Վանա ծովակը, Մուշ և Երզնկա քաղաքները, Սասունը-Սասունը... Իմ այգին՝ Սեպուհ լեռան ստորոտը, Եփրատին դրկից... Ուր է, ուր է իմ ծիրանի ծառը:

Մելքոն Տեր-Պերպերյանը գավազանը ցած առավ և աչքերը հառեց Աբոյին:

— Իաա՛... — Աբոյի արյունը կատաղությունից արդեն եփ էր գալիս: — Տո, էս որտեղի՞ց, որտեղի՞ց հայտնվեց, տո, էս գնացի արտասահման քո ծառի համար:

Դա Մելքոն Տեր-Պերպերյանի սրտին հասցված ամենածանր հարվածն էր ամբողջ կյանքում: Նա ծեր, մահացու խոցված առյուծի նման բռռաց.

— Հաստագլուխ, երզնկան արտասահման է:

— Սումասշեղշի ստարիկ, գիժ ցնդած, — փշտաց Լաուրան և ամուսնուն մի կողմ քաշեց, վախենալով, որ նա կխփի ծերունուն, իրենք կընկնեն տհաճ պատմության մեջ, ինչպես եղավ անցյալ տարի, դե սրան-նրան փող ուտեցրու, մեծ-մեծ հյուրասիրություններ արա, որ էշը ցեխից հանես:

Մելքոն Տեր-Պերպերյանը, գավազանի գլուխը դարձյալ թևին հագցրած, մի ուսը կախ, ծուռ-ծուռ գնում էր իրիկնադեմի արևով ողողված աշնանային փողոցով:

Մի շշուկ, մի հով անցավ. երբ ես մեռնեմ, ուրիշները կգան իմ տեղը:

Նա լսեց, թե ոչ, բայց զգաց, որ դեղին ու դալուկ տերևներ են իջնում ծառերից:

Երբ Մելքոն Տեր-Պերպերյանը տուն մտավ, կինն ուշադիր նայեց նրան և հարցրեց.

— Ավետիսի առողջությունը ինչպե՞ս է:

Տեր-Պերպերյանը ասաց.

— Կարծես վատ չէ, բայց այս գիշեր ուզում է մեռնել:

— Մեռնելը ի՞ր ձեռքն է:

— Ո՛ւմ ձեռքն է:

— Աստծո ձեռքն է:

— Փիլաֆը դիր, սիրտ չունեմ:

— Ինչո՞ւ սիրտ չունես, Տեր-Մելքոն:

— Մեր ծիրանի ծառը այլևս չկա:

— Ո՞ր ծիրանի ծառը:

— Մենք քանի՞ ծիրանի ծառ ունենք, — վիրավորվեց Մելքոն Տեր-Պերպերյանը:



Ե Կապույտ Երգնկա

— Քանի:

— Երզնկայի ծիրանի ծառը, Սաթենիկ, Սեպուհ սկեսրայ-  
րիդ տնկած ծիրանի ծառը:

— Աման... — մղկտաց Սաթենիկը:

— Կտրել են... ձմեռվա վառելիք... սպանել են...

— Աման... ովքեր...

— Գող-ավազակը շատ:

Մեկ-երկու ժամ հետո բոլորը՝ հայրենակից ու բարեկամ,  
արդեն գիտեին ծիրանի ծառի մահը:

— Վախ, Տեր-Մելքոն, վախ, — ողբում էին հեռախոսի  
լսափողում, — է, Տեր Մելքոնի աչքը որտեղ էր, մեղք ծառ,  
մեղք:

— Աչքդ որտեղ էր, Տեր-Մելքոն, — լսափողը ցած դնելով,  
ամեն անգամ հանդիմանում էր Սաթենիկը:

Մելքոն Տեր-Պերպերյանը ձեռքերն անօգնական տարա-  
ծում էր և մեղապարտի հայացքով լռում:

Ավարտվող օրը քուն բերեց բոլոր մարդկանց:

Գիշերվա մի ժամի Մելքոն Տեր-Պերպերյանը զարթնեց,  
մահճակալից կախեց ոտքերը և նստեց:

— Քեզ ինչ եղավ, Տեր-Մելքոն, — քուն-արթուն հարցրեց  
Սաթենիկը:

— Հանկարծ ուրիշ բաներ չգողանան, չսպանեն: Մեր  
սանդի համար շատ անհանգիստ եմ, սանդը հիշում ես, որի  
մեջ ցորեն էինք ծեծում:

Սաթենիկը զարթնեց, վերմակը քաշեց ուսերին և նստեց:

Մարտիրոսը զարթնեց:

Սողոմոնը զարթնեց:

Խաչիկ Շիշմանյանը զարթնեց:

Հովեն զարթնեց:

Ավետիսը զարթնեց և ձայն տվեց Մարթային.

— Մեռնելս հետաձգում եմ, գործ կա, մեր Ոսկե Անահիտի հեքիաթն եմ պահպանում:

Մարթան զարթնեց:

Բարթուղը զարթնեց:

Պողոս Հայթայանը զարթնեց:

Արշակը զարթնեց:

Զարթնեցին Կարապետ Քրիստոստուրյանը և իր յոթ եղբայրներն ու քույրերը:

Գարեն զարթնեց:

Վարդգեսը զարթնեց:

Սեյրանուհի Հաջի-Արմենակյանը զարթնեց:

Բոլորը նայում էին նույն ուղղությամբ:

Հազար ինը հարյուր ութսուն թվական, հոկտեմբերի տասնչորսի լույս տասնհինգի գիշեր:



## ՃԵՐՄԱԿ, ՍԵՎ ԱՆՄԵՌՈՒԿԻ ԳԱՐՈՒՆԸ

**Ջ**բոսայգու մուտք ծառուղիով քայլում էին աղջիկը և տղան: Գարնան անձրևը դադարել էր, և երկնքում նորից շողում էին աստղերը: Ուշ ժամի պատճառով, այգին երիզող փողոցից՝ ցերեկը այնքան բանուկ ու աղմկոտ, արդեն ոչ մի ձայն չէր գալիս:

Փայտե նստարանը սառն էր, և թիկնակը՝ ետ ընկած:

— Ես գիրք էի կարդում, երբ դու զանգեցիր: Դու որևէ բան ես ուզում ասել ինձ, — տղայի ձայնն էր:

— Ի՞նչ գիրք էիր կարդում, — հարցրեց աղջիկը:

— Կանցնեն շատ տարիներ, և մահվան մահճում նա կհիշի անձրևոտ, հունիսյան այն օրը, երբ ինքը ննջասենյակ մտավ տեսնելու իր առաջնեկին:

— Նա գիժ է:

— Դու ուզում ես ինձ ինչ-որ բան ասել:

— Ոչինչ, ոչինչ չեմ ուզում ասել: Չորս տարի ես ասում եմ ինչ-որ բաներ, հազարավոր, հարյուրհազարավոր բաներ, որոնք ոչ մեկին պետք չեն: Ես հոգնել եմ բաներից: Ես չգիտեմ, չգիտեմ ինչի անձրևից հետո քեզ զանգեցի, — աղջկա մեղմ ձայնի մեջ տղան զգաց նրա միշտ բարի ու զվարթ էությանն անհարիր նյարդային շեշտեր:

— Քո մտքում բան կա, — ասաց տղան:

— Դու ուզում ես իմանալ ի՞նչ կա իմ մտքում, — հարցրեց աղջիկը:

— Չգիտեմ, — ասաց տղան՝ գրկելով նրան:

— Թող, — նրա ձեռքերից ազատվելով ասաց աղջիկը, — այնտեղ մարդ կա:

Տղան, որի անունը Սիմոն էր՝ երիտասարդության մեջ ոչ այնքան տարածված մի անուն, նայեց աղջկա ցույց տված ուղղությամբ և ծաղկանոցի մոտ, միայնակների փոքրիկ նստարանին, որտեղ թույլ շնչառության պես մարմրում էր ծառերի խորքում հազիվ լուսավորված լապտերի շողքը, տեսավ մի մարդու: Նա լայնեզր գլխարկով էր, ոտքերի արանքում՝ ձեռնափայտը, որին ձեռք ու գլխով անշարժ հենված՝ թվում էր կուզիկ, թորշոմած ծառաբուն: Տղան ճանաչեց նրան:

— Հաջի Պետրոսն է, մեր հարևանը, նա կույր է:



— Կույրերն էլ են տեսնում, — ասաց աղջիկը՝ իր գրկից տղայի ձեռքը հեռացնելով:

— Ծաղիկների հոտը զգում ես:

— Մեխակներ են:

— Հաջի Պետրոսը ծաղիկ շատ է սիրում: Նրա բակը վարդանոց է, ինքն է խնամում, երևանի ամենալավ վարդերը այնտեղ են, նա գիտի նրանցից ամեն մեկի տեղը, նույնիսկ գույնը, նա վարդերի հետ խոսում է, երբ մեկին վարդ է տալիս, նրա կույր դեմքը կարծես լուսավորվում է, ժպտում մի ամաչկոտ, երջանիկ ժպիտով՝ ոնց որ երեխա: Նա միշտ այդտեղ է նստում; ծաղիկների մոտ, այդպես լուռ, ինքն իր հետ:

— Քո Հաջի Պետրոսը, երևի, սիրահարված է, — ասաց աղջիկը, տղայի ջինսե բաճկոնի գրպանից սիգարետների տուփն ու վառիչքը վերցնելով:

— Սիրահարված է, յոթանասուն տարի:

— Հիշում ես, առաջին անգամ ինչ ծաղիկներ նվիրեցիր ինձ: Այս ամբողջ տարիներին այդ ծաղիկներն ինձ հետ էին:

— Չեմ հիշում, վարդեր էին, թե՛ մեխակ:

— Անթառամ ծաղիկներ էին, արևի գույնի:

— Հա, Արագածի կողմերից էի հավաքել:

— Այն ժամանակ ես քեզ սիրում էի, — շնչաց աղջիկը և փարվելով տղային՝ քնքշորեն համբուրեց:

— Իսկ հիմա...

Պատասխանելու փոխարեն աղջիկը վառեց սիգարետը: Վառիչի վայրկենական լույսով տղան տեսավ, որ նրա դեմքը գունատ է ու գեղեցիկ՝ ավելի, քան ուրիշ որևէ օր:

— Հաջին, ասում ես, սիրահարված է:

— Երկար պատմությունն է, Սոնա, — ասաց տղան: —

Այդպես ոչ ոք չի կարող սիրել:

— Նույնիսկ դ՞ուր:

— Նույնիսկ ես:

— Ես ուրախ եմ, ազնիվ խոսք, որ դու ինձ համար չես գժվում, — ասաց աղջիկը: — Որ դու ձեր տասներկուերորդ հարկից քեզ չես գցի, երբ ես լինեմ-չլինեմ: Հիմա ես հանգիստ եմ, ինձնից հետո դու կարող ես սիրել ուրիշին:

— Այսօր դու քեզ նման չես, — սիգարետ վառելով, ասաց տղան և նայեց կույրին, որն այժմ թվում էր ավելի մոտիկ ու կենդանի:

— Կարող է ես այսօր ավելի եմ ինձ նման, քան մինչև հիմա:

— Ուրեմն այսօր դու իմ Սոնան չես:

Աղջիկը ծիծաղեց.

— Դու խնդրի պատասխանը ստացար՝ այսօր դու իմ Սոնան չես, բայց, ընտրելով հեշտ ու կարճ ճանապարհը, սխալ ես լուծում, այդպես չի կարելի:

— Ձանձրալի մաթեմատիկական տրամաբանություն, — ասաց տղան: — Ինչի՞ ես զանգել:

— Ինձ ուզում են պահել ասպիրանտուրայում, դիֆերենցիալ մաթեմատիկայի գծով:

— Հրաշալի է, դու ուրախ չե՞ս:

— Ես հրաժարվեցի: Վերցնում են ուրիշին: Դու նրան, կարծեմ, ճանաչում ես՝ Ռուբենը, սիրուն, խելացի տղա է, անլուծելի խնդիրներ է լուծում, հաստատ մեծ ապագա ունի:

- Դու հրաժարվեցիր Ռուբենի համար:
- Քո երևակայությունը ինձ կգժվեցնի:
- Դու ինձ ընդամենը այդ էիր ասելու:
- Ի՞նչը:
- Մաթեմատիկայի մասին:
- Այսօր ես շատ էի ուզում տեսնել քեզ:
- Մենք ցերեկը հանդիպել ենք:
- Ես ուզում էի քեզ հետ խոսել գիշերը, որ դու իմ դեմքը չտեսնես, ես էլ՝ քո:

— Դե, ասա, ի՞նչ կա մտքումդ:

— Նայիր, — ասաց աղջիկը, — Հաջի Պետրոսը վեր կացավ:

Կուլյրը ձեռնափայտով մի քանի քայլ արեց և կանգ առավ ականջը զբոսայգու լռությանը:

— Նա լսում է ծղրիդի երգը, — ասաց տղան: — Տես, ծղրիդը երգում է: Գիտե՞ս ինչ է ասում ծղրիդը. եթե Հաջի Պետրոսին հավատանք՝ նա կանչում է սիրածին: Երբ ծղրիդը այդպես երգում է, տես ինչ անուշ է երգում նա, Հաջի Պետրոսին միշտ թվում է, թե Օսանը հեռուներից կանչում, կանչում է իրեն:

— Օսանը:

— Նրա սիրած աղջիկը:

— Աղջիկը, թե՛ կինը:

— Նրանք չամուսնացան: Հաջի Պետրոսը երբեք չի ամուսնացել:

— Օսանը լքեց նրան, հա՛... Դե, կյանքում այդպես լինում է, տղան ու աղջիկը իրար սիրում են, պատրաստ են ամուսնա-



Նալու, չէ, երևակայությամբ արդեն հայր են ու մայր, բայց, մեկ էլ տեսար, աղջիկը սիրահարվում է ուրիշին, նոր կյանք սկսում, նա ինչո՞վ է մեղավոր, — ասաց Սոնան, և տղան նրա ձայնում որսաց սիրավեպի այդ տարբերակում Օսանին արդարացնող շեշտեր:

— Նա մեղավոր չի, — ասաց տղան, — գուցե մեղավոր է, ես չգիտեմ մեղավոր է, թե ոչ, երևի մեղավոր չի, — նա լռեց և մի նոր սիգարետ վառելով նայեց աղջկա դեմքին:

— Ինձ թվում է մեղավոր չէ:

— Կարծո՞ւմ ես...

— Նա էլի սիրում է, — աղջկա ձայնը մեղմ էր ու դողդոջ:

— Բայց Օսանը Հաջի Պետրոսին չի դավաճանել, — քիչ անց ասաց տղան:

— Չի՞ դավաճանել... — աղջկա ձայնում զարմանք կար և հիասթափություն՝ այդպես թվաց տղային: — Այստեղ դավաճանելը սխալ բառ է, Սիմոն, դու ինձնից լավ գիտես, թե ինչքան վատ բառ է «դավաճանելը»: Եթե վաղը դու և Լիլիթը ամուսնանաք, Լիլիթին դու հավանո՞ւմ ես, չէ, եթե ամուսնանաք, ուրեմն... Ի՞նչ... դա դավաճանությունն է իմ նկատմամբ, թե...

— Ի՞նչ թե... — հարցրեց տղան:

— Դու Լիլիթին սիրում էիր, չէ, քանի անգամ ես ինձ ասել:

— Լիլիթին ես երբեք չեմ սիրել, նա իմ մեջ միայն տռփանք էր առաջացնում, հասկանո՞ւմ ես, ախր, նրա ամեն ինչը գրգռիչ է, նույնիսկ ձայնը, ես հիմա էլ դեմ չեմ լինի...

— Ահա, տեսնո՞ւմ ես:

— Դա սեր չէ:

— Դու ինձ չես հասկանում, — հուսահատվեց աղջիկը:

— Դե, ասա, ինչի՞ ես եկել, ասա, ես սպասում եմ, դու ուզում ես ասել, որ ինձ սիրո՞ւմ ես, — տղան կարծես խոսում էր իր մտքում:

— Ես կգժվեմ:

Հաջի Պետրոսը դարձյալ նստեց: Զբոսայգում երգում էր ծղրիդը:

Տղայի ձեռքը խաղում էր աղջկա մազերի հետ: Նա իր դեմքը կամաց մոտեցրեց աղջկա դեմքին: Երբ նա արդեն համբուրելու էր, աղջիկը, միանգամից գլուխը շրջելով, փախցրեց շուրթերը, և տղայի շրթունքները հպվեցին նրա պարանոցին, որն այդ պահին մարմարի պես սառն էր:

Թեթև քամի անցավ և անձրևի մի քանի կաթիլ ճյուղերից գլորեց ներքև: Հետո տղան լսեց աղջկա ձայնը.

— Օսանը մեռել է: Կույրը քեզ չի ասել ինչ է պատահել իր Օսանին: Նա Օսանին հիշո՞ւմ է:

Տղան դեմքը շրջել էր աղջկանից, բայց տեսնում էր նրան: Այն ժամանակ նա, բառիս լիակատար իմաստով, խլեց Սոնային բանասիրական ֆակուլտետի երրորդ կուրսի ուսանող Համո Ջանյանի գրկից: Հունվարյան քննություններից հետո իրենք մեկնեցին Ծաղկաձոր՝ դահուկ քշելու: Հյուրանոցում նրանք ձևացրին, թե քույր ու եղբայր են: Ադմինիստրատորը՝ տեղի կոշտ բարբառով խոսող, հաղթանդամ ու դժգոհ մի տղամարդ, նայելով անձնագրերը, նրանց տեղավորեց տարբեր, ընդհանուր սենյակներում: Ճոպանուղիով նրանք բարձրանում էին Ալիբեկի ամենավերին լանջերը, որտեղ

ձյունը սպիտակ-սպիտակ էր, և արևը՝ պայծառ: Իսկ ամբողջ երեկոն անցնում էր բարում, նրանք պարում էին, ծխում ու խմում և երկար, լուռ նայում իրար: Երբ վերադարձան քաղաք և համալսարանում դասերը սկսվեցին, Սոնան շփոթված ասաց, որ սիրում է նրան և պիտրաստ է նրա հետ ամուսնանալ: Բայց իրենք չամուսնացան, որովհետև այդպես էլ լավ էր: Տղան մռայլվեց: Ինչո՞ւ հանկարծ հիշեց Համո Ջանյանին՝ Աղվես Համոյին, այդքան տարի հետո, ինչո՞ւ նրան լույս աշխարհի հանեց իր հիշողության փոշիներից:

Նրանք նայեցին ծաղկանոցի կողմը: Նստարանին ոչ ոք չկար: Հեռվում, ծառուղիով մի մարդ էր գնում՝ ձեռնափայտը առաջ պարզած:

Նա տենդի պես զգաց Սոնայի մոտիկությունը:

— Գիտեմ, մտքումդ բան կա, — ասաց տղան, — ինչի՞ ոչինչ չես խոսում, դու ցերեկն էլ, մի տեսակ, տարօրինակ էիր:

— Ի՞նչ կա:

— Չգիտեմ:

— Դու որևէ բան զգում ես:

— Հիմա ես քեզ ավելի շատ եմ սիրում:

— Ինձ շատ մի սիրիր, — ասաց աղջիկը:

— Կարծես ես մոտենում եմ իմ հարյուր տարվա մենությանը:

— Մի՞թե դու ինձ այդքան շատ ես սիրում:

— Կանցնեն շատ տարիներ, և նա գնդակահարության պատի տակ կանգնած կմտաբերի հեռավոր այն օրը, երբ հայրն իրեն սառույց տեսնելու տարավ:

— Սառույց տեսնելո՞ւ:

— Հարյուր տարի հետո մեզնից ոչ ոք չի լինի:

— Կլինի ծղրիդը:

— Ծղրիդը էլ չի երգում:

— Հաջի Պետրոսը գնաց, — ասաց աղջիկը: — Օսանը մեռել է:

— Հաջի Պետրոսը և Օսանը սիրում էին իրար, երբ սկսվեց կոտորածը, — ասաց տղան: — Բայց դա ինչ կապ ունի մեզ հետ:

— Ունի:

— Ով չէր մեռնում՝ գաղթում էր, փախչում էին ընտանիքով, ամբողջ գյուղերով: Օսանենց և Հաջի Պետրոսենց ընտանիքներն իրենց հագուստն ու պաշարը սայլին բարձած, երզնկացիների մի խմբի հետ շարժվում էին դեպի Կարին քաղաքը: Նրանց վրա հարձակվում է Իսմայիլի ավազակախումբը: Հաջի Պետրոսը Իսմայիլին ճանաչում էր, նա ապրում էր իրենցից մի քանի տուն հեռու: Կին, թե տղամարդ, բոլորին մերկացնում են, թալանում, հետո սկսում են տանջել, սպանել: Իսմայիլը նկատում է Օսանին ու նրան քաշում իր մոտ: Իսմայիլ, — ասում է Հաջի Պետրոսը, — ես քո փոքր եղբայր Քեմալի հետ վեզ եմ խաղացել, ձի բշել, ես Օսանին սիրում եմ, տուր Օսանին, խնայիր մեզ, ես քո պապին էլ եմ հիշում, որ մեռավ անցյալ տարի, մենք բոլորս լաց եղանք նրա համար, Աղա Գյունդուզ Ահմեդ Օղլի Շահնաբեդդինը լավ մարդ էր: — Իսմայիլը ծիծաղում է: — Ես Օսանին տանում եմ Քեմալի համար, — ասում է Իսմայիլը և հրամայում քարածեծ անելով սպանել Հաջի Պետրոսին, որ նա Օսանին երբեք չհիշի: Հաջի Պետրոսը ամբողջ գիշերը մնում է դիակների մեջ, հետո



կամաց, կիսամեռ դուրս սողում: Գաղթականների մի խմբի միացած՝ մի օր էլ հասնում է Էջմիածին: Այս է Հաջի Պետրոսի պատմությունը:

Տղան լռեց: Փողոցում զրնգաց տրամվայը: Տղան մտածեց, որ տրամվայը դատարկ է:

— Սիմոն, — ասաց աղջիկը շշնջալու պես, և մարմնով սարսուռ անցավ:

Տղան տեսնում էր, թե ինչպես է դատարկ տրամվայն անցնում քաղաքի փողոցներով, և չկա մեկը, որ կանգնեցնի նրան: Այդ զգացողությամբ էլ նա լսեց իր անունը:

— Ի՞նչ, — հարցրեց նա:

— Գնանք: Արդեն ուշ է: Ես վախենում եմ:

Նրանք զբոսայգուց հեռու չէին ապրում: Տղային ճանապարհը թվաց ավելի կարճ, իսկ աղջկան՝ երկար:

— Դու վախենում ես ինձ ասել այն, ինչ ասելու ես վճիռ, — հարցրեց տղան:

— Ես այսօր կասեմ, — հանկարծ փարվելով նրան ու համբուրելով, պատասխանեց աղջիկը, — քիչ հետո:

Փողոցներում մարդ-արարած չկար: Շենքերը նրան էին նայում կույր աչքերով: Հաջի Պետրոսը, իր տան շեմին նստած, ծխում էր:

Նա ուզում էր աննկատելի անցնել, բայց՝ ծերունին կանգնեցրեց նրան.

— Տղա, դու ինչի՞ չես քնում:

— Իսկ դ՞ու, Հաջի Պետրոս:

— Ես գործ ունեմ, — ասաց ծերունին: — Երբ ես դիակներից սողացի, ես որոշեցի Իսմայիլին սպանել, բայց

գլուխս ցավում էր: Քսան տարի, քսան տարի ես քուն-արթուն հետևել եմ Իսմայիլին... Երեսունհինգին նա մեռավ իր մահով, հիվանդությունները նրան չկերան, գայլերը նրա մարմինը չպատառոտեցին, անի, խաղաղորեն հոգին ավանդեց... Այդ ժամանակ էլ այստեղ, — հաջի Պետրոսը մեծ ու ծանր բռունցքով մի քանի անգամ թակեց կուրծքը, — ծնվեց մի միտք, մի սարսափելի միտք... Ես նամարդ չեմ, տղա, և ծնողի պատիվ գիտեմ, և ընկերոջ, բայց Քեմալը, որի հետ Երզնկայի դաշտում ձի ենք քշել, Քեմալը մոռացավ ամեն ընկեր-բարեկամ...

— Նա ղոջ է, հաջի Պետրոս:


— Ողջ է, ողջ է, հազար ինը հարյուր քսաներկու թվին և վաթսուներեքին Իզմիրի մեծ շուկայում տեսնողներ են եղել...

— Իսկ Օսանը դեռ քեզ սիրո՞ւմ է, — հարցրեց տղան:

— Մարդ աստժո, — բացականչեց հաջի Պետրոսը, — չլսեցիր, այգում երգում էր ծղրիդը:

Երբ տղան տուն մտավ, բազմոցին տեսավ «Հարյուր տարվա մենությունը»՝ մեջտեղից կիսված, և հեռախոսը, որը կանչում էր նրան: Հեռախոսի ձայնը հնչում էր ժամանակի հավասար տարածություններում, հնչում էր համառորեն և ավելի ընդգծում լռությունը:

Տղան լսափողը չվերցրեց. նա գիտեր, որ զանգողը աղջիկն է, և արդեն գիտեր՝ ինչ է ասելու:



## ԹԽԱԿԱՐՄԻՐ ՁԻՆ

Հայաստանի վաստակավոր ուսուցիչ  
ՊԵՏՐՈՍ ԶԱԹԱԼԲԱՇՅԱՆԻՆ

— Քիչ առաջ զանգ տվեց դպրոցական ընկերդ, —  
երբ աշխատանքից տուն վերադարձա, հայտնեց

կինս:

— Ի՞նչ դպրոցական...

— Կարո Վռամյանը, խնդրեց զանգես, հեռախոսի  
համարը գրել եմ:

— Կարո՞ն... հո հիվանդ չէր:

Դպրոցական տարիներին ես ու Կարոն մտերիմ ընկերներ էինք: Նստում էինք միևնույն նստարանին, խաղում կամ մեր բակում, կամ իրենց, որոնք իրարից բաժանված էին փշալարի ցանկապատով և բարդիների շարքով, հաճախ նույն հացն էինք ուտում, հագնում միատեսակ կոշիկ ու շալվար, նույն ձևով էինք կտրում, սանրում մեր մազերը, և, պատահում էր, մարդիկ մեզ եղբայրների տեղ էին դնում: Երբ վերջացրինք դպրոցը, կյանքը մեզ շարտեց այլևայլ կողմեր: Ես գնացի դարձա բժիշկ, իսկ նա, ավարտելով համալսարանի իրավաբանականը, սկսեց արհմիությունում աշխատել: Հրահանգիչ էր, թե ում ինչ հրահանգներ էր տալիս՝ չգիտեմ: Հետո դարձավ մի մեծ գործարանի իրավախորհրդատու, շուտով էլ՝ արհմիության նախագահ, և նույնիսկ քաղսովետի դեպուտատ ընտրվեց: Ես հպարտանում էի նրանով, նա մեր դասարանից ծնված միակ հասարակական գործիչն էր:

Մի տարի էլ Կարոյին ժողդատավոր նշանակեցին, չէ՛ ընտրեցին, որովհետև դատավորն ընտրովի է: Ես որևէ հանցանք գործեմ, ու Կարոն ինձ դատի, — այն ժամանակ ժպտալով մտածեցի ես:

Մենք միմյանց տեսնում էինք ավելի ու ավելի սակավ, առօրեական հազար ու մի հոգսերն ազատ, հանգիստ ժամանակ թողնում էին որ, բացի այդ՝ բուլդոզերը մեր կանաչ բակերը քանդել, հողին էր հավասարեցրել՝ տեղ բացելով վճարովի ավտոկանգառի համար, և մենք արդեն ապրում էինք մեծ քաղաքի տարբեր թաղամասերում: Սակայն հանդիպելիս էլի նույն ընկերներն էինք՝ իրար նկատմամբ համակված բնական ու անկեղծ ջերմությամբ:

Վերջին անգամ Կարոյին տեսել էի մոտավորապես չորս ամիս առաջ, «Անի» ռեստորանում: Նա ինձ անծանոթ մարդկանց հետ էր, ես՝ բժիշկ ընկերներիս: Մենք բարձրացրինք բաժակները և հեռու-հեռու ուրախ ժպտալով ողջունեցինք միմյանց: Դրանից հետո ես մեկ-երկու անգամ զանգեցի նրանց տուն, բայց ոչ ոք չպատասխանեց: Քանի որ ինքն էլ զանգ չէր տալիս, ենթադրեցի, որ քաղաքում չեն:

Կնոջս գրած հեռախոսի համարը ես առաջին անգամ էի տեսնում: Դանդաղ պտտելով հեռախոսի սկավառակը, հանկարծ զգացի տարօրինակ մի բան. կարծես Կարոն ապրում է անծանոթ քաղաքում, մեր միջև անսահման տարածություններ կան, կարծես նա ուրիշ, բոլորովին ուրիշ մարդ է: Բայց դա շատ կարճ տևեց: Հենց որ լսափողում հայտնվեց Կարոյի բամբ ձայնը, արյունս վեր թռավ, և նա դարձյալ ինձ մոտիկ էր ու հարազատ:

— Կարո, ո՛ր էիր կորել այսքան ժամանակ, — երբ բարև տվինք ու առանք, ասացի ես: — Հեռախոսդ էլ չէր պատասխանում:

— Նոր բնակարան եմ տեղափոխվել, Հարութ ջան, — ասաց Կարոն: — Աջափնյակից եկել եմ քաղաք, կենտրոն:

— Շնորհավորում եմ, քանի՞ սենյակ է:

— Երեք: Երկուսը հանձնեցի՝ երեքը ստացա:

— Բա ինչի՞ չէիր զանգում, հը՛:

— Այ մարդ, գլուխ քորելու ժամանակ չունեի, բնակարանն էինք նորոգում, հո բնակարան չէր, ավերակ էր, ավերակ:

— Առողջությունդ ինչպե՞ս է:

— Լալլ եմ, Հարութ ջան, դու հնց ես:  
 — Սիրտս է ծակում:  
 — Այ տղա, մարդու կնիկը բժշկուհի լինի, ինքը՝ բժիշկ, ու սիրտը ծակի:  
 — Բժիշկն էլ մարդ է:  
 — Լսիր, — ասաց Կարոն, — մեր թաղի ծերուկին հիշում ես, սպիտակ մորուքով, երեսին խոր սպի կար...  
 — Գեներալը...  
 — Ճիշտ է, մենք ընկեր գեներալ էինք ասում նրան:  
 — Իհարկե հիշում եմ, — ասացի ես: — Նա մի հին հրացան ուներ, իրենից էլ ծեր, փայտե կոթը սևացած, ճաքճաք, հրահանը չկար, կորել էր, փողը ժանգոտ:  
 — Փողը ժանգոտ...  
 — Չէս հիշում, նա պառկում էր գետնին՝ քարի ետևը, և մեզ ցույց տալիս, թե ինչպես պետք է պահել հրացանը, ինչպես նշան բռնել: Հետո մենք էինք պառկում: Մեր ամեն մի սխալը ջղայնացնում էր նրան: «Գլուխդ պահիր քարի ետևը, հրացանի կոթը ամուր սեղմիր ուսիդ, որ փողը չդողա: Քարն ու հրացանը քո մարմնի մասերն են, կայիր հողին, կայիր հողին»: Այնպես էր գոռում, կարծես կռվի դաշտում էինք, կարծես իսկական պատերազմ էր: Եվ երբ ամեն ինչ տեղը տեղին էր լինում, նա ձեռքը պարզում էր դեպի թիրախը, իսկ աջը թափով վերևից ներքև իջեցնելով, վրեժից, ատելութունից վառվող հայացքով հրամայում. «Կը-րակ»: Մենք քարկոծ էինք անում թիրախը և գոռում. «Բո՛ւմ, բո՛ւմ, բո՛ւմ, բո՛ւմ, բո՛ւմ»: Նա մեր թաղի բոլոր տղաներին և աղջիկներին հրացան բռնել սովորեցրեց:

- Աղջիկներին էլ:
- Նա ասում էր, որ մեր ամբողջ ժողովուրդը պետք է պատրաստ լինի կռվելու:
- Այ տղա, ինչ լավ հիշողություն ունես:
- Դու թիրախը հիշում ես, չէ:
- Սև թթի ծառը չէր:
- Կարո, բան չես հիշում:
- Ախր, քանի-քանի տարի է անցել, ինչքան ենք հեռացել մանկությունից, լուրջ մարդ ենք դարձել, ամեն մանրուք ղնց հիշես, — ասաց Կարոն:
- Թիրախը մանրուք չէր: Նա մարդ էր:
- Մարդ:
- Գեներալը արտաքնոցի կողքին մարդու խրտվիլակ էր կանգնեցրել:
- Հա... Հիշում եմ, արտաքնոցը, խրտվիլակը, հիշում եմ:
- Մարդաբոյ գերանը տնկել էր հողում, գազաթին մի մեծ դդում ամրացրել: Դդմի աչքերը ասես արյան մեջ էին, քիթը՝ գիշանգղի կտուց, ածուխով գծված շրթունքի տակ ժանիքներն էին, իսկական ժանիքներ, որ գեներալը քաշել-հանել էր չգիտեմ որտեղից, սատկած բորենիներից: Բայց ամենածիծաղելին ֆեսն էր:
- Ի՞նչ:
- Ամենածիծաղելին, ասում եմ, ֆեսն էր, որ ծածկում էր խրտվիլակի ուռած գլուխը:
- Ֆէսը:
- Չէս հիշում, խրտվիլակի գլխին ֆես կար: Նրա շորերը

արյունոտ էին: Լայն ու սև մեջկապից կախված էր մանգաղ-  
յաթաղանը: Գեներալը ասում էր, որ խրտվիլակն ուզում է մեզ  
բնաջնջել, տեսեք, ասում էր նա, ինչքան վայրենի է, ինչքան  
արյունախում, մենք պետք է սպանենք նրան, որ ապրենք: Մեկ  
էլ գոռում էր, թե դիպուկ չենք կրակում, էլ ի՞նչ զինվորներ ենք:  
Ինքն էր քար շարտում թիրախի վրա: Նրա քարերը միշտ  
կաչում էին ֆեսավորին, պատահում էր՝ գլխից թռցնում էին  
ֆեսը, և մենք ծիծաղում էինք: Բայց նա, չգիտեմ ինչու, չէր  
ծիծաղում:

Կարոն քահ-քահ ծիծաղեց:

Հիշողության ազդեցությամբ՝ ես էլ ծիծաղեցի:

— Հարու՞թ, — ծիծաղի վերջում ասաց Կարոն, —  
գեներալը, գիտե՞ս, մեռել է:

— Ե՞րբ է մեռել:

— Չգիտեմ... Վաղուց:

— Բա ինչի՞ չէիր ասում:

— Մոռացել եմ:

Գեներալի մահվան լուրն այնպես ազդեց վրաս, որ ես մի  
քանի վշտալի բառեր արտաբերեցի, բայց Կարոն, որքան  
կարողացա կռահել, բոլորովին չհուզվեց: Հասկանալի է,  
ծերուկի մահը նրա համար վաղուց ցավազերծված հիշողու-  
թյուն էր, իսկ իմ հոգում այն մղկտում էր նոր, շարժվող վերքի  
նման:

— Կարո, — ասացի ես նեղացած, — մեր կյանքում լինում  
են պահեր, որոնք չի կարելի մոռանալ:

— Լավ, մի փիլիսոփայիր, ամեն ինչ որ հիշենք,  
գլուխներս կպայթի, իսկ գլուխ պետք է ոչ շատ խելոք, ոչ շատ



հիմար, խելոք գլուխն էլ մի բան չի, — ասաց Կարոն: — Գիտե՞ս  
ինչի եմ զանգել:

— Հո՞:

— Այ մարդ, տարիներ առաջ, մի օր դռանս զանգը տվին,  
բացեմ տեսնեմ գեներալն է: Ոնց էլ տանս տեղը իմացել էր:  
Ներս հրավիրեցի, եկավ նստեց, թեյ-բան դրինք, խոսեցինք,  
հիշեցինք... Վերջում, թե՛ երկու խնդիրք ունեմ: Մի հաստ տետր  
դրեց սեղանին: Սա իմ կյանքի պատմությունն է՝ գրված իմ  
սեփական ձեռքով, — ասաց նա, — թող մնա քեզ մոտ, դու մեր  
թաղի ամենախելոք, ամենաուսումնական մարդն ես:

— Ամենաուսումնական...

— Վիրավորվեցիր, հա՛...

— Որովհետև ամենաուսումնականը չես, — ասացի  
վճռականորեն, — և ոչ էլ ամենախելոքը:

— Նրա խոսքերն են:

— Ամեն բան հալած յուղի տեղ մի ընդունիր: Նրա  
երկրորդ խնդրանքն ի՞նչ էր:

— Ցածր թռչակ էին տալիս, ուզում էր խոսեի սոցապի  
ընկերների հետ, որ մի քիչ բարձրացնեն: Ուրիշները, — ասում  
էր, — մեր երկրին մի մազ օգուտ չեն տվել, բայց ութսուն,  
հարյուր ռուբլի թռչակ են ստանում, ես, — ասում էր, —  
երեսուն տարի ջուր եմ բաժանել մարդկանց, աստված վկա է,  
մի կաթիլ անարդար բան չեմ արել, երկու համաշխարհային  
պատերազմի եմ մասնակցել, տասնյոթ գնդակ է կպել  
մարմնիս, հինգ անգամ էլ արյունս հանել է ասկյարի սուրը:  
Դեպուտատ ես, դատավոր, — մի կոպեկ ավելի չեմ ուզում, ինձ  
օրենքով ինչքան հասնում է, թող այնքան էլ տան:

— Եվ դու չօգնեցիր:

— Այ տղա, այնպես ես խոսում, ոնց որ լուսնից ես ընկել մեր քաղաքը: Սոցապը գիտե՞ս ինչ ցանց է:

— Բա իրավունքներդ...

— Դրանք իմ ձեռքերն ավելի են կապում, հասկացե՞ք, — ասաց Կարոն: — Ես պարտավոր եմ ծանր ու լուրջ լինել, հո չեմ կարող ինչ-որ մեկի մի քանի ռուբլու համար ընկնել սրանրա դուռը: Իսկ եթե մերժե՞ն... Իսկ եթե մերժե՞ն... Արժանապատվության խնդիր կա, Հարություն քան:

— Կարո Վռամյան, կարգին փչացել ես:

Նա ծիծաղեց, կարծելով, թե կատակ եմ անում, բայց այդ պահին ես դա ասացի ամենայն լրջությամբ:

— Հարութ...

— Հը...

— Գեներալի թոշակի համար չեմ զանգել, է, գերեզմանում թոշակը նրա ինչին է պետք: Դու հին-մին բաներ էլի սիրո՞ւմ ես:

— Աշխարհի համն ու հոտը հնի մեջ է, — ասացի ես: — Վերջերս սև շուկայից 1863 թվի օրացույց եմ առել, պատկերազարդ, գժվելու բան է:

— Լսիր, մի քանի օր առաջ գրքերս էի մաքրում, դասավորում, մեկ էլ աչքովս ընկավ գեներալի տետրը, իսկույն հիշեցի քեզ, — ասաց Կարոն, — ժամանակ կունենան, տամ աչքի անցկացրու:

— Մեծ ուրախությամբ:

Մենք պայմանավորվեցինք հանդիպել «Արաքս» սրճարանում՝ հաջորդ իսկ երեկոյան: Նա այդ թաղամասում

եր ապրում, իսկ մոտակայքում ես մի հիվանդ ունեի, տառապում էր սրտի և թոքերի հեղձուկով, մտածեցի նրան էլ տեսնել:

Դուռը բացեց հիվանդիս կինը: Իսկույն հասկացա, որ նա վախճանվել է: Ճաշասենյակի պատին նրա լուսանկարն էր՝ սև ժապավենով շրջանակված: Ես դուրս ելա փողոց: Ծանր ու տխուր մտքեր էին պաշարել ինձ:

«Արաքս» սրճարանը կիսադատարկ էր: Ես մի գալթաթ սուրճ առա և նստեցի պատուհանի մոտ: Ապակու ետևում մարդիկ կարկինե ոտքերով չափչփում էին ասֆալտը:

Յուրաքանչյուր ումպից հետո բաժակի շուրջբոլորը գեղեցիկ նախշեր էին մնում:

Վերջապես Կարոն եկավ:

— Վեր կաց, վեր, — առույգ ու զվարթ մոտենալով, ասաց նա: — Աիդան գաթա է թխել, հնդկական թեյ ենք խմելու:

Կարապի լճի մոտ նա, իմ տևական լռությունը նկատելով, հարցրեց.

— Լսիր, հո տրամադրությունդ վատ չի:

— Մահացել է հիվանդներիցս մեկը, քիչ առաջ իմացա:

Ջահել էր: Երեք երեխա ունի:

— Այ տղա, մահը մարդու համար է, — ասաց նա: — Երեխաներն էլ կմեծանան, հիմա ղվ չի մեծանում: Դու նարդուց խոսիր, այնպես ջարդ տամ:

Ես նարդուն չմոտեցա, թեև Կարոն շատ ստիպեց: Թեյ խմեցինք: Կարոյի նոր բնակարանում պակաս բան չկար: Աչքդ ղր գցեիր՝ շողշողում էր: Ես սրտանց ուրախացա նրա ապահով, գեղեցիկ ու հարմարավետ կենցաղի համար:

Դա հաստ, կեղտոտ թերթերով, արդեն քայքայված մի տետր էր, որը, իհարկե, հարմար չէր գալիս Կարոյի գրապահարանում զինվորների նման զգաստ կանգնած ոսկետառ կողերով գրքերին:

— Ուզում ես սրանից ազատվել, էլի...

— Ինչ ես ասում, Հարութ ջան, մեր գեներալի ձեռագիրն է: Ճիշտն ասած, խիղճս տանջում էր, որ թոշակի հարցում չօգնեցի նրան, իսկ տետրը, տեսնում ես, այսքան տարի պահել եմ, տես, ամեն բանը տեղին է, չփչացնես, հնա:

Տրամվայում ասեղ գցելու տեղ չկար: Մատներս կառչել էին վերևի բռնակից, իսկ մյուս ձեռքով պայուսակն էի պահում, որտեղ արյան ճնշումը չափող գործիքն էր, լսափողակը, մի քանի դեղեր, սպիտակ խալաթս և գեներալի տետրը: Տրամվայի պատուհանի մուրթ ապակու մեջ ես տեսնում էի իմ հիվանդի աչքերը, նա չգիտեր, որ մահվան է դատապարտված, և, երևի, մահանալիս, հույսով է նայել իր ապագային: Մեկ էլ խաբկանքը ցնդում էր՝ տեղը զիջելով ուրիշ հիշողության, որ ինձ տանում էր ավելի հեռու՝ դեպի մեր հին թաղը, և այս անգամ ապակու մեջ գծագրվում էր գեներալի ծերունական խոր կնճիռներում դեռևս կրակ պահպանող դեմքը: Կարելի էր պատկերացնել, թե ինչ տղամարդ է եղել նա երիտասարդության ժամանակ:

Ես տուն հասա բավականին ուշ և իսկույն պառկեցի քնելու, դարձյալ մտածելով հիվանդիս մասին: Նրա հոգին հիմա թափառում է երկնքում, — շնջում էի ես, — նա արդեն ազատվել է երկրային ցավերից ու հոգսերից: Այդ միտքը հեռացրեց սրտիս ծանրացած քարը, և ես քնեցի:

Մի քանի շաբաթ ես ազատ բուսե չէի գտնում՝ ձեռքս վերցնելու գեներալի տետրը, որ պայուսակից հանել էի ու դրել պատուհանի գոգին: Լույսը բացվում էր թե չէ՝ սկսվում էր իմ ծանր օրը, որ տանջված ու ջղային դադար էր առնում ուշ գիշերին միայն:

Դա զարմանալի ձեռագիր էր: Տառերը գանգուր էին, ոլորուն պոչերով, թվում էր՝ մոտենում, փաթաթվում են քեզ: Ես միշտ կարծել էի, որ տառը ոչինչ է, ինչ է տառը, անկենդան գիծ, որ թանաքը թողնում է թղթին, բայց հանկարծ տեսա, որ, չէ, տառը խոսում է մարդու հետ և նույնիսկ, որոշ դեպքերում, նրան ենթարկում իր ազդեցությանը: Չգիտեմ ինչու մտածեցի, որ դրանք հայ տառեր են, նրանց ձևերից չէր ծնվել այդ միտքը, այլ էությունից, ինչ-որ աներևույթ, հարազատ բան կար նրանց մեջ, որ առինքնում էր, կարծես ձայն տալիս ինձ: Տեղն ու տեղն էլ եզրակացրի, որ հայերեն գրված ամեն տառ հայ չէ: Գեներալը գրում էր հիմնականում առանց ջնջումների, իսկ երբ որևէ բառ կամ տող էր ջնջում, այնպես էր գծմծում, կարծես իր միտքը, իր զգացմունքը թաղում էր հողի խոր շերտերի մեջ, որ ոչ ոք չկարողանա հանել լույս աշխարհ:

Ես սկսեցի կարդալ:

Տետրի առաջին էջում գեներալն ասում էր, որ ինքը ծեր է («մոտեցել եմ հավիտենական քնարանիս»), արդեն չի կարողանում հրացան բռնել, բահն ուսին առած՝ քայլել առվի եզերքով, ոտքերը ծալվում են: («Բայց միտքս դեռ արթուն է»): Ինչո՞ւ են շատ ծերեր նարդի կամ տամա խաղալով ժամանակ վատնում, — հարցնում էր գեներալը, — չէ՞ որ ծերության տարիներին էլ կարելի է որևէ օգտակար գործ

անել: «Տեր-Հովակիմից եմ սովորել Մեսրոպի տառերը, քանի-քանի տարիներ են անցել, անցյալն արդեն մշուշների մեջ է: Ես սուրբ Մեսրոպի տառերով պիտի գրեմ իմ կյանքը, մշուշները մաքրեմ, մի մարդ էլ կարդա աշխարհում՝ զուր չէ»: Այդտեղ գեներալը նկարել էր իր հրացանը, այն հրացանը, որով ես մի հազար անգամ նշան էի բռնել ֆեսավորին: Ես նորից հիշեցի-տեսա իմ մանկությունը: Մեր թաղը, որ վաղուց մեռել էր մեծ քաղաքի փողոցներում, կինոյի նման լույս տվեց ու անցավ աչքերիս մոտով: Հիշեցի ծանոթ դեմքեր և այնպես կարոտեցի, կարոտի խորքերից ասես ալիքներ բարձրացան ու շառաչյունով փշրվեցին հոգուս ավերին:

Գեներալն ինձ տանում էր մի աշխարհ, որի մասին միայն լսել էի:

Երզնկացի էր մեր գեներալը, Եկեղյաց գավառից: Բարձր սարեր կային այնտեղ, խորագնաց ձորեր, որոնց հատակին նայելիս մարդ գլխապտուկյտ է ունենում, թվում էր՝ ուր որ է կգլորվես դեպի անդունդ, և ոչ ոք չի կարողանա քեզ փրկել, սարսափելի, բայց և այնքան քաղցր ու երանելի էր այդ թվացող մահը: Խոր ու տաք կիրճերում ծաղկում էին նշենին ու բալը, իսկ վերևներում աչքդ հասնում էր ձյան հավերժական սահմաններին: «Տեսնես մեր տունը մնում է, լուսամուտի տակ ինչ վարդեր կային, ինչ բույր ունեին նրանք, մեր քչքչան առուն, տեսնես մեր այգին կ՛, թե՛ ամեն բան դարձել է տատասկ ու փուշ, և հիմա օձերը, կարիճներն են բնավորվել»:

Ընդարձակ դաշտի միջով լուռ ու խաղաղ, զորավոր ու տիրական հոսում էր Եփրատ գետը:

Եփրատը արթնացնում էր մանկության քաղցր հուշեր, և

ապա՝ 1915-ի սարսափելի պատկերները: Գետը կարմիր է հագել, սրախողխող դիակներն է լվանում: Կանայք ու աղջիկները խումբ-խումբ, գիրկընդխառն, ձեռք-ձեռքի նետվում են գետը՝ նրա խորքերում անաղարտ պահելու իրենց անունն ու պատիվը գորշ գայլերի բռնությունից: «Սիրելի եփրատ, — ասում էր գեներալը, — ատելի եփրատ»: Նրա ականջներում մանկության խաղերի ուրախ ու անհոգ աղաղակները խառնվում էին մահվան զարհուրելի ճիչերին, և սիրտը կտոր-կտոր էր լինում այդ ուրախության ու արհավիրքի միջև:

Իմ հոգում հուզմունքն ու հետաքրքրությունն այնքան մեծ էր, որ մեկ առաջ էի վազում, մեկ էլ ետ գալիս, նորից կարդում հուշատետրի արդեն ծանոթ էջերը: Գեներալն այնպես վառ գույներով էր նկարագրում իր անցյալը, այնքան կենդանի զգացմունք ներդնում յուրաքանչյուր տողի մեջ, որ ես շատ բան պարզ տեսնում էի:

Հեքեաթ, հեքեաթ պապս,  
Տաշտ մը կաթան շալակս,  
Աղուորիկ հարսը գավակս,  
Անոթնամ կաթան խաճնիմ,  
Ծառուղնամ հարսը պագնիմ:

Այդպես էին երգում նրա երկրում, որ նաև իմն էր, Կարոյինը, բոլոր հայերինը, որոնք մեռել են, և որոնք դեռ ապրում են, նաև այն հայերինը, որոնք ծնվելու են վաղը կամ հազար տարի հետո:

Կաղանդի գիշեր... Աղբյուրներից ոսկեջուր է թափվում,

աղջիկները լցնում են սափորները, լվացվում՝ հափատացած, թե կկատարվեն իրենց երազանքները: Եկեղեցիներում ժամերգությունը շարունակվում է մինչև լուսաբաց: «Շնորհավոր Նոր տարի և բարի Կաղանդ»: Բոլորը համբուրում են տան մեծի աջը, առնում նրա օրհնությունը: Ահա և Նոր տարվա սեղանը: Նախ և առաջ կտրում-բաժանում են Կաղանդի հացը, որտեղ երջանիկ դրամն է: Դրամը գտնում է մեկը, բայց բոլորն են երջանիկ: Սեղանին ոսպապուր կա, սալորապուր, ձիթայուղով կորկոտապուր կամ էրիշտապուր: Տանիքներին բացված լուսանցքներից երեխաները տոպրակ են կախում. «Մորթուր, մորթուր, կաղանդե զիս»:

«Ա՛խ... — մեկ էլ բացականչում էր գեներալը, — մի բուռ ձյուն լիներ մեր սարերից, հալվեր իմ մեջ, ու հետո, ու հետո աշխարհին մնաս բարով ասեի»:

Կիրակի էր, երեկո: Զանգահարեցի Կարոյին:

— Այո, Վռամյան... հո քնած չե՞իր:

— Հեռուստացույց եմ նայում, — ասաց նա:

— Լսիր, — ասացի, — գեներալը հետաքրքիր հիշողություններ է գրել, գիտե՞ս:

— Ի՞նչ գեներալ:

— Մեր գեներալը:

— Հա՛...

— Նա երզնկացի է, լողացել է Եփրատում, մեծ, խոր գետ է, Եփրատը անբաժան է մեր պանծմությունից, մեզնից:

— Հարուր...

— Հը...

— Ի՞նչ կարծիք ունես բոքսի մասին:



— Չեմ սիրում:

— Այ տղա, քսաներորդ դարը ոչ մի տեղ, ոչ մի տեղ այնպես լավ չի արտացոլվում, ինչպես բոքսում: Չտեսնված խաղ է, թե կարող ես, թե տղամարդ ես՝ հակառակորդիդ քիթ ու բերանը ջարդիր, տուր դնչին, վզակոթին, մարմինը տուր փռիր, սատկած մուկ դարձրու:

— Կարո...

— Ի՞նչ...

— Տես գեներալը ինչպես է նկարագրում իր ծննդավայրի բնությունը, կարդամ լսիր:

— Հետո, Հարութ ջան, բոքս եմ նայում, ես քեզ հետո կզանգեմ:

Կարոն չզանգահարեց ոչ այդ գիշեր, ոչ էլ հաջորդ օրերին:

Մի քանի օր էր անցել մեր այդ խոսակցությունից: Ինձ անսպասելիորեն գործուղեցին Մոսկվա՝ ընկերներիցս մեկի փոխարեն, որ հիվանդացել էր: Սեպտեմբերի սկզբին ես նորից մոտեցա գեներալի տետրին, որ հին ու արդեն մտերիմ ծանոթի պես բացվեց իմ առջև, և ինձ նույնիսկ թվաց, թե աչքերը ժպտում են:

«Մեր նահապետական տնից քառասուն մարդ էր դուրս գալիս, երդիկից օր ու գիշեր ծուխ էր բարձրանում, արյունոտ գարունից հետո ողջ մնացի միայն ես»:

Այն ժամանակ գեներալը տասնհինգ տարեկան էր: Բախտը նրան հանդիպեցնում է Ֆիդայի Մարտիրոսին և շուտով էլ բաժանում նրանց: Կռիվներում Մարտիրոսը ծանր վիրավոր-

վում է և մեռնում: Ահա թե ինչ էր գրում գեներալը իրենց այդ կարճատև ծանոթության մասին: «Նա ինձ գտավ մի թփի տակ՝ բզկտված և ուշակորույս, բերեց իր ծանոթ քրդի տուն, կերակրեց, հագցրեց: «Դու ոնց որ իմ եղբայրը լինես, — ասում էր նա, — որին տանջամահ արին ասկյարները»: Մի օր էլ եկավ ոտքից գլուխ արյան մեջ: «Ես գնում եմ էն աշխարհը, — իր հրացանը մեկնելով ինձ՝ ասաց Մարտիրոսը, — իմ տեղը կռվիր, ուրիշ փրկություն չկա, պիտի կռվենք, որ ապրենք, պիտի կռվենք, որ էրկիրը մնա, ժողովուրդը ապրի: Ես հուսով եմ մեռնում, որովհետև դու կաս»: Դա այն հրացանն էր, որից ես հետո երբեք, երբեք չբաժանվեցի»:

Կարդալով այս տողերը, սիրտս ալեկոծվեց. իմ մանկության տարիներին ես ֆեսավորի վրա կրակել եմ ֆիդայի Մարտիրոսի հրացանով, նրա հրացանի ջարդված կոթն է հպվել ուսիս, իմ ձախ աչքը այդ հրացանի նշանոցի միջով թռել է դեպի ֆեսավորը և կոկորդից բռնել, հաշիվ պահանջել, հաշիվ պահանջել 1915-ի համար, և երբ նա հաշիվ չի տվել, իմ ձախ աչքը նրա վիզը ոլորել է, գցել տակը, խեղդել, խեղդամահ արել նրան:

Հուշատետրի երկու, թե երեք թերթեր պոկված էին, իսկ հաջորդ էջին նկարված էր՝ ինչպես է հայ զինվորը, քարի ետև դարան մտած, թշնամուն նշան բռնում: Գեներալը նկարում էր՝ ինչպես բոլոր երեխաները, գիծը քաշում այնքան կենդանի, որ ես պարզ տեսնում էի, թե ինչ է անում առարկան:

Տեսրում շատ նկարներ կային, որոնք ես դիտում էի մեծ հետաքրքրությամբ: Քեմախի կամուրջը պատկերող նկարի տակ գրված էր. «Կամուրջը, ով գիտե, կկորչի, նկարը կմնա»:

Այնքան կարոտ կար գեներալի նկարներում: Նկարների ազդեցութեամբ՝ արյունս տխրում էր, և ես՝ լսում էի ինչ-որ ձայներ, կարծես սիրելի ու հարազատ ստվերներ էին անցնում հայացքիս միջով:

Պակաս հետաքրքիր չէին գեներալի դատողությունները զենքի և կռիվ մղելու ձևերի մասին: Հրացանը նա համարում էր զենքի իդեալական տեսակ. «Կրթված ժողովուրդը հրացան է գործածելու, իսկ վայրենիները, բռիները՝ յաթաղան»: Նա ասում էր, որ հայը դաշտերում չպետք է կռիվ մղի, որովհետև թշնամին շատ է, այլ ջանալու է նրան լեռները քաշել, կտրիճ տղաների խմբերով անսպասելի ջարդ տալ, գիշեր թե ցերեկ ջլատել նրա ուժերը: «Եթե դու լավ նշանառու ես և ճանաչում ես երկրիդ ամեն մի քարը, եթե կարողանում ես մարմինդ, գլուխդ պահել քարի ետևը, քարի գույն ընդունել, քարի պես սեղմել ատամներդ ու անշարժանալ, դու միշտ կսպանես թշնամուդ»: Լավ հիշում եմ, կարդալով այդ տողերը, ես ժպտացի, դրանք այնքան անհամատեղելի էին ատոմային ռումբերի մեր ժամանակին: Ի՞նչ պիտի ասեր մեր քարի գեներալը, եթե զարթներ ու տեսներ, թե ինչպիսի զենքերով են այժմ բանակները զինված: Այդ հարցը ինձ մի քանի օր հանգիստ չէր տալիս: Փողոցում, տանը, հիվանդանոցում ինձ հետաքրքրում էր գեներալի պատասխանը: Վերջապես, ես լսեցի այն: — Պարապ բաներ են, — ասում էր գեներալը ինձ, — հրացանը քարի, արդար ու հավերժական զենք է, նրա գնդակը սպանում է միայն հանցագործներին, հայը հրացանից ավելի հզոր զենք չի կարող ունենալ, որովհետև արդարամիտ է, հրացանը ամենահզորն է, մեր երկիրը իսկա-

կան հրացանի երկիր է, պահվիր քարի ետևը և կրակիր, քարը քո օգնականն է, սիրիր քարը, սիրիր հրացանը, լավ իմացիր քարի լեզուն:

Հաջորդ օրը ես մեր բժիշկներից մեկին հարցրի.

— Լսիր, ամենահզոր զենքը ո՞րն է:

— Ջրածնային ռումբը:

— Ինչի՞:

— Ոչնչացնում է անհամար թվով մարդկանց և առարկաներ:

— Դու հայ չես:

Նա զարմանքից չռեց ակնոցավոր աչքերը, կարծես ինձ առաջին անգամ էր տեսնում:

Գեներալը հարուստ ու հետաքրքիր մարտական ուղի էր անցել: Մասնակցել էր Մուշի, Սասունի և Ջեյթունի պաշտպանական կռիվներին: Դիմանի ճակատամարտում ասկյարի սուրը վիրավորել էր նրա դեմքը: Հուշատետրում ողբերգական ու հերոսական այնպիսի տեսարաններ կային, որոնք, համոզված եմ, ամենաքար սրտերն էլ կշարժեին տեղից. «Ես շատ ասկյար եմ այն աշխարհ ուղարկել, բայց չեմ սպանել ոչ մի թուրք կին, ոչ մի թուրք երեխա, ոչ մի թուրք ծերունի: Իմ խիղճը աստծո առջև մաքուր է: Ես չեմ սպանել ոչ մի մարդ, որ նախահարձակ չի եղել»:

Այդ օրերին երեկոյան դեմ տրուլեյբուսով տուն գնալիս փողոցում տեսա Կարոյին՝ ինչ-որ մարդու հետ: Հաջորդ կանգառում ես ցած իջա և արագ քայլեցի նրանց կողմը: Նկատելով ինձ, Կարոն նշանացի հասկացրեց՝ հեռու մնամ ու սպասեմ: Մի կես ժամ նրանք ցածրաձայն զրուցում էին: Ավելի

շատ անծանոթն էր խոսում լուրջ ու պատկառազորու կեցվածքով: Կարոն անընդհատ շարժում էր գլուխը, որ նշանակում էր, թե համաձայն է նրա խոսքերին: Նա գլխով համաձայնության նշան էր անում նույնիսկ այն ժամանակ, երբ հոգու խորքում համաձայն չէր, որովհետև, պարզ է, մարդ չի կարող մեկ ուրիշ մարդու բուրբ-բուրբ ասածներին համաձայնել: Վերջապես, հայելու պես շողացող, կաթնագույն մի «Վուլգա» կանգնեց նրանց մոտ, և մարդը, ձեռքով հրաժեշտ տալով Կարոյին, նստեց-գնաց:

— Կներես, Հարութ ջան, — արագ մոտենալով, ասաց Կարոն, — Արտեմ Սիրեկանյանն էր, — ասաց նա մի այնպիսի ձևով, կարծես հնարավոր չէ, որ մարդ նրան չիմանա:

Մենք քայլեցինք:

— Էլի տխուր ես, այ մարդ, միշտ տխուր ես: Ի՞նչ կա-չկա:

— Ամեն օր ծերանում ենք, — ասացի ես...

— Ոչ թե մենք ենք ծերանում, այլ մեզ ծերացնում են:

Մենք ուրիշներին ենք ծերացնում, ուրիշները՝ մեզ: Դու ինձնից լավ կիմանաս, առաջներում, հին-հին ժամանակներում մարդիկ իրար այսքան հալածել են: Ազնիվ խոսք, երբեմն զարմանում եմ՝ ինչպե՞ս է, որ չենք մեռնում ու շարունակում ենք ապրել:

— Մարդիկ միշտ էլ իրար հալածել են:

— Ախր, մենք հեչ մարդ չենք, — ասաց Կարոն: —

Առողջությունդ ղնց է, առողջությունդ: Իմը, վերջերս, լավ չի, սիրտս խփում է, ծակում, ոնց որ շամփուր խրես, հատկապես, երբ մի բանից ջղայնանում եմ: Ջղայնանում եմ, սիրտս ծակում է, թուլանում եմ:

- Ներոզ է, մարդկության կեսից շատը ներոզ ունի:
- Ուրեմն ես մենակ չեմ:
- Մենակ չես:
- Դե լավ է, թե չէ որ ցավը բռնում է, այնպես եմ հուսահատվում, այնպես եմ վախենում, թե կմեռնեմ, այնպես եմ հուսահատվում:
- Ամենապակասը երկու միլիարդ մարդ քեզ հետ է:
- Դե շատ լավ է: Քոնը ղնց է, քոնը: Էլի ծակում է, չէ:
- Ժամանակ կ'ա այդ մասին մտածելու: Ամբողջ օրը հիվանդանոցում եմ: Երեկոներն էլ թերթ եմ նայում, գիրք կարդում, չկարդամ՝ ժամանակից ետ կընկնես: Գեներալի հիշողությունները շուտով կվերջացնեմ: Ինչ մարդ է եղել, ինչ մարդ է եղել:
- Ո՛վ:
- Մեր գեներալը:
- Այ, հիմա խփում է, — ասաց Կարոն և ձեռքը դրեց սրտին:
- Ուշադրություն մի դարձրու: Սիրտը չի սիրում, երբ իր մասին մտածում են:
- Գործերս հեչ լավ չեն, Հարութ ջան: Այս անգամ չեն ուզում թեկնածությունս առաջադրել:
- Ի՞նչ թեկնածություն:
- Չեն ուզում ժողդատավոր մնամ, իսկ ես հույս ունեի ավելի վերև գնալ:
- Հիմա էլ թող ուրիշը ժողդատավոր լինի:
- Ախր, ինչի՞, այդ ուրիշը ինձնից լավն է:
- Դատավոր ես ծնվել:

— Դատավոր չես ծնվել, բայց դատավոր եմ մեռնելու, —  
հանկարծ բարկացավ Կարոն:

— Այ, դրանից էլ սիրտդ ծակում է:

— Թող ծակի: Դու ինձ չես հասկանում: Երբ մի անգամ  
դատավոր ես դառնում, հետո այնքան դժվար է դատավոր  
չլինել: Բ՛ա... Իսկ ես տասնհինգ տարվա ժողդատավոր եմ,  
միայն մեկ անգամ է ընդմիջում եղել: Ի՛նչ ծանր ընդմիջում էր:  
Դու բան չես հասկանում, է, դու նույնիսկ սրտիդ ծակոցը չես  
զգում, տնաշեն: Դատավոր չես, ուրեմն դեպուտատ էլ չես  
լինի: Պատկերացրու, մարդիկ ինչպե՞ս կնայեն ինձ, եթե վաղը  
աթոռից ընկնեմ, մարդիկ կծիծաղեն, կբամբասեն, կարհա-  
մարհեն, էլ չեն վախենա ինձնից: Գիտե՞ս ինչ քաղցր բան է  
ուրիշների բախտը տնօրինելը, բոլորը քեզ են նայում, բոլորը  
սպասում են, թե ինչ է ասելու բերանդ: Պատահում է՝ նույնիսկ  
մտածում ես, թե աշխարհը, երկրագունդը ոչ թե տիեզերքի  
ուժերն են պտտում իր առանցքի ու արևի շուրջը, այլ դու, դու  
ես պտտում, քո գլխով, քո ձեռքերով, քո լեզվով:

— Եթե վաղը դատավոր չլինես, իսկ դա կլինի շատ  
արդար բան, որովհետև դու իրավունքների ծառայեցնում ես  
միայն քո շահին, ես քեզ ավելի կհարգեմ:

— Սրիկա, — ասաց Կարոն: — Գնանք խմենք:

Մտանք ռեստորան:

— Ես նախանձում եմ քեզ, — ուշ ժամին, երբ արդեն  
կարգին հարբել էր, ասաց Կարոն, — նախանձում եմ քո  
ազատությանը, դու, դու ազատ մարդ ես, հասկանո՞ւմ ես,  
ազատ, ազատ... Բայց ես էլ, ես էլ ուժեղ մարդ եմ, ես, ես  
Արտեմ Սիրեկանյան ունեմ, Արտեմ Իվանիչ Սիրեկանյան...

Թող, թող ոչ ոք, ոչ ոք չմտածի, թե Վռամյանը, ես, ես, արդեն կորած մարդ եմ, անտեր, անտիրական, ուզենան կընտրեն, ուզենան՝ չէ... Ո՛չ, Հարութջան, ո՛չ... Վերջին խոսքը իմն է, իմը, իմը, իմը... — և Կարոն ձեռքի երկարավիզ բաժակը խփեց սեղանին ու կոտրեց:

Հաջորդ օրը սկսվեց սրտաբանության հարցերին նվիրված համամիութենական գիտաժողովը: Գիտաժողովը ցույց տվեց, որ, նկատի ունենալով մարդկանց կյանքի հետըզհետե մեծացող լարվածությունը, սրտանոթային հիվանդությունները առաջիկա տարիներին պետք է ավելի շատանան ու տարածվեն, սրտաբաններին կանգնեցնելով չափազանց դժվարին խնդիրների առջև: «Եթե աշխարհը շարունակի այսպես արագորեն փոխվել, տեսք, թե ինչ է կատարվում մարդու բնական միջավայրի՝ օդի, ջրի և հողի հետ, ես էլ չեմ խոսում զգացմունքային, հոգեբանական ու մտավոր անհամար գրգիռների քայքայիչ ուժի մասին, որ ծանրանում է մեր նյարդային ցանցի յուրաքանչյուր կետի վրա, — ասաց մուկոլյան զեկուցողներից մեկը, — շուտով կստեղծվի այնպիսի վիճակ, որ մենք՝ բժիշկներս, արդեն էական ոչինչ անել չենք կարողանա սրտանոթային հիվանդությունների դեմ, ինչպիսի տեխնիկական միջոցներ ու վարպետություն էլ ունենանք»:

Սարդարապատի ճակատամարտից հետո մեր գեներալը ինքն իրեն հարցնում է. «Մենք հաղթեցինք, թե՛ օսմանցին: Կարող է կարծվել, թե մենք պարտվեցինք՝ հազարավոր անմեղ զոհեր, արգավանդ դաշտերի, լեռների, գետերի, անտառների և արևաշող հովիտների կորուստ, բայց ես այսպես չեմ՝ մտածում: Մեկնկես, երկու միլիոն հայ դեռ ապրում է, իսկ



Երկիրը պատսպարվել է մեր սրտերի մեջ, որտեղից նրան բնավ չի կարելի խլել: Երկիրը սրտից ինչպես կհանես: Մենք հաղթեցինք, որովհետև Երկիրը կա, ժողովուրդ կա, որ շատանալու է, հիշողություն կա, վրեժ կա, նպատակ կա: Օսմանցին պարտվեց, օսմանցին, որովհետև աշխարհում մենք կանք»:

Հայաստանը խորհրդային դառնալու լուրը ցնծությամբ է լցնում գեներալի հոգին: Այդ ժամանակ Ալեքսանդրապոլում էր: Նա գալիս է Երևան և օրերով թափառում քաղաքի փողոցներում՝ հրացանն ուսն արած, սվինին՝ կարմիր ժապավեն: Այստեղ նա իր ձեռքով տուն է շինում՝ ճիշտ և ճիշտ Երզնկայի իրենց տան պես, ծառեր տնկում: Նրա տան ու այգու շուրջն էլ աստիճանաբար ստեղծվում է մեր թաղը:

Հուշատետրից դարձյալ մի քանի թերթ պոկված էր: Հաջորդ էջին գեներալը նկարել էր իր տան ճակատը՝ հարթ տանիք, երկու ցածրիկ պատուհաններ, կիսաբաց մի դուռ: (Դուռը կիսաբաց անելով, գեներալը ցանկացել է ասել, — մտածեցի ես, — որ իր տունը պատրաստ է ուրախությամբ հյուրընկալելու բոլոր ազնիվ ու բարի մարդկանց): Տան կողքը թոնրատունն էր, քիչ հեռու՝ մարագը և օժանդակ ուրիշ հարմարություններ: Թոնրատան պատի տակ մի մեծ քար կար՝ մեջը փոս: Սիրտս կրկին ալեկոծվեց. ախր. դա սանդն էր, որի մեջ մեր ամբողջ թաղը ցորեն էր ծեծում՝ բլղուրի ու ձավարի համար: Որքան եմ ես ծանր սանդակոթը բարձրացրել գլխիցս վեր ու, շունչս դուրս փչելով, ուժգնությամբ իջեցրել սանդին: Հուշը ինձ տարավ ետ դեպի այն բյուրեղյա տարիները, և ես ամեն ինչ կտայի, որպեսզի թեկուզ մեկ օրով վերադառնայի այնտեղ:



«Մահ, ավեր տեսած մարդ ես, հոգիդ արդար է, խիղճդ՝ մաքուր, մեր ջրբաշխը դարձիր», — խնդրեցին նրան հարևանները: Նա ջուրը բաժանում էր այնքան արդարամտորեն, որ թաղում ոչ մի անգամ կռիվ-վիճաբանություն չեղավ: Առավոտից գիշեր նա ման էր գալիս ջրի եզերքով, մաքրում առուները տիղմից և քարերից, մի տեղ՝ ծառի բուկն էր խորացնում-լայնացնում, որ ջուր շատ հավաքվի, մի ուրիշ տեղ՝ քաղհանում մուխխոտը: Նրա աչքն անսխալ որոշում էր, թե որ բույսը ինչքան է ծարավ: Նա կարծես խոսում էր կանաչների հետ: Նրան հաճախ կարելի էր տեսնել մեծ ընկուզենու շվաքում, գլուխը բնին, աչքերը փակ, բահի կոթը գրկած: «Քնած էիր», — հարցնում էին անցորդները, երբ նա ոտնաձայնից աչքերը բացում էր: «Գնացել էի երկիր», — միշտ լինում էր պատասխանը:

1941-ի ամռանը՝ մեր երկրի վրա Գերմանիայի հարձակումից անմիջապես հետո, գեներալը պատից իջեցնում է իր հրացանը, ուսն առնում, գնում ներկայանում շրջանային զինկոմիտեին և խնդրում՝ իրեն ռազմաճակատ ուղարկել: «Հնարավոր չի», — ասում է զինկոմը: «Ինչո՞ւ», — ասում է մեր գեներալը: «Ծեր մարդ ես, քեզնից ինչ կռվող», — նրան ոտից գլուխ չափելով, ասում է զինկոմը: «Իմ արյունը եռ է գալիս, ես բնավ չեմ վրիպում, իմ սրտում վրեժ կա», — ասում է գեներալը: Նա նշան է բռնում ճախրող ծիծեռնակին, պրկում հրացանի ձգանը, բայց չի կրակում: «Հը...», — ասում է զինկոմը: «Ազնիվ թռչուն է, գեղեցիկ է, մեղք է», — ասում է մեր գեներալը՝ հրացանն իջեցնելով: «Տուն գնա», — ասում է զինկոմը: «Հապա հայրենիքը ղվ է

պաշտպանելու», — մտահոգված ասում է գեներալը: «Այս տղաները», — ասում է զինկոմը, մատնացույց անելով շարք կանգնած նորակոչիկներին: «Հայրենիքը ձեր սրտերում պահած կռվեք, մտքում աղոթքի պես միշտ կրկնեք հայրենիքի անունը, և դուք կհաղթեք, և ձեզ ոչինչ չի պատահի», — տղաներին մոտենալով, ասում է գեներալը:

Այդ տարիների հիշողություններում մեր գեներալը կարծես երիտասարդանում էր, նրա սիրտը խփում էր կայտառ, համաչափ ու վստահորեն, ուղեղը պայծառանում էր, զգացմունքները կյանքի կենդանի երևույթների ազդեցությամբ լարվում էին և ամբողջ օրգանիզմը պահում արթուն վիճակում:

Գիշերը նա մտքով ռազմաճակատներում էր, ոգևորում էր հայ տղաներին, հորդորում չխնայել թշնամուն, որոնք թուրանական գորշ գայլերին մեր անմեղ նախնիների վրա գրգռող գերմանացիների որդիներն են: Իսկ ցերեկները թաղի երեխաներին գեներալը հրացան բռնել էր սովորեցնում, քարի ետևը պատսպարվելու, ֆեսավորին գնդակահար անելու հմտություն:

1945 թվականի մայիսի 9-ը մեր գեներալի ամենաերջանիկ օրն էր: «Վերջապես, ես լուծեցի հորս վրեժը, որին գայլերը հոշոտեցին գերմանացի սպայի ժպտացող աչքերի առաջ»:

Հուշատետրի այդ մասում երկու լուսանկար էր փակցված: Գեներալը, հրացանը ձեռքին, հաղթանակով տուն դարձած մեր թաղի զինվորների հետ: Եվ գեներալը, դարձյալ հրացանը ձեռքին, այն հայրերի ու մայրերի հետ, որոնց

տղաներն ընկել էին ռազմի դաշտերում: Դեմքին, ամբողջ կեցվածքում վեհություն և հանդիսավորություն կար, որ արդյունքն էր այն խոր, մանկական ու անկեղծ հավատի, թե ինքն էլ է տարիներ շարունակ ցերեկ ու գիշեր կռվել թշնամու դեմ, ինքն էլ է անմիջաբար մասնակցել նրա ջախջախմանը:

Հիշողությունները շարունակվում էին ևս մի քանի էջ, բայց դրանք մանր ու անկարևոր բաների մասին էին, և ես վաղուց մոռացել եմ: Այդտեղից միայն մի նախադասություն եմ լավ հիշում. «Ապրում եմ Երզնկայի համար, մինչև նորից չտեսնեմ՝ չեմ մեռնելու»:

Նա մեռավ Երզնկայից հեռու, բայց նրա հետ, և, երևի, դա մահվան գրկում երջանկացրեց նրան: Այդպես լինում է, գիտե՞ք: Ես հոգեվարք ապրող մարդիկ եմ տեսել, որոնք ժպտացել են: Ո՛վ գիտե, թե այդ վերջին պահին ինչ երանելի պատկերներ են շարժվել նրանց հոգում:

Ինչո՞ւ գեներալն ամբողջ կյանքում ապրեց մենակ՝ առանց կնոջ ու երեխաների: Նրա ճակատագրով մարդը նախ և առաջ ձգտելու էր ընտանիք կազմել, շատանալ, նոր արմատներ արձակել հայրենի հողում: Գուցե ամեն օր սպասել է, որ ահա-ահա կվերադառնա իր ծննդավայրը և այնտեղ, միայն այնտեղ տուն-տեղ կդնի, այդպես սպասել է և մի օր էլ տեսել, որ արդեն ծեր է: Կամ գուցե մի աղջիկ է եղել՝ երկար ծամերով, որին մանկության, պատանեկության այն հեռավոր տարիներից լուռ սիրել է, այնքան թանկ ու անկրկնելի պատկեր, որ նա չի վստահել նույնիսկ իր հուշատետրին ու պահել է սրտի խորքերում: Հարցը պատասխան չունեի, որովհետև ուներ միմյանց համազոր մի քանի պատասխան-

ներ, և դա հուշատետրը շղարշում էր կենդանի, մարդկային խորհրդավորությամբ:

Մի օր երեկոյան կողմ ես զանգեցի Կարոյին: Հեռախոսափողում լսվեց Աիդայի զրնգուն ծիծաղը:

— Աիդա, բարև, Կարոն տանն է:

— Նա զբաղված է, ո՞վ է հարցնում:

— Ես եմ, Հարութը:

Քիչ անց լսվեց Կարոյի ծիծաղը, և ծիծաղի միջից նա հարցրեց, թե ով եմ, թեև Աիդան նրան հեռախոսի մոտ կանչելիս տվել էր անունս:

— Հարութն է, — ասացի ես, — ձայնս էլ եք մոռացել:

— Այ տղա, — բացականչեց Կարոն, — որտե՞ղ ես կորել, է: Հենց հիմա, շուտ, Գոհարի հետ մի տաքսի նստեք, եկեք ինձ մոտ:

— Գոհարը տանը չի:

— Դու արի, շուտ մի տաքսի նստիր՝ արի:

— Ի՞նչ է պատահել: Ինչի՞ եք ծիծաղում:

— Ընկերները եկել են ինձ շնորհավորելու: Ժողդատավոր եմ վերընտրվել: Աիդան սեղան է գցում: Շուտ արի, օսետրինա կա, ամեն ինչ կա, չեխական գարեջուր: Աիդա, խավիար ունենք, չէ... Խավիար էլ կա, սուջուկս, բաստուրմա: Ժամանակ մի կորցրու, այ մարդ, սպասում ենք:

— Չեմ կարող, Կարո, — ասացի ես, — քանչորս ժամ հիվանդանոցում եմ եղել: Շատ հոգնած եմ:

— Արի իրար հետ մի բրուդերշաֆտ խմենք:

— Ուրիշ անգամ:

— Բա չէս ուզում եղբորդ շնորհավորել:

- Շնորհավորում եմ:
  - Երրորդ անգամ ժողովուրդը ինձ դատավոր է ընտրում, անընդմեջ, Հարութ ջան, գիտե՞ս ինչ պատիվ է: Բա չե՞ս ուզում ուրախությունս կիսել:
  - Ուրիշ անգամ:
  - Բա էսօրվա օրը մի բաժակ բան իրար հետ չխմե՞նք:
  - Չեմ կարող, Կարո:
  - Մեղքը քո վիզը, — ասաց Կարոն և ծիծաղեց:
  - Հուշատետրը վերջացրել եմ, — ասացի ես:
  - Ի՞նչ հուշատետր:
  - Գեներալի հուշատետրը:
  - Գեներալի:
  - Դու հուշատետր տվիր ինձ, որ կարդամ:
  - Ես քեզ տե՞տր եմ տվել:
  - Վայ, — բարկացա ես, — մեր գեներալի հուշատետրը, ցնդե՞լ ես, ինչ է:
  - Մեր գեներալի...
  - Այս քանի օրը կվերադարձնեմ:
  - Թող մնա ձեր տանը, — ասաց Կարոն, — նվիրում եմ: Ես չպատասխանեցի:
  - Հիմա ե՞րբ ենք իրար հետ մի բրուդերշաֆտ խմում, — հարցրեց Կարոն:
  - Ես լռում էի:
  - Հեչ մարդ չես, Հարութ ջան, — ասաց Կարոն:
- Աչքերս սևեռել էի հեռախոսին, կարծես Կարոն այնտեղ էր՝ այդ դեղին, գնզգնզուն տուփի մեջ, կենդանի Կարոն ժամանակակից Կարոն, իմ մանկության ընկեր Կարոն:

...Հիմա չեմ հիշում, թե քանի տարի էր անցել այդ ժամանակից: Մի օր մեր քաղաքում ես բուլորովին պատահաբար տեսա մի շարժվող պատկեր, որն էլ իմ ուղեղում հանկարծ արթնացրեց այս ամբողջ պատմությունը: Տարօրինակն այն էր, որ դրանք ոչ մի առնչություն չունեին իրար հետ:

Սաստիկ շոգ էր: Շենքերն ասես տաքություն էին արտաշնչում: Ասֆալտին թրթռում էր օդի շիկացած շերտը: Անհամար ավտոմեքենաների ու մարդկանց բազմության մեջ մի թխակարմիր ձի քաշում էր քառանիվ սայլը, որը բեռնավորված էր մետաղի ջարդոնով մահճակալի ժանգոտ գլուխներ, հեծանիվի ծոմոված կմախքներ և իրենց կյանքն ապրած ուրիշ շատ բան: Ձին ոչ ծեր էր, ոչ էլ երիտասարդ, բավականին գեղեցիկ էր, դեռևս ամուր ու սլացիկ ոտքերով, աչքերը՝ փայլկոուն, այդ բեռը ամենևին չէր սազում նրան, մանավանդ՝ սայլապանը, որ ավելի բորբոսի էր նման, քան մարդու: Բայց ես նրան նկատեցի և ընդմիջտ պահեցի մըտքումս ուրիշ բանի համար:

Նա քաշում էր իր ծանր և անհետաքրքիր բեռը՝ առանց ուշադրություն դարձնելու փողոցի շարժուն ու աղմկոտ կյանքին: Քաշում էր լրջորեն, գլուխը վեհաբար առաջ պարզած, քաշում մկանների ազնիվ ու անկեղծ լարումով, իր գործին նախանձելի նվիրվածությամբ: Նա քաշում էր սայլը, և թվում էր՝ մի մտահոգություն ունի միայն՝ բեռը ժամանակին ու ապահով տեղ հասցնել:

Ջարմանալի ձի էր:





## ՏՈՒՆԸ ԵՎ ՀՈՂԸ

Զավենը ոտքի վրա հարյուր գրամի չափ օղի խմեց, մտածելով ուր որ է ծանոթ ու բարեկամ կգան աչքալույսի: Սիրտն ուրախությունից թպրտաց, հենց որ պատկերացրեց, թե ինչպես են նրանք վիթխարի քաղաքի տարբեր փողոցներով շտապում պահ առաջ տեղ հասնել: Իր աշխատանքային ընկերները՝ գլխավոր հաշվապահը, հեռագրիչը, ծանրոց ընդունողը, նամակատարը, երևի, փոստի բաժանմունքն արդեն փակեցին և նույնպես աճապարում են: Դեմքին երջանիկ ժպիտ խաղաց. հաճախորդները ներող կլինեն, մեծ աշխարհ է, իրենց էլ կպատահի:

Նրա խնդության պատճառը ոչ միայն անցած գիշեր

երկրորդ տղա ունենալն էր, այլև այն, որ բժշկի կարծիքին հակառակ՝ Սրբուհին ամեն ինչ բարեհաջող տարավ: Ինչ տաժանելի ցերեկներ ու գիշերներ անցկացրին իրենք վերջին երկու ամսում: Փոստատան իր մասում նստած՝ նա մտքով ու զգացմունքով ցավոտ գալիքի հետ էր: «Ո՛նց ես, Ջավեն», — մի բան ասած լինելու համար հաճախ հարցնում էին այցելուները: «Լավ չեմ», — միշտ անկեղծորեն պատասխանում էր նա, կարծելով, թե դիմացիները գիտեն, որ Սրբուհու սիրտը հիվանդ է, ծննդաբերելը՝ շատ վտանգավոր: Բայց այդ «լավ չեմ»-ը հասկացվում էր իբրև «լավ եմ»-ի պես անփութորեն դեն շարտված խոսք: Եվ բաժանվում էին առանց գլխի ընկնելու, որ չեն ըմբռնել իրար:

Բավականին երկար ժամանակ նա պատուհանից նայում էր դուրս՝ իրենց բակի երկնքին, որտեղ լողում էին գույնզգույն վագրներ: Հետո նորից մոտեցավ սեղանին և բաժակը օղի լցրեց: Խմեց կնճռոտվելով, զզվանքով, բայց վերջում ծուռ ժպտաց օղու շշին:

Նրանք արդեն քառասունին էին մոտենում, երբ ամուսնացան: Թեև Սրբուհին անբարետես է, երբեմն ակնարկում են (թող լինի այդպես), բայց ունի աննման հոգի: Իր սիրային-ամուսնական բացատրությունը հիշելով, նա շիկնեց, որովհետև դա չափազանց միամիտ ու ծիծաղելի էր ստացվել: Երբ երեկ գիշեր մանկաբարձուհին եկավ ասաց, որ երեխայի ու մոր առողջական վիճակը լավ է, նա այնքան ուրախացավ, որ նրա բուռը մի տասանոց խցկեց, որից վեց հատ ցերեկը փոստի անկիզելի պահարանից էր վերցրել՝ աշխատավարձին կրկին տեղը դնելու պայմանով:

Արդեն շատ էին ուշանում: Կայարանից տրամվայով մեկ ժամ... Աջափնյակից՝ մեկ ժամ քսան րոպե... Կենտրոնից՝ մեկ ժամ... Գործարանային թաղամասից՝ մեկ ժամ քառասուն րոպե... Աստիճանաբար, ուղեղը իրերն ու երևույթները ընկալում էր իրենց բնական վիճակներով, և շուտով նա հասկացավ, որ ոչ ոք էլ չի գալու: Պարզ հաշիվ էր՝ նա մարդկանց իմաց չէր տվել իր ուրախության մասին: Այդքան հեռվից նրանք չէին իմանալին: Ինքը գիտի, թե հիմա որտեղ սուգ կա: Բայց անպայման կլինի: Առանց դրան էլ ի՞նչ աշխարհ: Եվ ընդվզեց սեփական անձի դեմ, որ ամեն բան տակ ու գլուխ էր արել:

Հուսահատ ու բարկացած՝ Ջավենը նստեց սեղանի մոտ և քաղաքավարության բոլոր կանոններով խմեց ու կերավ: Նա ոչ կարգին խմող էր և ոչ էլ օրինավոր ուտող: Խմում էր դեպքից դեպք՝ Նոր տարուն, որևէ մեկի ծննդին, հյուր ընդունելիս՝ խմածն էլ մի կում, բաժակ չխկացնելու չափ, կենացը չվիրավորելու համար:

Նա ծանրորեն կանգնեց, տնտղեց տան բոլոր ծակուծուկերը, որտեղ Արամը կարող էր որևէ պատրվակով թաքնված լինել, ինչպես անում էր հաճախ՝ մեղք գործելիս կամ երևակայորեն խաղալիս: Ապա խոհանոցի միջով դառն ու դատարկ դուրս եկավ մեծ պատշգամբ. գուցե թե բակում լինի:

Շենքը պայտաձև էր՝ թևերում հի՞նգ, իսկ միջնամասում, որը բավականին երկար տարածություն էր գրավում, ութը հարկ: Արևի թունդ ժամանակն էր: Վերևում ինչ-որ մեկը սապնաջրի պղպջակներ էր բաց թողնում:

Ջավենը ձայն տվեց հեռվում խաղացող երեխաներին, որպեսզի որդու տեղն իմանա, սակայն նրանցից ոչ ոք գլուխը

չթեքեց: Նա արդեն իջնում էր աստիճաններով և կարդում բնակարանների դռներին փակցված ազգանունները, որոնցից շատերին դեռ չէր հասցրել ծանոթանալ:

— Ո՛ւր էիր, — շրջվելով և Արամին հանդիպելով խստորեն վրա բերեց Ջավենը, մի տեսակ խստուրթյուն, որը նրան բոլորովին չէր սազում:

— Պապիկի մոտ էի, — պատասխանեց տղան:

— Դու պապ չունես, — խոժոռվեց Ջավենը, և աշխարհը խմիչքի ուժից պտտվեց: — Հորդ կողմից պապդ, ողորմի իրեն, աչքը խփեց, երբ դու չէիր ծնվել: Իսկ մորդ գծով պապդ անցած տարի հանգավ, չէս հիշում:

— Իմ պապիկը ապրում է, դու չգիտես, — ասաց տղան: — Երեկ նա ինձ քսան կոպեկ տվեց, և ես պաղպաղակ կերա: Թե չես հավատում, գնանք տես: Նա բոլորին էլ արևածաղկի ու պաղպաղակի փող է տալիս: Իսկ այսօր, գիտե՞ս, Աննային նվիրեց մի չտեսնված, կարմիր-կապույտ գնդակ:

Բարձր շենքերի ստվերում կուչ էր եկել խրճիթը, ճակատին՝ «Կոշիկ ներկեմ և վերանորոգեմ» ծուռումուռ ցուցանակ:

— Սա իմ պապիկն է, — շշնջաց տղան, հոր հետ ցցվելով լայն բացված դռան առջև:

Ներսում ծերունին տղամարդու կոշիկի կրունկն էր խարտոցով կոկում: Նա բարձրացրեց գլուխը և եկվորներին հեզաբարո ժպտաց: Հետո նորից երկտակվեց գր.թծի վրա՝ ինչքան որ ուժ կար մարմնի մեջ: Վերջացնելով կոկելը, կրունկը թքոտեց և սկսեց փայտյա հարմարանքով փայլեցնել: Ստացվեց ոնց որ խանութից նոր-նոր գնած ապրանք:

— Սա մեր արյունից չէ, — զկռտալով ասաց Ջավենը: —

Քո պապերը իրենց կյանքը վեր են դրել, քանի անգամ կրկնեմ:  
Շատ լավ կլիներ կենդանի լինեին և քեզ մեկ-մեկ տանեին  
գազանանոց: Թե չէ ես, տեսնում ես, չէ՛, ժամանակ չունեմ:

Արամը, երևի, հասկացավ, որ արյունը լուրջ բան է, և  
տխրեց:

Կոշիկը կախ տալով պատին խփված մեխից, ծերունին մի  
գլանակ փաթաթեց: Ափը մեծ էր, կոշտ ու լայնածավալ՝  
հաստ երակներով ու խոր սպիներով:

— Քոնն է, — ծուխը քթածակերից հանելով՝ հետաքրք-  
րովեց ծերունին:

— Բա ումն է... — հպարտացավ Ջավենը:

— Լավ տղա է, խելոք ու աչքաբաց, — ծերունու մազ-  
մըզոտ դեմքը ժպտում էր: — Արհեստի սեր ունի: Ով ունի  
արհեստի սեր, բնավ չի կորչի դժվար աշխարհում: Քիչ առաջ,  
կոշկատակի ներս ընկած մեխերն այնպես վարպետորեն  
քաշեց-հանեց, որ նախանձս եկավ: Նշանավոր մարդ է դառ-  
նալու:

— Իմ ապրանքի գինը ես ավելի լավ գիտեմ, — փքվեց  
Ջավենը: — Անունդ ինչ է:

— Անհունս... Անունս աղա Թորոս է, — մանր-մանր ծիծա-  
ղեց ծերունին: — Ամերիկայի Դեթրոյթ քաղաքում պարսիկ  
Խալիլի կար, հրաշալի մարդ, աստժո օրը խանութումս էր,  
սուրճ էր բերել տալիս և ասում. «Եղբայր պատվական, սիրում  
եմ անունդ և շքանունդ, ոնց էլ գտել ես»:

— Թորոս աղա, — Ջավենը զկռտաց, — շահագործում ես  
միամիտ երեխաներին, չեմ թողնի:

Արամը հիմա ամեն բան ավելի խոշոր էր տեսնում:



— Կյանքիս մեծ մասը միս-մենակ եմ ապրել, — հանդարտ խոսեց ծերունին: — Մորս ու հորս սպանեցին երզնկայում: Լսած կլինես, երևելի քաղաք է. պարզ երկնքի տակ, Եփրատի ջրերին մոտիկ: Եկեղեցիներ ու դպրոցներ՝ հնչքան ուզես... Ուներ վիթխարի շուկա՝ անհամար խանութներով ու արհեստանոցներով, մարդաշատ ու աղմուկոտ: Հիմնականում զենք և սպասք էր արտահանում, ներմուծում էր գորգ և կերպաս...

Նա մի ախ քաշեց. դա սովորական ձայն չէր, այլ հոգու խորքերից բարձրացած կարոտի, սիրո ու տառապանքի մի մրմուռ, որ նման էր խրխինջի:

Ծերունին ծոցից հանեց ծալովի մի դանակ, բացեց զգուշորեն և դրեց գործասեղանին: Երզնկացի էր, կոթը՝ նախշազարդ սադափ, որ ժամանակին, անշուշտ, ավելի փայլփլուն էր եղել:

— Քրոջս՝ Մարիամին, ու եղբորս՝ Մարտիրոսին, փախեփախի ձանապարհին կորցրի, — շարունակեց նա: — Բազմության ետևից ընկած, մեկից հաց խնդրելով, մյուսից՝ ջուր, կիսանոթի ու պապակ մի օր էլ մտանք Վան: Սակայն Վանը չէր մեր վերջնակետը: Վանը իր ցավերն ուներ: Պետք է գնայինք Ղարս, հետո հասնեինք Ալեքսանդրապոլ: Լսել էինք, ռուսները ազնիվ ու ձեռնբաց մարդիկ են, ավեր, սպանություն չեն անում: Մի փոքրիկ, ցամաք գյուղում դադար առանք: Մարիամին թողինք մի փակ դռան մոտ, տերերը տունը լքել էին, և գնացինք կեր ձարելու: Ես աջ գնացի, Մարտիրոսը՝ ձախ, որ եթե ինձ չհաջողվի որևէ բան գտնել, գոնե նա բերի: Փողոցներն ու բակերը ամայի էին: Շուն էլ չկար: Որ դուռը

ծեծեցի, ձայն տվող չեղավ: Չնայած տապ էր, պատուհանները գոց էին, վախ ազդելու աստիճան լուռ ու մունջ: — Մի քանի բառ ասելով, նա ընկնում էր մտածմունքի գիրկը, հետո, սթափվելով, շարունակում: — Բավական ժամանակ էր անցել, արևը արդեն թեքվել էր, երբ հետ դարձա: Մարիամը չկար: Չկար Մարիամը: Մարտիրոսն էլ չկար: Դռանը նույն կողպեքն էր՝ մեծ, ծանր ու ժանգոտ: Մինչև լույս չկարողացա աչք փակել: Շեմին կուչ եկած, ձայներ էի լսում և դողդողում: Խաբկանք էր, վախվորած ուղեղի զառանցանք: Իրականում գյուղը թաղված էր խավարի ու լռության մեջ: Մեկ շաբաթ... հա... մեկ շաբաթ մնացի այդտեղ: Փոշոտ գաղթականներ հայտնվեցին: Կարճ ժամանակ հանգստացան և շարժվեցին դեպի արևելակողմ: Ես էլ հետները: Ում հարցնում էի եղբորս ու քրոջս մասին, գլուխն էր բացասաբար տարուբերում: Ոչ տեսել էին, ոչ լսել: Ով գիտե, թուրքերը վրա տվին նրանց, թե՞ քուրդ ավազակախմբերը:

Նա գործասեղանից վերցրեց դանակը, փակեց նույնքան զգուշորեն և տեղավորեց ծոցում՝ սրտին մոտիկ:

Ջավենը տխրեց, ավելի թուլացավ ու հարբեց: Հայրն էլ էր նույնպիսի պատմություններ անում, երբ մեկն ու մեկը հյուր էր գալիս: Իգդիրցի Չարչոլյան Սեդրակ կար, նա էլ էր սիրում հիշողությանը զոռ տալ տեղն եկած տեղը: Կար Սրբուկ խանում, նա էլ նման բաներ շատ գիտեր: «Բավ է, կին, վերքերս խշխշացնես, — աղաչում էր ամուսինը, — ներկայի վրա տրամախոսիր»: «Մարդ, բավ չէ, — բռնկվում էր խանումը և ավելի առաջ գնում, — մինչև իսկ գերեզմանում չպիտի լռեմ»: Քանի-քանիսը մեռան պատմելով:



Արամը շփոթվել էր ու կարկամել: Նրա համար միշտ կրկեսն էր եղել առեղծված, իսկ հիմա լսածն էր հանելուկ:

— Ինչ երկայնաբանեմ ու գլուխդ ցավեցնեմ, — այնուամենայնիվ ձգձգեց ծերունին: — Շատ երկրներում ու քաղաքներում եղա, բուլորն էլ պաղ ու օտար: Երբեք հանգիստ ու ապահով տեղ չգտա, չէ: Աստված ինձ կարծես թափառելու և տանջվելու համար էր ստեղծել միայն: Գիտեմ, կհարցնես, թե ինչու չեմ կարգվել... «Կարգվիր, աղա Թորոս, բավ է չոր գլուխ ապրես, — հանդիմանում էին ծանոթները, աղջիկ էին բերում-տանում, — աշխարհի օրենքն է»: Չէ, սիրտս փակվել էր ու էլ չէր բացվում: — Նա երկար ու իմաստալից լռեց, ապա թեթևացած ասաց: — Սա իմ հայրենիքն է, հիսունյոթ տարի փափագեցի: Երնեկ քեզ, հազար երնեկ, որ չգիտես ինչ կնշանակի հայրենիքի կարոտանք: Հոգիդ վառում է, աչքդ դարձնում ծով: Սա իմ տունն է: Ծուխը մարած այնպիսի մարդու համար, ինչպիսին ես եմ, սա էլ շատ է: Իմ տունը... հավատս չի գալիս... Ինչ անուշ խոսք է...

Ջավենը հարբած-հարբած լաց էր լինում: Թվում էր, վերջին բոպեներին ավելի փոքրացավ: Արամը խանդաղատագին քսվեց հորը և խղճաց հնակարկատին, որի հայացքում դեռ խորունկ տխրություն կար:

Երկնքում ռեակտիվ ինքնաթիռներ հայտնվեցին: Զբոսայգու փողային նվագախումբը փչեց հանդիսավոր քայլերգ: Շինհրապարակում տիրականորեն կանգնած վերամբարձ կռունկը մատը ծանր ու դանդաղ թեքեց և զրնգաց. բանվորներին զգուշացնում էր՝ օդում կախված ծանրության տակից հեռանալ:

- Եւ իմ պապիկն է, — վճռականութեամբ ասաց Արամը:
- Իսկական, — հաստատեց Ջավենը:

Ինքնաթիռների հռնդյունը կտրվեց: Եվագախումբը դարձար առավ: Վերամբարձ կռունկը բեռը բարեհաջող հասցրեց տեղ:

— Սարքի... — ձախ ոտքից կոշիկը հանելով և ծերունուն մեկնելով, խնդրեց Ջավենը:

— Սարքելու բան չկա, նոփ-նոր է, — կոշիկը տնտղելուց հետո, եզրակացրեց ծերունին: — Հա, նալ խփեմ:

— Տուն վազիր և ինչքան կոշիկ կա բեր, — հրամայեց Ջավենը որդուն:

— Եալը լավն է, — թխկթխկացնում և բարձրաձայն մտածում էր ծերունին: — Հարմար, շահավետ, ջրի գին: Կոշիկ է պահում: Եալած ավելի զգաստ ես, անսխալ, ոնց որ գինվորական:

— Եալը շատ լավն է:

— Տեսնես ո՞վ հնարեց նալը:

Քիչ անց Արամը վերադարձավ, բերելով չորս զույգ կանացի կոշիկ, երեք զույգ տղամարդու, հինգ զույգ մանկական, որոնք կրունկից էին ծուռ, թաթից էին ծակ, կողքից էին պատռված, աշնանային, ձմեռային, ամառային, տանու, ամենօրյա, թատրոնի: Առաջին անգամն էր այդքան կարևոր ու պատասխանատու հանձնարարություն կատարել, և սիրտն ուրախությունից տեղահան էր լինում:

— Արամ, — ասաց Ջավենը, — սրանից դենը հին ենք հագնելու:

— Հին կհագնենք, — ասաց Արամը:

— Չվով ու պոպոքով հին շոր, հին կոշիկ փոխողը թե նորից գա, կքշենք, — ասաց Ջավենը: — Անամոթի մեկն է:

— Չենք թողնի դռանը մոտենա, — ասաց Արամը:

— Մեզ էշի տեղ է դրել, — ասաց Ջավենը: — Փուչ պոպոք է տալիս ու հոտած ձու և հրաշալի ապրանքը տանում, դրան տես:

— Մեզ իսկական էշի տեղ է դրել, — ասաց Արամը:

— Հերիք ինչքան նոր հագանք, — ասաց Ջավենը, — մի քիչ էլ կարկատած հագնենք, չենք մեռնի:

— Ավելի լավ, — ասաց Արամը: — Հարձակվող կխաղամ, հոգնել եմ դարպասի առաջ կանգնելուց, կարկատած կոշիկով գոլ լավ է խփվում:

Նրանք ուզում էին, շատ էին ուզում հրաշքով աշխարհի կոշիկները միանգամից հնանային, և տերերը դրանք բերեին այստեղ՝ «Կոշիկ ներկեմ և վերանորոգեմ» խրճիթը, որպեսզի Թորոս աղան իր մնացած կյանքում առատ գործ ունենա ու երբեք չձանձրանա:

Խմիչքի ուժին միացավ ծերունու պատումի ողբերգությունը, և Ջավենը, այդ ուժից ու ողբերգությունից ցնցված, երջանիկ ու դժբախտ օրորվում էր: Հասնելով բակի կենտրոնը, նա կանգ առավ, նայեց շուրջ-բոլորը և, որքան եռանդ ուներ, գոռաց.

— Ժողով՛րդ... Ի՞նչ եք անբան վեր ընկել... Այստեղ մի կուլտուրական փինաչի կա... Հէյ... բերեք նալեք ձեր կոշիկները... Նալը հանձարեղ...

Արևը խորովում էր պատշգամբները: Ոչ ոք արձագանք չտվեց:

Հաջորդ օրը առավոտյան Ջավենը փոխանակ շենքի կամարի տակով դուրս գար փողոց, որտեղ քաղաք իջնող ավտոբուսի կանգառն էր, անցավ հնակարկատի արհեստանոց-տան առջևից, որպեսզի բարև տա ու բարև առնի: Երեկոյան վարվեց նույն կերպ: Նրա ճանապարհը քիչ երկարեց, բայց շատ քաղցրացավ: Միշտ նրան թվում էր՝ ծերուկը ոչ թե կոշիկ է կարկատում, այլ իր ծվեն-ծվեն հուշերը, հավաքում, կայցնում, շինում, լաքում՝ աշխարհով մեկ սփռելու համար:

Աշխատանքի գնալիս.

— Բարի լույս, Թորոս աղա:

— Բարի աջողում:

Աշխատանքից ետ դառնալիս.

— Բարի երեկո, Թորոս աղա:

— Աստճու բարին:

Անցավ երկու շաբաթ: Սրբուհին հիվանդանոցից տուն դարձավ նիհար, դալուկ, բայց երջանիկ: Մի քանի օր եկող-գնացող եղավ թվով հինգ մարդ: Հետո ամեն բան կրկին ամփոփվեց չորս պատի մեջ:

Հետագա իրադրությունը Ջավենի փոքր կյանքը ավելի մանրեց ու սեղմեց: Տղաբերքի ցավը որքան էլ կարճ ու թեթև՝ այնուամենայնիվ սրեց ու խորացրեց կնոջ հիվանդությունը: Մարմնավոր թուլությունը անպակաս էր, սրտի ցավերը հաճախակի դարձան, ամիս չէր լինում, որ շտապ օգնություն չկանչեին: Տան ամբողջ հոգսն ընկավ Ջավենի ուսերին: Լույսը հազիվ բացված՝ արդեն ոտքի վրա էր: Հաց ու կաթ էր բերում, վազում խանութ ու շուկա: Փայլեցնում էր հատակը,

սրբում փոշիները, անում այն ամենը, ինչով սկսվում է յուրաքանչյուր կանոնավոր ընտանիքի կենսատու օրը: Իսկ երեկոյան գործը քառապատկվում էր: Հարկավոր էր կեղտոտ ամանները մաքրաջրել, վերմակները թափ տալ, ինչը առավոտյան անել երբեք չէր հասցնում, նորածնին ձեռքի վրա այնքան ճոճել սենյակի երկայնքով, մինչև որ քնի: Քնում էր հազիվ կես ժամ: Ապա՝ նորից ու կրկին: Երկուսին մոտ երանությամբ հանվում էր ու պառկում՝ միշտ ուժաթափ և անզգա: Ամենածանրը, սակայն, այն օրերն էին, երբ շենքում ջուրը կտրվում էր կամ էլ չէր բարձրանում վերին հարկերը: Նա ջուրը կրում էր զբոսապարտեզի ետևի աղբյուրից, օրական տասնհինգ-քսան դոլլ: Տեղ ու դադար չունեի: Կիրակին գլխավոր մաքրության օրն էր, որովհետև շաբաթվա ընթացքում որքան էլ լվանում-թափում էին, դեռ շատ բան էր մնում անկատար:

Ստեպ-ստեպ ուշանում էր աշխատանքից, և կառավարիչը բանավոր նկատողություն էր անում. «Չի կարելի, ընկեր Ջավեն, պոչտ է, ախոռ չի», «Մարդ ասողիդ ինչն եմ ասել», «Եզրակացություն արա, ընկեր Ջավեն, աղի պես ես գալիս-գնում», «Օրենքն ես խախտում, հա՛, օրենքը խախտողիս տես»: Ջավենը լավ գիտեր, որ բանավորը մի գեղեցիկ օր էլ կդառնա գրավոր, և լուռ մտահոգվում էր ու նյարդայնանում:

Այնուհանդերձ մի առավոտ ոտքերը ինքնաբերաբար գնացին դեպի «Կոշիկ ներկեմ և վերանորոգեմ» խրճիթը: Դա նոյեմբերի վերջն էր: Անջատվեի աշխարհից, իջներ Ջանգվի ձորը, թափառեր դեղնած այգիներում, խաղար չոր

կանաչների հետ, իսկ երբ հոգներ, նստեր ապառաժ գետափին  
և գլուխը դներ տաք քարի վրա:

Խրճիթը փուլ էր եկել: Երկրաշարժն էլ այդպես չէր  
ավերի: Ծերունին չկար: Ջարդուփսոր աղյուսի ու հեծանի  
տակից երևում էր «Կոշիկ ներկեմ և վերանորոգեմ»-ի ծայրը:  
Ահռելի մի էքսկավատոր, դռդռալով ու փռնչալով, ծանր  
շերեփը բարձրացնում ու իջեցնում էր կիսականգուն  
պատերին, որոնք առանց որևէ դիմադրության իսկույն տեղի  
էին տալիս՝ կռանում ու փոշիանում: Երիտասարդ  
էքսկավատորավարը դժգոհ էր, անտրամադիր, որ փտած  
տան վրա հզոր մեքենա են գցել:

— Ինչի՞ ես քանդում, — այլևս չհամբերեց և գոռաց Ջա-  
վենը:

— Վերևից են կարգադրել, — թթված շարտեց մեքենա-  
վարը:

Ջավենը հարգում էր և վերևը, և ներքևը՝ խոսքը մեկեն  
կուլ տվեց, աչքերը ճպճպացին, խեղճացավ, առերևույթ  
համակերպվեց, բայց ներքուստ այրող ցավ էր զգում:

Ոչ ոք չգիտեր ծերունու տեղը: Ոմանք ասում էին՝  
Նոր Արեշում բնակարան է ստացել: Ոմանք էլ՝ թե մեռել է:  
Ոմանք հավատացնում էին, որ ամուսնացել և տեղափոխվել  
է կնոջ տունը՝ երկհարկանի, ընդարձակ պարտեզ, հավ,  
կով: Ոմանք էլ՝ թե գնացել դարձել է տերտեր:

Էքսկավատորավարը մի քսան րոպեում տունը քանդեց  
հիմնահատակ, և մեքենան շենքերի ստվերից դուրս եկավ  
կծվահոտ արձակելով: Իրար վրա անկանոն թափված քարի,

հողի, փայտի զանգված մնաց միայն, որից դժվար էր գուշակել, թե առաջ ինչ է եղել այդտեղ:

Պատահեց այնպես, որ ամենավերին հարկի կենվորներից մեկը չհասավ աղբակիր ավտոյին և աղտեղությունով լեփլեցուն դույլը տարավ դատարկեց փլատակի վրա: Նրա օրինակը շատերին խելքի մոտ թվաց: Մի շաբաթ հետո արդեն ավերակը դարձել էր հարուստ ու անթերի աղբանոց:

Ամբողջ ձմռանը աղբ էին թափում աղա Թորոսից մնացած միակ հետքին, թափում էին վաղ առավոտյան, ժամը տասներկուսի կողմերը, միջօրեին, մութն ընկնելուն պես, քնելուց առաջ, կեսգիշերին, արհամարհելով ու ծաղրելով աղբահավաքի զանգի զիլ ու հատու ձայնը, որ կանոնավորապես հնչում էր յուրաքանչյուր այգածագի:

Ջավենի առավոտյան պարտականությունների երկար ցուցակից մի կետ վերացավ: Առաջ նա իջնում էր բակ և սպասում աղբահավաքին՝ զանգը հնչել էր, ինքը չկար, մինչև մերձակա շենքերի հետ հաշիվը չփակեր, շնորհ չէր բերի, այդպես էր գտնում նպատակահարմար, տխմար նպատակահարմարություն: Իսկ հիմա նա իր գլխի տերն էր: Ինչ լավ է անկախ լինել, ազատ, համարձակ: Գնում պարպում էր աղտեղության ամանը, ուրիշի աղբից հանված թղթով ներսը սրբում ու թները թափահարելով, զվարթուն գալիս. ետ:

Գարնան սկզբին քար ու ավազ դիգեցին աղա Թորոսի տան փլատակների շուրջը: Լուրեր էին պտտվում, թե մանկապարտեզ են կառուցելու, դպրոց, սրճարան, լավաշի փուռ, հանրախանութ, նույնիսկ՝ կուլտուրայի պալատ: Միշտ աղբը թափելիս՝ Ջավենի բովանդակ էությունը հույսով և

ուրախութեամբ էր տոգորվում, երեխան ոտքի կկանգնի, հոգսը կթեթևանա, կուլտուրան մոտիկ, նորից լայն ու դուրեկան հունով կընթանա կյանքը:

Մի առավոտ էլ, երբ Ջավենը սովորականի պես արագ-արագ անցավ բակի միջով և գործնական քայլերով մոտեցավ աղբանոցին, նրա ճանապարհը փակեցին երեք հոգի: Կերպարանքներից երևում էր, որ շինարարներ են: Գործիքները դրել էին գետնին և բացբերան կանգնել:

— Չե՞ս ամաչում, — հուզմունքից դողացող ձայնով ասաց նրանցից տարեցը:

— Բա սա անելի՞ն բան է, — աղբախառն ավազը մատնացույց անելով, ասաց միջահասակը:

— Քեզնից ի՞նչ սովորեմ, — գլուխը օրորելով ասաց երիտասարդը:

Մի կողմը հարձակվում էր, մյուսը՝ պաշտպանվում, բացատրում, արդարանում, իսկ երբ ոչինչ դուրս չէր գալիս, նույնիսկ դիմում մոլեգին հակագրոհի, կարծես աղբը փլատակին լցնելու իրավունքի պահպանման մեջ էր նրա կյանքի համակ իմաստը: Կիճաբանության ընթացքում, որը գնալով վտանգավոր ուղղություն էր ընդունում, Ջավենը հարմար ակնթարթ որսաց և, շաղ տալով աղտեղությունը, հապշտապ չքվեց: Բայց դա ամենավերջինը եղավ:

Ամբողջ ամռանը շինում էին: Ասում էին՝ Ֆինանսավորում չկա: Ֆինանսավորում, իհարկե, կար, սակայն բարակմարակ առվի նման էր գալիս:

Թաղի բնակիչները այնքան ձանձրացան ու զզվեցին այդ ձգձգվող շինարարությունից, որ նույնիսկ համաձայն էին



ախոռ լինի, միայն թե շուտ վերջանա, որպեսզի պարզ ու որոշակի դառնա իրենց վիճակը: Բայց այն, ինչ կառուցվեց, ամեն երևակայությունից դուրս էր:

Պատուհան չուներ, տափարակ տանիքից հաստ մետաղալարեր էին ելնում, բրոնզապատ երկաթյա դուռ ուներ: Մի օր նկարիչ եկավ, դռանը նկարեց մարդու շանթահար զանգ և արմանք-զարմանք կտրած, սրտաճաք ու զարհուրադեմ Ջավենի ներկայությամբ տակը գրեց.

Բարձր լարվածություն:

Ապա.

Ձեռք չտալ:

Եվ հետո.

Մահացու է:



## ՀՐԱԹԵՇՏ ԵՐԿՐԻՆ

Շատ-շատ տարիներ առաջ իմ Մարտիրոս հայրը երգնկա քաղաքից, որն ամեն հայի սրտումն է, հասել էր Տրապիզոն, այդտեղից էլ, հսկա բեռնանավում թաքնված, իրեն գցել Բաթումի: Դա մի դժվար ճամփորդություն էր եղել:

Նա և քուրդ ուղեկցորդը քայլում էին գիշերները, որ մարդ արարածի չհանդիպեն: Իսկ հենց լույսը բացվում էր, արևը շողշողում լեռների լանջերին, նրանք իրենց հոգնաբեկ ոտքերին դադար էին տալիս:

Հորս այդ տխուր հիշողություններում, որոնք նա շղթա

արած պատմում էր մեր տուն եկող-գնացողի, քուրդը ամենալուսավոր կետն էր:

Յերեկները նա հորս թաքցնում էր մացառուտում կամ քարերի ետևը, իսկ ինքը, թափառաշրջիկ ձևանալով, հրացանի կաշեփոկն ունն արած, գնում մոտիկ բնակավայրերը՝ ջուր, հաց, երբեմն էլ կաթ բերելու:

Ճանապարհների փոշին հորս դարձրել էր հողե մարդ, հողոտ էր ոտքից գլուխ, հողագույն, կարծես հող ու քարից շինված: Երբ նա քարի ետևում կուչ էր գալիս ու պահում շունչը, ասում էր՝ արծվի աչքն անգամ իրեն չէր կարող նկատել գետնի երեսին:

— Եղբայր, գորշ գայլը ինչ է ուզում քեզնից, — հարցրել էր քուրդը:

Հայրս չէր պատասխանել: Դարձյալ քայլել էին, քայլել, ու քուրդը ասել էր.

— Սիրտդ արև ծագի:

Լեռների ձյունոտ բարձունքներից հայրս նայել էր ետ՝ իր անցած ճանապարհին, և հեռու հեռվում, կապույտ ու թափանցիկ մշուշների մեջ տեսել Երզնկայի դաշտը և մի արծաթ գոտի դաշտի մեջքին: Նա գլխի էր ընկել, որ դա Եփրատն է՝ իր մանկության գետը:

Օրեր անց, լուսաբացին նրանք հասել էին ծովեզերք: Հայրս պատմում էր, որ, ծովը տեսնելով, ինքը շատ էր զարմացել. նրա մտքով իսկ չէր անցնում, թե դեռ կարող է այդքան մաքուր ու խաղաղ տեսարան գոյություն ունենալ աշխարհի երեսին:

Քուրդը հորս պահ էր տվել իր ծանոթին և գնացել քաղաք

այնպիսի նավաստի գտնելու, որը հանձն առներ նրան ապահովաբար հասցնել Ռուսաստանի կողմերը:

Տրապիզոնը մեծ ու աղմկոտ քաղաք էր: Ամեն ազգության մարդ կարելի էր հանդիպել փողոցներում: Աշխարհի բոլոր ծայրերից նավեր էին գալիս ու խարիսխ գցում այնտեղ:

— Ամերիկա գնացող նավ կա, — մի երեկո տուն մտնելով, ասել էր քուրդը, — չե՞ս ուզում Ամերիկա գնալ:

— Չէ, — ասել էր հայրս, — Ամերիկա չեմ ուզում:

— Քեզ համար մեկ չի:

— Չէ:

— Ինչի:

— Ամերիկան երկրից շատ հեռու է:

— Ես այնպիսի մի նավ կձարեմ, որը քեզ տանի Ռուսաստան, ուրիշ ոչ մի տեղ, — հորս միտքը հասկացել էր քուրդը: — Վստահ եղիր:

— Շնորհակալություն, — հուզվել էր հայրս: — Դժբախտությունը հեռու մնա ձեր տնից:

Օրերը անցնում էին, բայց Ռուսաստան մեկնող հարմար նավ քուրդը չէր կարողանում գտնել:

— Կառավարությունը հրաման է արձակել, բոլոր փախստականներին և նրանց հովանավորներին տեղնուտեղը հրացանի են բռնում, — մի օր էլ հայտնեց քուրդը: — Նավաստիները զգուշանում են: Բոլոր նավերը ստուգվում են ծով ելնելուց առաջ: Բայց ես, եղբայր, հույսս չեմ կտրում:

Հայրս լռակյաց էր դարձել: Նա մտածում էր՝ գուցե ելնի տնից, և տանտերն է ահ ու դողի մեջ, և քուրդն է մեղք, գնա ետ, քայլի լեռներով, իրենց դաշտով, Եփրատի ափերով,

քայլի, քայլի և վերադառնա երգնկա, իրենց թաղը, վերջին շնչով ընկնի իրենց շեմին... Հետո գորշ գայլը կգա, հոտոտելով կգա, կհոշոտի իր տառապած մարմինը:

Այդպիսի հուսահատ պահի դուռը լայն բացվել էր, և ուրախ-ուրախ ներս էր մտել քուրդը:

— Երեք օրից գնում ես: Մարդը համաձայնեց տասը կարմիրով քեզ հանել Բաթումի: Գինը թանկացրել են, առաջ վեցով, շատ-շատ յոթով էին տանում:

— Ո՞վ է:

— Այստեղից է, նավաստի-բեռնակիր:

— Ռո՞ւս է:

— ... Ոչ...

— Կսպանի ինձ:

— Ես նրան ասացի՝ դու իմ եղբայրն ես: Եթե մազիդ ձեռք տա, իր տունը կրակի ճարակ կդարձնեմ:

Քուրդի աչքերում վրիժառության կայծեր էին երևացել:

— Ես նրան երկու ոսկի տվի, ասացի՝ մնացածը դու կտաս այնտեղ, ափ դուրս գալուց հետո, քո մոտ փող ամենևին չկա, մնացած ոսկին այնտեղ գտնվող մեր երրորդ եղբայրը պիտի տա քեզ:

Ինչ-որ մեկը թխկթխկացրել էր հորս կուրծքը: Դա սիրտն էր:

— Նավը շաբաթ գիշեր պիտի մեկնի: Դու հայերեն չգիտես:

Հայրս լռել էր:

— Դու քուրդ ես:

Հայրս կախել էր գլուխը:

— Դու թրքերեն մեկ-երկու բառ գիտես միայն:

Հայրս սեղմել էր ատամներն ու մռայլվել:

— Թող ինքը իր իմացած քրդերենով քեզ հետ խոսի:

Շաբաթ օրը նավը ծով դուրս չեկավ և ոչ էլ կիրակի ու երկուշաբթի. բեռնումը ձգձգվում էր:

Մի գիշեր էլ հայրս ու քուրդը հյուրընկալ տնից ելել էին և նեղլիկ, մութ փողոցներով արագ քայլել դեպի նավահանգիստ: Հայրս նրան յոթը ոսկի էր մեկնել՝ նրա տվածը նավաստի-բեռնակրին և ուղեկցորդի իր վարձը: Քուրդը փողը հաշվել էր, մի քիչ մտածել, տխրել և հինգը վերադարձրել էր հորս:

— Ի՞նչ ես անում, — զարմացել էր հայրս:

— Քեզ պետք կգա, — ասել էր նա:

— Վարձդ է:

— Քեզ բարի ճանապարհ:

Շատ տարիներ հետո, հանդիպելով իր մի քանի հայրենակիցներին, հայրս իմացել էր, որ քուրդը ոչ մեկից փող չի վերցրել: Միշտ պայմանավորվում էին գնի մասին, մինչև անգամ սակարկում, իսկ ճանապարհի վերջում, բաժանվելիս, նա հրաժարվում էր փողից: Ամեն անգամ քուրդը երդվում էր, որ այդ վտանգավոր, անշահավետ գործով այլևս չպիտի զբաղվի, սակայն հենց որ խնդրում էին, առնում էր ուսապարկն ու հրացանը և նորից ճանապարհ ելնում:

Հայրս լավ հիշողություն ուներ. հիշում էր երկրի ամեն մի քարը, ծառն ու թուփը, դեպքերն ու հետաքրքիր, հաճախ այնքան ողբերգական պատմությունները, որոնք մարդու սիրտը տակնուվրա էին անում, հոգիդ լցվում էր անսահման

վրեժով ու ատելութեամբ և, ավելի շատ, սիրով, դու սիրում էիր քո մեռածներին ու ողջերին, նույնիսկ նրանց, ովքեր դեռ չեն ծնվել, այդ սերը քեզ հետ էր օրնիբուն և մրմռում, ցավում էր:

Փողոցներից մեկում նրանց դիմավորել էր մի մարդ և նշանացի հասկացրել՝ գալ իր ետևից: Նա էր՝ նավաստի-բեռնակիրը: Միջին տարիքի էր ու հաղթանդամ, շարժվում էր ծանր քայլերով, հարբածի պես և առանց ետ նայելու:

Այդպես աննկատ ու լուռ, մի կես ժամ քայլել էին և դուրս եկել քաղաքից: Ծովը չէր երևում, բայց զգացվում էր, որ հեռու չէ: Ահագին ժամանակ էլ գնացել էին ամառի տարածություններով: Հայրս ու քուրդը արդեն սկսել էին անհանգստանալ: Վերջապես, թուրքը զառիթափով արագ իջել էր ցած՝ ուղիղ ծովեզերք:

Վայրի ծովախորշի ցից ժայռի տակ թիամակույկ կար: Նա ճարակորեն ցատկել էր մեջը և հորս ձեռքով արել: Հայրս եղբայրաբար հրաժեշտ էր տվել քուրդին՝ նրանք գրկախառնըվել էին, բայց չէին ասել ոչ մի խոսք:

Իր ճամփորդության հետևյալ մասը հիշելիս՝ հայրս միշտ սիգարետ էր վառում:

Մակույկում ինքն էր և նա, իսկ շուրջը՝ ծովը: Նա թիավարում էր հանգիստ ու ինքնավստահ՝ կարծես ծովը իրենն էր, կարծես ամբողջ աշխարհը իրենն էր, ամբողջ երկինքը, որ այդ ժամանակ ամպոտ էր ու ցուրտ: Հայրս չէր տեսնում նրա աչքերը, որովհետև նա մեջքով էր դարձած իրեն:

— Հո հայ չե՞ս, — երբ ափը մնացել էր հեռվում, առանց շրջվելու հարցրել էր նա:





— Չէ... — դողացել էր հորս ձայնը:

Հայրս իրեն չէր ներում. քանի-քանի անգամ է դառնութ-  
յամբ ասել ինձ, որ ավելի լավ կլիներ ծովի հատակը գնար,  
քան այդպես ուրանար հարազատ արյունը:

— Ոչինչ, — հանգստացնում էի ես նրան, — չէ՛ որ դա մի  
վայրկյան է եղել:

— Միևնույն է, — ասում էր նա, — վայրկյանն էլ հավիտե-  
նականությունն է:

Թուրքի ձայնը նորից էր հնչել ծանր ու սառը:

— Եղբայրդ քեզ սպասո՞ւմ է... Տեսեք, հա... Ես իմ կյանքն  
եմ վտանգում... Տեսեք, հա... Որ բռնվեցի, վերջ...

Շուտով մթության մեջ երևացել էր բեռնանավի ուրվա-  
գիծը: Նրանք ընդհուպ մոտեցել էին նավին և լողացել նրա  
երկայնքով: Թուրքը ինչ-որ բան էր փնտրում: Վերջապես գտել  
էր: Դա տախտակամածից կախված հաստ մի պարան էր, որը  
նա, ըստ երևույթին, վաղօրոք էր պատրաստել:

Նա ծանր ու դանդաղ մագլցել էր պարանով: Շատ  
չանցած հայրս լսել էր նրա զգուշավոր սուլոցը:

Ոտքերին ու ձեռքերին ուժ տալով, հայրս էլ էր  
բարձրացել վերև:

— Ահա քո թաքստոցը, — բեռների բլուրների մեջ մի  
անցք ցույց տալով, ասել էր նա, — այստեղ կմնաս, մինչև տեղ  
հասնենք: Հաց, ջուր ունենա:

— Մի քիչ հաց ունեմ, բայց ջուր չէ:

— Ես հիմա կտամ: Չայն-ձուն չհանես, կարող է նավը էլի  
ստուգեն, սվիններով ծակծկեն կապոցները, հանկարծ չգո-  
ռաս:

Հայրս մտքում խոստացել էր իրեն, որ եթե սվինը մինչև իսկ սիրտը մտնի, էլի ոչ մի ձայն չի հանի, ոչ մի ծպտուն, որովհետև իրենց մեծ գերդաստանից մնացել է միայն ինքը և պարտավոր է ապրել:

Նավը առավոտյան չէր լողացել Սև ծովի արձակ ջրերը, այլ կրկին մտել նավահանգիստ: Երևի որոշ բեռներ իջեցնում էին, նորերը բարձում և մի վերջին անգամ ստուգում նավի ծակուծուկերը:

Հայրս չգիտեր, թե քանի ժամ, գուցեև օր է անցել: Աղմուկ-աղաղակը, վերջապես, դադարել էր: Նավը գըվվում էր և թեթև տարուբերվում: Նա հասկացել էր, որ ճամփա են ելել:

— Ես երջանիկ էի ու դժբախտ, — ասում էր հայրս, — չգիտեմ ինչու էի այդպես երջանիկ ու դժբախտ:

Շուրջը սուր հոտ էր սփռված: Կռահել էր՝ Տրապիզոնի ծխախոտն է: Այդ հոտի մեջ ինչ-որ բան կար իր հողից, իր ջրից ու երկնքից, իր օդից, ու նա դեմքը ամուր հպել էր հսկա հակին և ներշնչել-ներշնչել մարմնի ողջ խորուրթյամբ, բոլոր ծալքերով:

Բաթումիի նավահանգստում կրկնվել էր այն, ինչ և Տրապիզոնում. մի մութ և փոթորկոտ գիշեր նավաստի-բեռնակիրը նրան մակույկ էր նստեցրել, և նրանք շարժվել էին դեպի ասի:

— Ուրեմն ոսկին քեզ մոտ էր, — զարմացել ու բարկացել էր թուրքը:

— Վերցրու, — հայրս նրան ութը ոսկի էր մեկնել:

— Լսիր, — ծուռ նայել էր թուրքը, և նրա աչքերում հայրս

տեսել էր իրեն ծանոթ պողպատյա փայլը, — վայ թե դու հայ ես:

Հայրս չէր պատասխանել: Եվ գիտե՞ք, թե ինչու. չէր ուզել, որ նա իմանա, թե ինչպես էր ինքը մի քանի օր առաջ ուրացել իր արյունը:

Այս ամենը կարող է հեքիաթ թվալ, սակայն ամենաճշմարիտ մի պատմություն է, որ ինչքան պատմական է, այնքան էլ ժամանակակից:

\* \* \*

Մինչև պատերազմը մենք ապրում էինք Ղրիմում, որտեղ շատ հայություն կար, հետո եկանք Երևան: Այն ժամանակ Երևանը մի մեծ գյուղ էր՝ հողե հարթ տանիքներով, ցեխոտ փողոցներով, շներով, կարիճներով, գորտերով, մոծակներով: Ամառը շոգ էր, երկնքից կրակ էր թափվում, իսկ ձմեռը՝ երկար ու ցուրտ:

— Հայրիկ, Ռուսաստանում լավ էր, — հաճախ հիշելով Սիմֆերոպոլի մեր հարմարավետ տունը, այգին, սալահատակված փողոցը, ասում էի ես:

— Ռուսաստանում շատ լավ էր, ինչ հողեր ունի, ինչ ծով, ինչ լայնություններ, մարդու սիրտը բացվում է: Հապա մարդիկ... աչքերը իրենց երկնքի նման կապույտ ու բարի:

— Իսկ ինչի՞ եկանք այստեղ:

— Երևանը հայրենիք է, — ասում էր նա:

Մեր անշուք տունը հորս աչքին թագավորի պալատից էլ մեծ էր ու հարուստ: Այն ժամանակ Երևանում բարձր շենքեր

չկային: Պատուհաններից և մանավանդ կտուրներից երևում էին քաղաքի որոշ փողոցներ, առանձին թաղամասեր, օրինակ՝ Սարի Թաղը, Այգեստանը, Արաբկիրը: Օրվա մեջ մի քանի անգամ հայրս, որ արդեն ծեր ու հիվանդ էր, մոտենում էր պատուհանին և երկար ու վերացած նայում դուրս: Ես գիտեի, որ նրա աչքը Արարատի ձյուններին է:

Մի անգամ ես նրան հարցրի.

— Հայրիկ, ի՞նչ ես ամենից շատ սիրում:

— Երևանը, Ռուսաստանը, Արարատը, — ասաց նա և իսկույն էլ, քիչ խորհրդավոր, ավելացրեց, — մի օր դու կհասկանաս ինձ:

\* \* \*

.

Անցել են տարիներ: Հայրս այն աշխարհում է: Հիմա մենք ապրում ենք տասներկուերորդ հարկում, հսկա մի շենք, որը բարձրանում է մեր հին տա՛ն հողից: Մեր բնակարանից երևում է ամբողջ քաղաքն ու բնությունը: Երբ նայում եմ շուրջս, բոլոր առարկաները մոտենում են ինձ, և ես մոտենում եմ նրանց: Ես ամենից ավելի սիրում եմ նայել Արարատին, կապույտ լեռնաշղթայից այն կողմ գտնվող երկնքի պատառիկներին, որտեղ հորս աչքերն էին հալվում: Ես չեմ կարող բառերով ասել, թե ինչու եմ հատկապես սիրում աշխարհի այդ մասը:

Ես երկու աղջիկ ունեմ՝ հինգ և յոթ տարեկան են: Երեկ մեծը պատշգամբից նայում էր դեպի հեռուները: Նա այնքան վերացած էր, այնքան միայնակ, որ չզգաց, թե ինչպես ես

մոտեցա և կանգնեցի նրա մոտ: Ես չխանգարեցի նրան, որովհետև պարզ տեսա, որ նա նայում է ճիշտ այն ուղղութ-  
յամբ, ուր և ես եմ հաճախ նայում:

Ես նորից մտա հյուրասենյակ, մտածելով, որ մարդիկ գալիս գնում են, նրանք տարբեր են, նրանք նույնիսկ կարող են ապրել տարբեր ժամանակներում և չտեսնել իրար, սակայն նրանց միացնում է ինչ-որ զգացմունք, որը հավերժական է և լուռ ու աննկատ տառապեցնում է նրանց:

Պատուհանի մոտ, աթոռին կանգնել էր նրա քույրը: Նրա աչքերում նույնպես Արարատի ձյուններն էին:

Եթե նրանք մի քիչ աշխարհագրություն իմանային, ապա կտեսնեին նաև ավելի հեռվի տարածությունները՝ մինչև Բյուրակն-Մնձուրյան լեռնաշղթան, մինչև Եփրատ ու Տիգրիս, և դեռ ավելի հեռու...



## ԿԱՊՈՒՅՏ ԵՐՁՆԿԱ

Նա վաղուց էր սկսել այդ աշխատանքը և ուր որ է ավարտելու էր: Ճաշասեղանին փռված մեծ, սպիտակ թղթի վրա գծագրված էր մի ամբողջ քաղաք: Շատ տներ միհարկանի էին, տափակ տանիքներով, երևի՛ հող ու կավ: Բակերը իրարից բաժանվում էին ցանկապատերով, դրանք էլ էին անշուք, միայն հատուկենտ տներ էին նուրբ ու գեղեցիկ պարսպազատված: Այդ քառակուսիները, ոլոր-մոլոր գծերն ու շրջանակները ձևավորում էին նեղ, ծուռումուռ փողոցներ և բավականին ընդարձակ մի հրապարակ: Տանիքներից վերև սլացիկ բարդիներն էին և եկեղեցիների խաչակիր գմբեթները:

Քաղաքը հին էր, ասես պեղումներից աչքը բացած, և թվում էր հեռավոր, երձանելի տարածություն ժամանակի հավերժության մեջ:

Ծերունին ճարտարապետ կամ նկարիչ չէր, հացթուխ էր նա և ծերության պատճառով արդեն քանի տարի թողել էր արհեստը, բայց կարողացել էր տպավորիչ պատկեր ստեղծել, յուրաքանչյուր գիծը շնչում էր, կարծես խոսում, քեզ հաղորդելով սրտամոտ, անբացատրելի ինչ-որ բան:

— Քիչ մնաց, վաղը, մյուս օրը կավարտեմ, — ասաց ծերունին, հետո արտասանեց բառեր, որ քաղաքի պատկերը ստեղծելու ամբողջ ընթացքում կրկնում էր: — Ոսկեգօծ շրջանակի մեջ եմ դնելու, կախելու եմ ննջարանի մեր անկյունում՝ մահճակալի վերևը, որ քնած ժամանակ էլ տեսնեմ:

— Փակ աչքով... — ինչպես միշտ՝ հարցրեց կինը, փոքրամարմին, ձյունի պես ձերմակ ու փխրուն մի պառավ, բայց դա ավելի առարկություն էր, քան հարց:

— Երզնկան փակ աչքով էլ կարելի է տեսնել, կույր աչքով էլ: Երզնկան տեսնելու համար աչք բնավ պետք չէ:

Նա քթի սապատին նստած ակնոցի տակից խեթ-խեթ նայեց կնոջը, հետո փոքրիկ դանակի ծայրով թիթեղե ամանից վերցրեց մանրագեղ խաչը, որ շոկոլադի թղթից էր ձևել, զգուշորեն սոսինձ քսեց ու դրեց եկեղեցիներից մեկի գմբեթին: Բոլոր խաչերը արծաթավուն էին և իսկական արծաթի նման պսպղում էին լուսամուտից սեղանին ընկնող արևի շողերում:

Պառավը բրդյա թելից գուլպա էր գործում Հեռավոր արևելքում զինվորական ծառայության մեջ գտնվող թոռան

համար: Գլուխն ու աչքերը խոնարհվել էին շյուղերին, բայց միտքը թափառում էր ամուսնու նկարած քաղաքի փողոցներում: Նրա հոգում կար վաղուց՝ դեռևս քաղաքի առաջին հիմնադիր գծերը քաշելու ժամանակից, բուն դրած մի զգացմունք, որ այժմ լուռ ու համր երգում էր լաց լինելով:

— Նարեկյան վարժարանի ետևում գտնվող այս տունը ղևմն էր: Առջևը փշատենի կար, հիշում ես, որի անուշահոտությունը տարածվում էր ամբողջ թաղում: Զարմայր Սանդիկյանինը չէր, — հարցրեց ծերունին:

— Սանդիկյանը Կենտրոնական վարժարանի ետևն էր ապրում, — ասաց պառավն առանց գլուխը բարձրացնելու, — Սուրբ Երրորդություն եկեղեցու մոտ: Փշատի ծառը թվաբանության ուսուցիչ Տեր-Մեսրոպ քահանա Թորոսյանինն էր:

Ծերունին գունավոր մատիտների տուփից հանեց կապույտը և Տեր-Մեսրոպի կոկիկ ցանկապատված տան առջև նկարեց երեք ճյուղ. դա փշատենին էր, որի ծաղիկների բույրը նա մինչև հիմա էլ զգում էր իր ներսում:

Նա դանդաղ, մոլորվածի պես պտտվեց Նարեկյան վարժարանի շուրջը և նրբանցքներով, կարճ ճանապարհով հասավ Գանթարիա չարշուսի՝ նպարեղենի շուկա, որ գտնվում էր հայ և թուրք թաղերի միջև:

— Լեբլեբիջիները ահա այստեղ էին նստում, — մտքում հիշեց ծերունին, բայց հուշն ստացվեց բարձրաձայն: — Երեք մարդ էին, թե՛ չորս... ամեն մեկը իր լեբլեբին էր գովում, ինչ սքանչելի լեբլեբի էր, փշրվում-հալչում էր բերանիդ մեջ, մնում էր մեղմ, թեթև շաքարահամը:



— Նրանք հինգն էին, երեք հայ և երկու հույն, — ասաց պառավը: — Ամենաքաղցրահամ լեբլեբին մորուքավոր հույնինն էր, ես միշտ նրանից էի առնում: Մորուքավոր հույնը գործածում էր փոքրիկ, կլոր, սև ապակիներով ակնոց, կարելի էր կարծել՝ կույր է, բայց նա կույր չէր: Նա ուրախ, բարի մի մարդ էր և շատ էր սիրում երեխաներին: Երբ երեխա էր առջևը, նա լեբլեբին միշտ ծանր-ծանր էր կշռում:

Ծերունին զարմացած շրջվեց կնոջ կողմը. ինչպե՞ս նա կարողացավ լսել իր մտքի զգացմունքը:

Հիմա ծերունու գլխում այդ հուշը վաղորդյան լույսի պես թարմ էր ու պայծառ: Ամեն կեսօրին նա ուտելիք էր տանում հորը՝ Կարապետ աղային, որ փռապան էր ժամի հրապարակում: Ծաղկավոր թաշկինակի կապոցը ձեռքին, որտեղ ջրալի ճաշից բացի լինում էր սոխ և պանիր, առանց որոնց հայրը չէր կարողանում հացի նստել, նա անցնում էր Սարգիս Էֆենդիենց ծառաշատ փողոցով, Սուրբ Փրկիչ եկեղեցու մոտ ջուր խմում սառնորակ աղբյուրից, ապա մտնելով ձախակողմյան նեղ, ոլորապտույտ փողոցը՝ քար նետում բակերից մեկում շղթայված շան վրա (ինչպե՞ս էր անունը) և, առանց կանգնելու, գազազած շան հաչոցը ականջներում, վազում-վազում մինչև փռի դուռը: Հայրը խաղաղ ու հոգնաբեկ ճաշում էր աթոռակին նստած, հաճախակի կում անելով սառը կժից, իսկ ինքը նայում էր նրան ու երազում շուտ մեծանալ, հոր պես բեղ-մորուք կապել և փռապան դառնալ: Կարապետ աղան, ճաշն ավարտելով, երբեմն մի պղնձադրամ էր տալիս տղային, գրկում, բարձրացնում վերև, պաչպչում ճակատը, աչքերը, քիթը, հետո բաց թողնում աղունակի նման. «Թռիր սրտիդ

ուզածն առ»: Մտնելով շուկա, նրա մանկական հոգին երջանկանում էր ախորժահամ հոտերից, վառվռուն գույներից, աշխույժ, խնդուն ձայներից, որոնք նրան կանչում էին իրենց մոտ: Բայց նա մոտենում էր հույնին, որը սև ակնոց ուներ և երկար մորուք: «Մեր լեբլեբին գնիր, — ասում, ծիծաղում էին հայերը, — այս ի՞նչ ազգադավությունն է»: Այնուամենայնիվ, նա լեբլեբին հույնից էր առնում, որովհետև (ծերունու կրծքից երանության մի հառաչ ելավ) նրանը կախարդանքի պես էր, ոնց որ լեբլեբի չլիներ, այլ ուրիշ բան, զգուշորեն պիտի դնեիր լեզվիդ վրա, աչքդ փակեիր ու մնայիր նրա քաղցր բուրմունքի հետ:

Ծերունու շվարուն հայացքը սեղանին ինչ-որ բան էր որոնում: Ահա փոքր ու մեծ մկրատները, դանակը, ռետինը, սիգարեթի տուփը, մատիտները, մոխրամանը, լուցկին, խոշորացույցը, ահա և տարբեր ձևի ու չափսի քանոնները, կարկինը, թռռան նամակը, որ առավոտյան էին ստացել, ձեռքի ժամացույցը՝ մաշված կաշեփոկով: Նա հասկացավ, որ փնտրում է կապույտ մատիտը: Աչքերը դեգերում էին սեղանին ու երգնկայի վրա: Մատիտը իր աջ ձեռքին էր:

Նա կռացավ թղթին և սկսեց կապույտ կետերով ծածկել իրենց տնից փուռ ու այդտեղից շուկա ընկած ճանապարհը: Չէր շտապում, դնում էր կետ կետի ետևից, աշխատելով դրանց միջև հավասար հեռավորություն պահպանել: Ասես կապույտ գորգ էր փռում իր սրտի ոտքերի տակ: Մատները թեթևակի դողում էին: Դա միայն ծերությունից չէր: Նրա մատներից կաթում էր այդ վայրերի հանդեպ արթնացած սիրո հուզմունքը:

Լուսամուտի ետևում ամառ էր: Երգում էր դեղձենու ճյուղը: Թվում էր՝ ամառ է հագել ամբողջ աշխարհը: Ամառ էր նաև երգնկայում:

— Սուրբ Փրկիչ եկեղեցու բակի ջրի պես ջուր... — և ծերունին մի ախ քաշեց, որի մեջ ն երջանկություն կար, ն հիացմունք, ն նույնիսկ պապակ սրտի գոհացում:

Պառավը տեղում անբավական շարժվեց, ճռճռացնելով հին ու խարխուլ աթոռը:

Ծերունին շրջվեց և տեսավ շյուղերին խոնարհված կնոջ դժգոհ-դժգոհ դեմքը: Պառավը երբեք չէր կարողանում իր տրամադրությունը թաքցնել: Այդպիսի ժամանակ նրա դեմքն ասես թթվում էր՝ կնճիռներն ավելի ընդգծելով:

— Ի՞նչ... — հարցրեց ծերունին:

— Բան էլ չէ, — ասաց պառավը:

— Սուրբ Փրկչի ջուրը երգնկայի ամենասառն ջուրն էր, — քիչ բարկացկոտ, հաստատակամորեն խոսեց ծերունին: Բայց, այնուհանդերձ, ավելացրեց. — Այդպես չէ:

Պառավը պատասխան չտվեց: Նրա դաստակների նյարդային շարժումներից ծերունին ենթադրեց, որ, երևի, իր մեջ ինչ-որ բան սխալ է: Եվ չիմանալով ինչն է սխալ, ինչու է սխալ, ինքն էլ նյարդայնացավ:

Նա դարձյալ խոնարհվեց սեղանին, հայացքն այս ու այն կողմ սահեցնելով գտավ Սուրբ Փրկիչ եկեղեցու ջուրը և, այն է, ուզում էր ջրի բոլորաշուրջը կապույտ օղակ քաշել, երբ լսեց կնոջ ձայնը, որը կարծես հեռուներից էր գալիս՝ սար ու հովիտներից անդին գտնվող իրենց ծննդավայրից, և

արձագանքում իր առջև, թղթին փռված քաղաքի փողոցներում:

— Երզնկայի սառնորակ ջուրը, Փավստոս, ամեննին էլ Սուրբ Փրկիչ եկեղեցու բակում չէր, ինչ է պատահել քո հիշողությանը:

— Սուրբ Փրկչի բակում էր, — գոռաց ծերունին, բայց հուզմունքի ալիքը ձայնն այնպես էր խեղդել, որ այն հազիվ լսվեց. նրան թվաց, թե թանկ ու հարազատ ինչ-որ բան է կորցնում, որ շատ ավելին է, քան ջուրը, քան հողը, որից այն բխում է, և, վախից, թե՛ դժբախտությունից, թուլացավ:

— Ճիշտ է, Փրկչի ջուրն էլ էր պաղ, — ասաց պառավն առանց գործն ընդհատելու, — բայց Երզնկայում մի ջուր կար, որը ամենապաղն էր... Մամիկոնյան եղբայրների պարտեզը հիշում ես... Յոթը եղբայր էին... Իրենց պարտեզում դիրք մտած՝ նրանք երկու ժամ կռվեցին թուրքի դեմ և բոլորն էլ սպանվեցին:

Ծերունու գլխում շողաց մի կայծ՝ լուսավորելով անցյալը:

— Մամիկոնյանների պարտեզի ջրհորում Երզնկայի ամենապաղ ջուրն էր, — շարունակեց պառավը վիրավորված ձայնով: — Ասում էին՝ այդ ջուրը Սեպուհ լեռան ձյուններից է. բայց դա ճիշտ չէ, Սեպուհը, է, շատ-շատ հեռու էր, նրա ձյունները ինչպե՞ս կհասնեին Մամիկոնյանների պարտեզը: Ես միշտ մտածել եմ, որ նրանց ջուրը գալիս էր մեր ծննդավայրի խորքից, ամենախորրերից, որտեղ ջուրը անուշ է և սառույցի նման պաղ:

— Մամիկոնյանները բարի ու գեղեցիկ մարդիկ էին, —

հիշեց ծերունին: — Ամեն անցորդ ազատ ելումուտ ուներ նրանց պարտեզը: Նրանց ջուրը սիրահարի այրվող սիրտն էր հովացնում, սփոփում նույնիսկ դժբախտ հոգիները: Ծանոթ ու հարևան, որոնք իրենց ջրհորն ունեին, ջուրը բերում էին Մամիկոնյանների պարտեզից, երբ տանը պատվավոր հյուր էր լինում: «Մամիկոնյան է», — կավե կամ պղնձյա գավաթը դատարկելով, երջանիկ հոգոց էր հանում հյուրը: «Հարկավ», — հաստատում էր տանտերը՝ դեմքին գոհունակ մի ժպիտ: Ծերունին շատ զարմացավ, թե ինչպես է կինն իմացել, որ Մամիկոնյանների ջուրը գալիս է երկրի խորքերից:

— Ի՞նչն էին Մամիկոնյան յոթ եղբայրները պաշտպանում, — լսվեց ծերունու ձայնը:

— Մի՞թե պարզ ու հասկանալի չէ, — լսվեց պառավի ձայնը:

— Ջուրը, — ասաց ծերունին:

— Նաև հողը, — ասաց պառավը:

— Պարտեզը, — ասաց ծերունին, — նրանց պարտեզում հսկա մի ընկուզենի կար, խնձորի ծառեր:

— Երզնկան, — ասաց պառավը: — Նրանք պաշտպանում էին իրենց քաղցր ծննդավայրը, որտեղ նաև իրենց ծնողները, իրենց պապերն էին ծնվել: Նրանք Երզնկան պաշտպանում էին դեռ աշխարհ չեկած իրենց զավակների համար:

— Երզնկայի երկինքը, — ասաց ծերունին:

— Նրանք պաշտպանում էին ուրիշ բան, — նեղսրտեց պառավն ամուսնու խոսքի վրա:

— Ուրի՞շ... — նեղսրտեց ծերունին:

— Երկիրը, — ասաց պառավը, — ջուրը, երկինքը, պարտեզը՝ խնձորի ծառերով, երգնկան, հողը... այս բոլորը երկիրն է:

Ծերունին ինքն իրեն բարձրաձայն խոսելով դուրս ելավ Սուրբ Փրկիչ եկեղեցու բակից, անցավ երկար մի փողոցով, որտեղ Ներսես Հայրապետի գիշերօթիկ դպրոցն էր, և արդեն մոտենում էր Սրբուն բաղնիքին, երբ պառավը նրան, կարծես թեք բռնելով, կանգնեցրեց: Առանց աչքերը գուլպայից բարձրացնելու, որի վիզը հետզհետե երկարում էր, նա ասաց, որ Մամիկոնյանների պարտեզը այդ կողմում չէ, այլ մոմավաճառի կրպակի և լարախաղաց Ղազարոսի տան միջև, երկրաշարժից առաջացած ընդարձակ ու խոր փոսի մոտ: Ծերունին այդ փոսը լավ էր հիշում: Այնտեղ անձրևաջրերը լճակ էին գոյացրել, որը ձմեռ ժամանակ սառցակալում էր, իսկ մնացած ամիսներին գարշահոտ տարածում ամբողջ թաղամասում: Կեղտագույն, տղմոտ ջրում վխտում էին գորտերն ու որդերը: Որքան շատ մոծակ կար, և ինչպես էին կծոտում, ասես միսդ պոկում էին ու աղ ցանում վերքի վրա: Դա նաև անտեր շների ու կատուների գերեզմանոց էր, որոնց դիերը նեխվում էին ամռան շոգ օդից, լցվում որդերով և կեր դառնում ճանձերին: Ծերունին շրջվեց, ոլոր-մոլոր ճանապարհներով դանդաղ ետ եկավ ու կանգնեց փոսի գլխավերևը: Նրա աչքերը տեսան այն, ինչ թղթի վրա չկար: Ներքևում սիրելի լճակն էր: Նրան թվաց, թե լսում է գորտերի կռկռոցը, առնում ջրի, սատկած կենդանիների նեխահոտը: (Նա քթով արագ-արագ, դողդոջուն ներշնչեց օդը, որպեսզի այդ հոտերը ավելի լավ

զգա) : Նրան նույնիսկ թվաց, թե մոծակներն ու ճանճերը կծոտում են իրեն, պատճառելով մարմաջի պես քաղցր ու երանելի ցավ : Կարոտը, հուզմունքը, որ լճակն էր առաջացրել նրա հոգում, այժմ նստել էր աչքերին և կաթում էր արցունքի տեսքով :

Նա գծագրեց Մամիկոնյան եղբայրների պարտեզը, ջրհորը, լճակը՝ փոսի հատակին, և այդ ամենն ստացվեց կապույտ :

— Է՛հ, Երզնկան էլ եկավ մեր տուն՝, — երջանկորեն տնքաց ծերունին, — հիմա որ մեռնենք, այլևս հոգ չէ :

— Ինչո՞ւ մեռնենք, — առարկեց պառավը, — նրա հայացքում շփոթմունք կար, երջանիկ մի շող ու երկյուղ :

— Հապա Երզնկայում մեռնելը երջանկությունն չէ :

— Երզնկայում ապրելը ավելի մեծ երջանկությունն է :

Ծերունուն այնքան էլ դուր չեկավ, որ կինը տեղիանտեղի միջամտում է իր մտքի ընթացքին, առարկում իրեն : Նա Երզնկան ավելի լավ է պատկերացնում, քան ինքը : Ինչպես կուզենար նրա տեղը լինել՝ ունենալ նրա հիշողությունը, նրա աչքերը, նրա դատողությունը : Նա զգաց, որ նախանձում է կնոջը, և ամաչեց, ապա չարացավ ու քրտնեց :

— Կնիկ, — ծերունու ձայնի մեջ նյարդայնություն կար և շփոթմունք, — արևը շուռ եկավ, ճաշը դիր :

Թեև արևը երկնքի գագաթնակետին չէր հասել, և ճաշին դեռ մեկ-երկու ժամ կար, բայց պառավն իսկույն ցած դրեց շյուղերը և, հողաթափերը հատակին քստքստացնելով, շտապեց խոհանոց : Ավելի քան հիսուն տարի այդպես էր եղել. պատահում էր՝ նա հակաճառում էր ամուսնուն, նույնիսկ

կռվում հետը, բայց կային մի քանի բաներ, որոնք նա միշտ կատարում էր լռելյայն և խոնարհությամբ, ամուսնու կես խոսքն էլ բավական էր, մինչև անգամ՝ աչքի թարթումը: Իր լուսահոգի Փամբուխ մայրն էլ էր այդպես: Նա երկար-բարակ կվիճեր իր լուսահոգի հոր՝ Գառնիկ աղայի հետ, սուրճը սառը ջրով ըմպելն է ախորժելի, թե՛ առանց ջրի (նա սուրճը ջրով խմելու կողմն էր), բայց, օրինակ, հյուրին օշարակ մատուցելու, ճաշ ուտելու ամուսնու ցանկությունը կատարում էր անմիջապես՝ իբրև աստծո և բնության կողմից թելադրված մի պարտականություն:

Ամռանը նրանք բակում էին նստում հացի՝ կանաչ տանիք կապած խաղողենիների ստվերում:

Պառավը սեղանին դրեց պոմիդորի և վարունգի սալաթը, որ համեմված էր սոխով ու հոտավետ կանաչիներով, կտրատեց բամբակի պես փափուկ ու սպիտակ բոքոնը, որի կարմրատակած մաշկը դանակի տակ խշրտաց, հետո կաթսայիկով բերեց թանապուրը, որը դեռ երեկ էր եփել: Թանապուրից ախորժ գոլորշի էր բարձրանում, երբ պառավը փայտե շերեփով այն լցնում էր խոր ափսեների մեջ:

— Կարիք կ'ա՛ր տաքացնելու, — դժգոհեց ծերունին:

— Երեկ դու թանապուրը տաք ուզեցիր:

— Այսօր երե՛կ է, — մեղմորեն, բայց կշտամբանքով հարցրեց ծերունին:

Պառավը շնչաց «Հայր մեր»-ը և «Ճաշակեսցուք»-ը: Այս անգամ ծերունին նրան ձայնակից չեղավ:

Նրանք ուտում էին լուռ ու դանդաղ: Տանիքի քիվին կանգնել էր ճնճղուկը և դայլայլում էր: Ծերունին չէր նայում



կնոջը, որ ուղիղ իր դիմացն էր նստած: Խաղողենիների մեջ բզզում էր մեղուն:

Ծերունին տեղում անհանգիստ շարժվեց, հետո, նույն թթված արտահայտությունը դեմքին, ասաց.

— Չափից ավելի ես լցրել, ուզում ես պայթեմ:

Նա գդալը թողեց կիսատ ափսեի մեջ և առանց սալաթին ձեռք տալու ոտքի ելավ:

Պառավը զարմացած էր: Նա, լավ հիշում է, կերակուրը ափսեներում քիչ լցրեց, մտածելով, որ արևը դեռ երկար ճանապարհ է անցնելու և իրենք մեկ-երկու անգամ էլ հաց կուտեն: Նայելով նախ ամուսնու ափսեին, հետո՝ իր, նրա մտքով, այնուամենայնիվ, անցավ, որ, գուցե, իսկապես, կերակուրը լցրել է սովորականից ավելի: Այդպես մտածելով, նրան նույնիսկ թվաց, որ ինքն էլ է արդեն կուշտ, և իր ափսեն, որի մեջ դեռ բավականին թանապուր կար, զգուշորեն հրեց սեղանի մեջտեղը, թեև թանապուրը շատ համեղ էր:

Բակի անկյունում փոքրիկ ջրավազան կար՝ աղբրակով: Ծերունին բացեց ծորակը և, կռանալով, մի ափ ջուր խմեց: Ոնց որ Մամիկոնյանների ջուրը լինի, — մտքում ասաց ծերունին՝ սառնությունից կուչ տալով լեզուն: Հետո նա ջուր դրեց հավերի առջև, որոնք չորս կողմից իսկույն շրջապատեցին ալյումինե թասը: Հավերը կոտրում էին իրենց ծարավը, նայելով արևով շաղված երկնքին:

Պառավը հավաքեց սեղանը և մտավ տուն: Ծերունին ննջարանում, մահճակալին անդորր պառկած ծխում էր, նայելով դիմացի դատարկ պատին: Պառավը հասկացավ, որ սիգարեթի ծխի միջից նա պատին տեսնում է երզնկան, և

դարձյալ, ինչպես մի քանի ժամ առաջ, դժգոհությունն ու բողոքը շարժվեցին իր մեջ՝ հոգու ցավ առաջացնելով:

Պառավը նորից ձեռքն առավ շյուղերը, հարմարորեն տեղավորվեց աթոռին և գլուխը կախ գործում էր: Մեկ էլ տեսավ ամուսնուն, որը, սեղանին կռացած, փորձում էր ինչոր բան նկարել: Նա շփոթվեց. էրբ և ինչպե՞ս էր ծերունին ներս մտել հյուրասենյակ:

Ծերունին կարկինով մի հոծ շրջագիծ քաշեց Սուրբ Սարգիս և Սուրբ Երրորդություն եկեղեցիների միջև, ցանկանալով ժամի հրապարակը դարձնել նկատելի ու արտահայտիչ: Սա հայ երեխաների կենտրոնական խաղատեղին էր, զինվորներն այստեղ էին մարզանքներ անում, այստեղից էր քաղաքի նախիրը գնում դաշտ՝ ճանապարհի փոշին ու հողերը խառնելով օդին: Փոշիների միջից լսվում էին նրա բառաչները, և դա ականջին այնքան դուրեկան էր: Ինչո՞ւ միայն ականջին, — հարցրեց ծերունին մտքում՝ ինքն իր դեմ ըմբոստանալով, — հապա սրտին դուրեկան չէր: Եվ նա մտովի թավալվեց Երզնկայի փողոցների հողի, փոշիների մեջ՝ ինչպես երազի քաղցր անկողնում, սրտում ու ականջներում կովերի, բառաչն ու ոչխարների, գառների մայունը:

Գարնանն ու աշնանը՝ անձրևների ժամանակ, հողը վերածվում էր կպչուն ցեխի, և փողոցներում անցուդարձը դժվարանում էր: Հաճախ անասունները չորս ոտքով թաղվում էին ցեխի մեջ և չէին կարողանում առաջ գնալ: Ինչքան է պատահել, ինքը ոտաբոբիկ մտել է ցեխերը, որ իրենց եզանը, կոտոշներից բռնած կամ քամակից հրելով, հանի դուրս: «Հն՛... եզը...»: Ծերունուն թվաց, թե կարմիր ճակատով այն

աննման կենդանուն հիմա էլ է քաշում-հրում..., և նա աչքերի խորքում ժպտաց: Այդ վայրկյանին ինչ-որ բան ցավեցրեց նրա հիշողությունը, ցավը նախ լույս տվեց գլխում, հետո դանդաղ ներծծվեց մարմնի մեջ: Մի անգամ, ինչքան ժամանակներ են անցել այն օրից, ինքը դատարկ բանի համար (եզը նստել էր ճանապարհի մեջտեղն ու չէր ուզում վեր կենալ) ծեծեց նրան, դե, եզ է, ճանապարհին էլ կնստի, ցեխի մեջ էլ, ծեծելս ղրն է ճիպոտով դաղեց մեջքը, ճիշտ է, լավ դաղեց, բայց հո չէր ուզում... Հիմա թախիժ կար ծերունու աչքերի անկյուններում: Տեսնես շատ կսկծաց մեջքը, — հոգու խորքերում հարցրեց նա և, պատասխան չստանալով, գլուխը մեղմորեն քսեց կենդանու կարմիր, մազմզոտ ճակատին, գրկեց վիզը, նրան այդպես թվաց, և անձայն, տխուր-տխուր նրանից ներողություն խնդրեց:

Պառավը բարձրացրեց հայացքը և, ամուսնու թիկունքին նայելով, զգաց, որ նա ուրախ չէ: Նա հայացքը դարձյալ խոնարհեց շյուղերին, որոնք արդեն գուլպայի վզագոտին էին գործում, և սիրտը տնքաց թույլ ու հոգնած ձայնով:

Ծերունին դանդաղ քայլեց իրենց փողոցի ցեխերի միջով, մոտեցավ ցածրիկ դռնակով տանը, որը մոտավորապես երեք ամիս առաջ էր նկարել, և ճկիկը կամացուկ խփեց: Դուռը բացող չեղավ: Լսվեց երաժշտության պես ախորժալուր ճըռռոց, երբ նա դուռը նույնքան մեղմիկ ետ էր անում: Նա ամեն օր այդպես ներս էր մտնում իրենց տուն, նստում մեկ ոտք բարձրությամբ սեղանի մոտ, հիշում հարազատների դեմքերը, որոնք վաղուց դարձել էին կարոտամաշ հեքիաթի նկարներ, երդիկից երկար նայում դուրս, մինչև աչքերը

կխժբժային, և արտույտները, ոսկեգույն փետրիկներ շաղ տալով, կթռչեին կապույտ, թափանցիկ երկնքում... Իսկ հետո նա կանգնում էր, հայացքը և մատները զգուշորեն դիպցնում տան իրերին: Ահա թարեքը՝ պատի մեջ գտնվող ընդարձակ մի խորշ: Վերևի դարակներում մանր ամաններն են, ափսեները, գդալներն ու բաժակները, իսկ ստորին մասում, որ ավելի լայն է, պղնձյա և կավե խոշոր ամաններն են տեղավորված, որոնցում հալած կարագ կա, դմակի յուղ, ղաուրմա, բլղուր և աղջրի մեջ դրված պանիր: Ծերունին, պանրի աղը համտես անելով, ուսը գորովալից քսելով սենյակի պատերին, ելավ բակ՝ սրտում ինքն իրեն փակվող դռան ձայնը:

Բակի և տան պատկերներում ոչ մի պակամսություն չկար, ծերունին այդ ամիսներին իր օջախն այնքան էր ներս ու դուրս արել, որ հիշողության մեջ պահպանվող բոլոր հարազատ կետերը, ստվերներն ու գծերը արդեն կերպավորվել էին: Այնուամենայնիվ, նա առավ մատիտը (դա կապույտն էր) և վերամարմնավորեց այն քարը, որի վրա հորենական պապը նստում էր, հենվում ձեռնափայտին և երզնկայի ու գավառի հին-հին ժամանակներից խորհրդավոր պատմություններ անում, որոնք էլ իրեն պատմել էին իր նախահայրերը:

Ծերունին այդ պատմություններից մեկը հիշեց: «(Այն հնագույն ժամանակներում քաղաքը շրջապատված էր կուսական անտառներով, որտեղ շատ կենդանիներ ու թռչուններ կային: Ամենանշանավորը ոսկե ձին էր, որին ոչ ոք չէր տեսել, բայց որից բոլոր մարդիկ պատկառում էին և մեծարում ոգեղեն խոսքերով): Բակից ելնելով փողոց, ծերունին ամեն ինչ մոռացավ:

Դեմը Սուրբ Երրորդությունն էր՝ բարդիներից էլ բարձր զանգակատներով, նախշազարդ կամարներով: Ծերունին հիշեց, որ ամենաբարձր զանգակատան գլխին ամեն գարնան իջնում էր արագիլը: Այնքան գեղատեսիլ էր արագիլի թռիչքը քաղաքի վրա: Երբ արագիլը գալիս էր, մարդիկ դառնում էին ավելի բարեսիրտ, նրանք սկսում էին սիրել իրար, և այդ սիրուց երեխաներ էին ծնվում:

Հանգստյան և տոն օրերին եկեղեցիներում վաղ առավոտից սկսվում էր ժամերգությունը: Իրենք գնում էին Սուրբ Երրորդություն, որտեղ ժամերգությունը գլխավորում էր Տեր-Վահանը՝ միջին տարիքի, գեղեցիկ աչքունքով, բարձրահասակ մի քահանա: Տեր-Վահանի ձայնն այնքան դուրալի էր, որ թվում էր՝ ոչ թե նա է տաղերգում, այլ քո սիրտը: Հասակավոր ժողովուրդը ծնկաչոք էր աղոթում՝ գետինը համբուրելու աստիճան մարմինը ծռելով առաջ ու դարձյալ ուղղելով: «Զորքիդ մեռնիմ, Սուրբ», — այս խոսքով էին նրանք դիմում սրբերին՝ հավատացած, որ իրենց ցանկությունները վաղ թե ուշ կատարվելու են:

Զատիկ էր. «Քրիստոս հարեալ ի մեռելոց»: «Օրհնեալ է յարութիւն Քրիստոսի»: Եկեղեցու զանգակատան վրա կանգնած էր արագիլը: Ներսը կիսամութ էր, ժամերգություն, «Ի խորոց սրտից խօսք ընդ աստուծոյ», խնկի, վառվող մոմերի բույր և բուրվառի ծուխ: Խորանանման ձեղքից ներս ընկնող լուսափնջի մեջ ինքը մեկ էլ տեսավ մի չքնաղ դեմք՝ նշակերպ աչքերով, որ առկայծում էին սևաթույր, աղեղնաձև հոնքերի տակ, և ասես բողբոջից նոր ծագած ծաղկաթերթե շրթերով: Մի՞թե նկար է, — հարցրեց իր ալեկոծ սիրտը: Ոչ, դա

ժամագործ Ներսեսի միջնեկ աղջիկն էր, և նա նկար չէր, այլ կենդանի էակ, որ այդ պահին խոսում էր աստժո հետ՝ աշխարհը մոռացած: Նա իր մանկության խաղընկերուհին էր՝ Աշխենը, գարունը նրան հանկարծ ծաղկեցրել էր, ինչպես ծառու թուփ, — ծերունին շրջվեց պառավի կողմը, — ահա հիսուն տարուց ավելի է նա իր կինն է և այժմ գուլպա է գործում հեռու երկրում զինվորություն անող իրենց թոռան համար:

— Չվերջացրիր, — զվարթ հարցրեց ծերունին: — Շուտ վերջացրու, իրար հետ խոսք խոսենք, մեր լեզուն չմոռանանք:

— Այս աշխատանքը ճամփայի նման է, ծայրը չի երևում, — ասաց պառավը: — Վրեժի ընկերների համար էլ եմ գործելու: Նրանք էլ թոռներ են:

Ծերունու գլխում հանկարծ ծնվեց մի միտք.

— Եթե այն ժամանակ մեր Վրեժը լիներ, նրա ընկերները լինեին, հիմա Երզնկան կապրեր:

Պառավը վստահաբար ասաց.

— Երզնկան ապրում է:

Ծերունին շատ շփոթվեց, որովհետև նրա աչքերի մեջ Երզնկան և ապրում էր, և չէր ապրում, դա անսովոր մի գոյություն էր. նա մեկ երևում էր մոտիկ ու կենդանի, մեկ էլ՝ հեռանում, կորչում մշուշների մեջ, դառնալով հոգու մորմոք: Եվ մրմռում էր՝ ինչպես ողբերգը:

Ծերունու հայացքի առջև դարձյալ արագիլն էր, Սուրբ Երրորդությունը՝ երկինք պարզած իր խաչերով, և մի լուսահրաշ դեմք, որ սիրո ու ծաղկումի անեղծ գույներով արարված նկարի էր նման:

— Այստեղ խաչերը փայլում են, — դժգոհ ասաց ծերունին՝

մեկ աջից, մեկ ձախից դիտելով քաղաքը: — Հիշո՞ւմ ես, մեր խաչերը չէին փայլում, նրանք երկաթակուռ էին, թրծված, մեր խաչերը մշտնջենական հայացքով էին նայում մեզ:

— Թող փայլեն, — նրան հանդարտեցրեց պառավը, — թող փայլեն, որ ավելի լավ երևան:

Ծերունին եկեղեցու շուրջը կետեր էր դնում, գծեր քաշում, որոնք կարծես մոլորված ոտնահետքեր լինեին, ինչ էլ անում էր՝ ստացվում էր երկնքի պես կապույտ ու թափանցիկ:

— Այսօր ի՞նչ է, ուրբա՞թ, — հարցրեց ծերունին և ինքն էլ պատասխանեց: — Երեկ հինգշաբթի էր, իսկ այսօր ուրբաթ է, վաղը շաբաթ: Եթե վաղը չվերջացնեմ, կիրակի իրիկուն ամեն բան արդեն ավարտված կլինի: Կդնեմ ապակու տակ, ոսկեգույն շրջանակի մեջ, որոշված է, կախելու եմ ննջարանի պատին, սահճակալի վերևը: Ծեր մարդիկ շատ ժամանակ անկողնում են լինում: — Նրա դեմքին գծագրվեց երջանիկ մի ժպիտ: — Մեր փողոցը, շուկան, Սուրբ Երրորդությունը, Մամիկոնյանների այգին, մեր տունը միշտ կլինեն աչքիս առաջ:

Պառավը հասկացավ, որ հասել է վերջին ժամը, այլևս լռել չի կարելի և, գլուխը բարձրացնելով, վճռականորեն ասաց.

— Ննջարանը Երզնկայի տեղը չէ:

Ծերունին ցնցվեց, կարծես ծանր ու անսպասելի դժբախտության լուր էր առել:

— Երզնկան կախելու ենք այստեղ՝ հյուրասենյակում, որ եկող-գնացողը տեսնի, — ասաց պառավը:





— Ոչ մի դեպքում:

— Երզնկայի տեղը ահա այս է, — պառավը ցույց տվեց ամենալուսավոր պատը: — Ննջարանը փակ անկյուն է, իսկ այստեղ բոլորը կտեսնեն նրան:

— Թող ոչ ոք էլ չտեսնի:

— Ինչո՞ւ:

— Ավելի լավ, թող չտեսնեն:

— Վարդանուշը չտեսնի՞:

— Երզնկան իմն է, իմը, — ասաց ծերունին խոշոր, ծանր ավոյժ ծեծելով կուրծքը:

— Երզնկան իմն էլ է:

— Թող քոնն էլ լինի: Երկուսինս է:

— Վարդանուշինն էլ է:

— Նա վանեցի է: Ի՞նչ գործ ունի Երզնկայում:

— Հեթումինն էլ է:

— Հեթումը բիթլիսցի է:

— Ռոբերտը չտեսնի՞, — հարցրեց պառավը:

— Ռոբերտը Երևանում է ծնվել, մեծացել, նրանը Երևանն է, Երևանը տալիս եմ Ռոբերտին, ինչքան ուզում է նայի, ուտի, կշտանա:

— Մարիամի մասին ի՞նչ կասես:

— Մարիամը, ճիշտ է, Երզնկացի է: Նրա հայրը Տրապիզոնի կողմերից էր եկել մեր քաղաքը, իսկ մայրը պոլսեցի էր, հարուստ գորգավաճառների ընտանիքից, — հանգիստ ու մտազբաղ խոսեց ծերունին, հետո միանգամից դարձյալ նյարդայնացավ: — Թող Մարիամն էլ իր Երզնկան նկարի, ես նրան պարտակա՞ն եմ:

— Հապա Բարթուղիմեոսը...

— Բարթուղը բնիկ մշեցի է:

— Հետո ինչ, որ մշեցի է, թող նրա աչքն էլ երզնկայով ուրախանա:

— Երզնկան իմն է, հասկացիր, միայն իմը, միայն իմը:

— Երզնկան բոլորինն է, միայն քոնը չէ, բոլորինն է:

— Անամոթ կնիկ, — գոռաց ծերունին:

Պառավն այլայլվեց: Իրենց ամուսնության հիսունվեց տարիների ընթացքում այդպիսի վիրավորանք նա չէր կրել: Շյուղերը, գուլպան, որ արդեն պատրաստ էր, թելի կծիկները գոգնոցով կապոց անելով, նա ոտքի ելավ և լուռ ու դանդաղ դուրս գնաց:

Ծերունին շփոթված նայեց նրա ետևից, չիմանալով ինչ անել:

Մայրամուտի շողերը կպչում էին լուսամուտի ապակիներին և, փշրվելով, թափվում սեղանի վրա, որտեղ երզնկան կապույտ մշուշների մեջ էր:

Նրանք մի սովորություն ունեին. ամառ ժամանակ, երեկոները նստում էին շեմքի աստիճաններին և դիտում իրենց փողոցի շարժումները:

Պառավը ջուր շաղ տվեց տան առջևը (իր կնոջական պարտականությունն է), որ զով լինի, և քարե աստիճանին, կողք կողքի դրեց տափակ, բայց փափուկ երկու բարձ, որոնք այդ նպատակով էր կարել մի քանի տարի առաջ:

Իր բարձին տեղավորվելով, պառավը գլխի թեթևակի շարժումով բարևեց հարևանի հարսին, որը երեխային գրկած նստել էր իրենց դռանը: Նա մտածեց, որ լավ կլինի դրկիցները

չիմանան իր և ամուսնու տիաճ վեճի մասին, անհարմար է, և դեմքին դրոշմված վատ տրամադրությունը քողարկելու համար իրեն ստիպեց ժպտալ, թեև դա շատ դժվար էր:

Շուտով երևաց ծերունին: Նա դռանը հենված կանգնեց մի քիչ, հետո կռացավ, բարձր դրեց մեկ աստիճան վերև ու անհամարձակ նստեց: Կարծես փշերի վրա էր: Նա էլ չէր ուզում, որ որևէ մեկը ձլխի ընկնի, թե ինչ է տեղի ունեցել իր և կնոջ միջև: Եվ մարդկանց ուշադրությունը իր ընկճվածությունից հեռացնելու նպատակով, թեև ոչ ոք նրան չէր նայում, նա բարձր ու խեղդվելու պես հազաց:

Ծերունին աստիճանին թեք ընկած ծխում էր, իսկ պառավը՝ շնչում երեկոյի գաղջ օդը:

Այդ օրը նրանք անցնող-դարձողներին բարևում էին, բարև առնում ընդգծված սիրալիրությամբ, ժպտում էին, փորձում կատակել: Կատակը ն ստացվում էր, ն չէր ստացվում: Մեկ էլ՝ փողոցում խաղացող երեխաների գնդակը կպավ նրանց պատուհանին, և քիչ մնաց ապակին կոտրվեր: Քլրիշ ժամանակ պառավը կճղճղար երեխաների վրա, իսկ այժմ ձայն-ծպտուն չհանեց, նույնիսկ ներողամտորեն ժպտաց: Իսկ երբ հարևանի հարսն ասաց, որ երեխան փորցավ ունի, պառավն անմիջապես ուզեց դադձ եփել, որի թուրմը փորձված դեղ է, դեռ երկրում դադձով բուժում էին շատ հիվանդություններ:

Հանկարծ պառավն սկսեց շփոթմունքով այս ու այն կողմ նայել, չէր կարողանում տեղում հանդարտ մնալ: Ջանալով հանգստություն պահպանել՝ նա ոտքի ելավ, ուղղեց մեջքը և կամացուկ մտավ տուն:

Քիչ հետո նա շեմքում երևաց կոփածո մատուցարանով, որի վրա կար երկու գավաթ սուրճ՝ իր և ծերունու համար: Ինչ էլ պատահի, ինքը պարտավոր է ամուսնուն սուրճ տալ, ինչ անենք, թե կռված են:

Նրանք սուրճ էին խմում, և ամեն ինչ այնպես էր, ինչպես անցած բոլոր երեկոներին, միայն, մարդկանց աչքին անտես, չէին խոսում իրար հետ:

Մուրթն ընկավ: Փողոցում ձայները մարեցին:

Պառավը սուրճի դատարկ գավաթները դրեց մատուցարանի վրա, վերցրեց իր բարձը և ներս գնաց:

Շուտով ծերունին էլ վեր կացավ: Հուզմունքն էր պատճառը, թե՛ ճակատագրի խաղ էր, դուռը ծածկելով, նա մոռացավ փականը դնել: Նա անցավ հյուրասենյակի միջով, մի խեթ հայացք նետելով այն պատին, որտեղ պառավն ուզում էր երզնկան կախ տալ, և մտավ ննջարան:

Մինչև ծերունին կհանվեր, պառավը ներքնակին փռեց սպիտակ, մաքուր, արդուկած սավան, փոխեց նաև բարձերեսներն ու վերմակասավանը:

Նրանք պառկում էին մի մեծ ու լայն մահճակալի վրա, որ շինված էր փայտից, ուներ բարձր, նախշազարդ գլխամաս և շատ հին էր:

Ծերունին նստեց մահճակալի եզրին, սկզբում մեջքը պառկեցրեց, հետո դանդաղ վեր քաշեց ոտքերը: Բավականին երկար ժամանակ նրա հայացքը սևեռված էր հանդիպակաց պատին՝ կարծես երզնկան արդեն այնտեղ էր: Հետո շրջվեց դեպի կողքի պատը:

Պառավը ոանգրեց լույսը և, հանվելով, լուռ ու կամացուկ մեկնվեց անուսնու մոտ:

Լուսամուտի տակ պահված ճռիկի ձայնը նրանց աչքերին շուտով բերեց քաղցր քուն:

Կեսգիշեր էր արդեն:

Հանկարծ ծերունին անհանգստացավ՝ շուռումուռ էր գալիս, քնի մեջ անկապ խոսքեր ասում: Նա բացեց կոպերը և ուզում էր կնոջն արթնացնել: Պառավն զգաց, որ մեկը մշտում է իր կողը, և վախեցավ, որովհետև այնքան մուլթ էր:

— Երզնկայի գժի անունը գլխիցս ելել է, — ասաց ծերունին խռպոտ ու ողբերգական ձայնով:

— Նրա անունը ենոք էր, ապրում էր Սրբուն բաղնիքի ետևը, նա ուրախ գիժ էր, — կիսարթուն ասաց պառավը, — գետնին ձեռնափայտով շրջան էր գծում, սա աշխարհն է, և քահ-քահ ծիծաղում վրան:

— Արի հաշտվենք, Աշխեն: Ես չեի ուզում քեզ վիրավորել...

— Ես արդեն հաշտվել եմ:

— Իրավ:

— Երզնկայի համար, Փավստոս, նա ամեն զոհողության արժանի է:

Պառավն անմիջապես քնեց: Իսկ ծերունին դեռ երկար ժամանակ արթուն էր: Հետո զգաց, որ քունը իրեն դարձյալ ամնում է իր գիրկը:

Լույսը բացվեց:

Փողոցում շոգն ու աղմուկը շատացան:


Հարևանի հարսը, երեխան գրկին, բարձրացավ քարե

աստիճաններով, որտեղ անցած երեկո ծերունին ու պառավն էին նստած, և դուռը ծեծեց: (Նա պառավից դաղձ էր խնդրելու): Պատասխան չստանալով, նա կամաց հրեց դուռը և մտավ ներս: Միջանցքում մարդ չկար: Նաև հյուրասենյակում: Հարսը նեղ, երկար միջանցքով գնաց բակ: Ծերունին ու պառավն այնտեղ էլ չէին: Վերադառնալով հյուրասենյակ, նա ձայն տվեց նրանց, բայց ոչ մի արձագանք չեղավ: Նա շվարած նայեց այս ու այն կողմ, ապա մոտեցավ ննջարանի դռանը, որը կիսաբաց էր: Տեսնելով ծերունուն ու պառավին անկողնում, հարսը լուռ ծիծաղեց: Նա անձայն մոտեցավ ու կանգնեց նրանց գլխավերևը:

Նրանք պառկել էին մեջքի վրա՝ ոտքերը երկարած, ձեռքերը խաղաղորեն հանգչում էին կրծքների, իսկ գլուխները հակվել էին իրար: Նրանց դեմքին լուսավոր ժպիտ կար, կարծես հեռուներում ինչ-որ բան էին տեսնում, որը նրանց հոգին լցնում էր երջանիկ սարսուռներով:

Հանկարծ հարսը նկատեց, որ նրանց դեմքին ոչ թե կենդանի ժպիտ է, այլ դիմակ, որ ժպտում է սառն ու մահաշունչ:

Նա նայեց ավելի ուշադիր և, մանկանն ամուր սեղմելով կրծքին, ամբողջ ձայնով աղեկտուր ճչաց:



## ՊԱՏՄՈՒԹՅԱՆ ԴԱՍԸ

Երբ ծերունի Փըրափիյոնը զգաց, որ իրեն քիչ ժամանակ է մնացել ապրելու այս աշխարհում, անհանգիստ շարժվեց իր բազկաթոռին, ակնախորշերում ջրակալած աչքերը միջանցքով գնացին դուրս բակը, որտեղ դեղձենին էր ծաղկում, և գոռաց թռնուհուն.

— Փըրափ...

Փըրափիյոնը հիվանդ չէր, ոչ մի տեղը չէր ցավում նույնիսկ, միայն ինչ-որ ծանր բան նրան տարեցտարի, օրեցօր դանդաղ քաշում էր դեպի հողը, և նա մեկ մահճակալին, մեկ էլ իր պես հնադարյան բազկաթոռին կառչած էր

արդեն ապրում: Նա գիտեր, որ միայն հիվանդները չէ, որ մեռնում են, այլև ամեն մարդ ու կենդանի, որ մի օր, հեռու-հեռավոր մի ժամանակ աշխարհ է եկել, բոլորը մեռնում են, դառնում ջուր, ծաղիկ, հող, և Փրբափիյօնը թեև խռով, բայց ներսում խաղաղ ու հաշտ էր մահվան հետ:

Փրբափը, որն իր անվան կրճատ հորջորջումն էր, ծերունու վերջին ձեռքբերումն էր իր մոտիկներից: Երբ նա ծնվեց, որդին, երևի ձևի համար կամ էլ քաղաքավարությունից դրդված, հարցրեց հորը՝ անունը ինչ դնենք: Փրբափիյօն, — ասաց նա, — անունը դրեք Փրբափիյօն: Որդին և հարսը կարծեցին կատակ է, հետո անհանգստացան. Փրբափիյօնս ի՞նչ է, աղջիկ երեխա է, մեղք չի, ի՞նչ դարում ենք ապրում, գոնե դնենք քո կնոջ, մեր մայրիկի անունը՝ Ասպրամ: Բայց ծերունին չզիջեց. կամ Փրբափիյօն, կամ ոչինչ, թե չէ ինքը նրանց հետ էլ գործ չունի, թող իրենց համար ապրեն: Ախր, ինչ է Փրբափիյօնը, ծաղիկ է, ինչ է, — նրանց միացավ ծերունու կինը: Որ չգիտեք, ի՞նչ է մեղավոր. Փրբափիյօնը ծաղիկ է, հրաշք մի ծաղիկ, Երզնկայի դաշտում է ապրում Փրբափիյօնը, Եփրատի հովիտներում, Տավրոսի լանջերին, կապույտ-կապույտ երկնքի տակ, Փրբափիյօն կնշանակի սրտի փափագ, սիրահարություն:

Նրանց չհաջողվեց ծերունուն ետ պահել իր մտքից: Երեխային տվին Փրբափիյօն անունը: Փրբափ-Մըրափ, — մեծ ու փոքրեր փողոցում ծաղրում էին նրան: Քո արածն է, — ծերունուն կշտամբում էին տնեցիները, — Փրբափ-Մըրափ, դու ես մեղավոր: Մըրափն էլ անուն է, — քիչ խեղճացած, արդարանում էր ծերունին, — Երզնկայում մի Մըրափ կար,



պատվական մարդ, բեհեզագործ էր, բեհեզ, մենք ասում ենք՝ մանուսա, գաղթի ճանապարհներին խելագարվեց, էլ չեմ տեսել:

— Դուրսը հվ կա, — երբ թոռնուհին ներս մտավ, հարցրեց ծերունին:

— Արևը, — ասաց փոքր Փըրափիյօնը:

— Է՛լ:

— Մեղուները: Դեղձի ծաղիկները: Մրջյունները:

— Էլ մարդ-մարդասանք չկա՛:

— Շատ երեխաներ... Գիտե՛ս, նրանք սպիտակ պոչով մի իսկական շուն են բռնել և չարչարում են: Գնամ այդ փոքրիկ շանը ազատեմ:

— Մենակ չես կարող:

— Ասարամը թող օգնի:

— Այդպես մի խոսիր, նա քո մեծ մայրիկն է:

— Նա ժպտում է, երբ ես նրան Ասարամ եմ ասում:

— Փըրափ, նա այդպես ժպտում է, որովհետև հիշում է իր մանկությունը, երբ քո տարիքին էր:

— Ասարամը քո հնչն է, պապիկ:

— Այդպես մի ասա:

— Իմ Ասարամ տատիկը քո հնչն է:

— Իմ սիրտը, — ասաց մեծ Փըրափիյօնը:

— Քո սիրտը քո մեջ չի՛:

— Իմ սիրտը իմ մեջ է, իսկ քո Ասարամ տատը՝ իմ սրտի մեջ:

— Իսկ ես քո սրտի մեջ չեմ, որտե՛ղ եմ ես, — հարցրեց փոքր Փըրափիյօնը:

— Այդպիսի բաներ մի ասա, թե չէ երջանկությունից կխենթանամ:

— Կգժվես:

— Կգժվեմ, կխենթանամ:

— Ես էլ եմ քո սրտում, — ասաց փոքր Փըրափիյօնը, — դու էլ ես իմ սրտում:

— Փըրափ, այդպես մի խոսիր, եթե ուզում ես օր առաջ երջանկությունից չմեռնեմ:

— Մեր ուսուցիչն ասում է՝ մեռնելը շատ դժվար է, ոտքերը, աչքերն ու ձեռքերը սկսում են ցավից գոռալ...

— Նա ճիշտ է ասում: Բայց եթե դու իմ սրտում ես, Փըրափ, եթե դու իմ սրտում ես, մեռնելը բախտավորություն է, մեծ ու պատվական գործ:

— Ես քո սրտում եմ, դու կարող ես հանգիստ մեռնել, — ասաց փոքր Փըրափիյօնը:

— Դու իմ սրտում ես, և քո Ասարամ տատն է իմ սրտում:

— Ասարամ տատիկը ինչ է անում քո սրտում:

— Իսկ դու, Փըրափ... դու ինչ ես անում իմ սրտում:

— Երգում եմ:

— Ապրես, Փըրափ, հազար տարի ապրես, և թող քո սրտում քո զավակները երգեն, նրանց սրտում էլ՝ իրենց զավակներն ու թոռները, որ ծնվելու են հազար տարի հետո...

— Գնամ շանը ազատեմ:

— Լսիր, Փըրափ, — ձայնը իջեցրեց ծերունին, — ես ուզում եմ այնպիսի մի բան ցույց տալ, որ քո օրում չես տեսել: Միայն ես, միայն քո պապ Փըրափիյօնը կարող է դա ցույց տալ, ուրիշ ոչ ոք: Դու շատ երջանիկ կլինես:

— Գնամ շանը ազատեմ ու վազելով գամ, — ասաց փոքր Փըրափիյօնը, — թե չէ նրանք կսպանեն նրան:

— Գնա, Փըրափ, գնա ազատիր այդ շանը, ասում ես փոքրիկ է:

— Այսքան:

— Գնա ազատիր այդ փոքրիկ շանը, դու կարող ես, մենակ ազատիր, հույսդ ոչ ոքի վրա չդնես, տատիկիդ էլ ասա թող գա մոտս, ի՞նչ է անում այդ կողմերում:

Ծերունին բազկաթռռից կանգնելու շարժում արեց, բայց մարմնում արդեն ուժ չէր մնացել:

— Ի՞նչ ես անում այդ կողմերում, Ասպրամ:

— Ճաշ եմ եփում, — ասաց պառավը, — ի՞նչ կա, Փըրափիյօն:

— Նստիր մոտս, մինչև Փըրափը վերադառնա, նստիր, մի խոսք խոսիր, որ մեռնելս չզգամ:

— Ի՞նչ խոսեմ, Փըրափիյօն:

— Պատմիր երգնկայի Փամբուխ մայրիկի պատմությունը:

— Հազար անգամ պատմել եմ:

— Հազարմեկերորդ անգամ կուզեմ լսել:

Բակում տղա և աղջիկ երեխաները գոռում էին. Փըրափ-Մըրափ, Փըրափ-Մըրափ, Փըրափ-Մըրափ, Փըրափ, Փըրափ, Մըրափ...

— Կլսե՛ս դրսի ձայները, — հուզվեց պառավ Ասպրամը:

— Է... կլսեմ, տակավին լսողությունս տեղն է, — անվրդով ասաց ծերունին:

— Ինչո՞ւ թռռնուհու անունը մկրտեցինք Փըրափիյօն:

— Դարձյալ հին երգ կերգեք, — բարկացավ ծերունին, — Փըրափիյօնը վատ անուն է: Մի զինագործ կար Ճատրակ գյուղում, նրա անունն էլ էր Փըրափիյօն: Ի՛նչ քաջ ու բարի մարդ էր զինագործ Փըրափիյօնը: Հապա երգնկայի բանաստեղծ Փրափիյօնին հիշիր... մազը երկար, աչք-ունքը տխուր և իմաստուն, Քրիստոսի նման իմաստուն ու գեղեցիկ:

— Փըրափիյօնը հին, փոշոտ անուն է, — ընդդիմացավ պառավը, — հիմա երեխաներին կկնքեն նոր անուններով՝ Արթուր, Նելլի, Ռիտա... Մեր հարևանի հարսը չորս օր առաջ զույգ երեխա ծնեց, մեկի անունը Արթուր, մյուսինը՝ Ռիտա: Ռիտան նոր է: Հիմա բոլոր աղջիկները Ռիտա են:

— Հին ու նոր անուն չկա, — ասաց ծերունին ընկրճված, — անունը մարդը կնորացնե:

— Մեր Փըրափիյօնին երեխաները կծաղրեն, կլսեն, Փըրափ-Մըրափ, մեղք չէ մեր թռռնուհին:

— Նրանք մի փոքրիկ շուն են բռնել և կտանջեն անխիղճ կերպով: Փըրափը կջանա ազատել այդ բարի շունը: Նրանք Փըրափին կծաղրեն, որովհետև իրենք չար են: Փըրափը գեղեցիկ գործի է, մարդոց ձեռքեն շուն ազատելը գեղեցիկ և ազնիվ գործ է, կհասկնան:

— Ես այն կհասկնամ, որ Փըրափիյօնը տղամարդու անուն է, իսկ մեր երեխան աղջիկ է, ութ տարեկան, մի օր էլ կդառնա քսան տարեկան: Ես քսան էի, երբ քեզ հետ ամուսնացա: Ո՞ր տղամարդը Փըրափիյօն անունով աղջիկ կուզի, ի՞նչ մի սկեսուրը, որ կեսրայրը, կմտածեն...

— Ամեն մարդ էլ կսիրե մեր Փըրափիյօնին, եթե գլուխն ու սիրտը տեղն են, — ասաց ծերունին:

— Հիմա գլուխ ու սիրտ ունեցող մարդ կ'ա... բոլորը փողի ու անունի ետևից կվազեն:

— Է, կնիկ, ինչ կառաջարկես...

— Անունը փոխենք, քանի դեռ շատ ուշ է, — ասաց պառավը:

— Անկարելի է:

Պառավը զգուշորեն, անվստահ շնջաց.

— Անունը դնենք Ռիտա:

Մեծ Փրրափիյոնը ծիծաղեց, հազ ու ծիծաղից այնպես էր խեղդվում, որ պառավը վախեցավ, թե կմեռնի:

— Գնա ճաշիդ, — ասաց ծերունին շունչը ետ բերելով, —

Փրրափն էլ եկավ:

— Շանը ազատեցի, — ուրախ-ուրախ ասաց փոքր Փրրափիյոնը: — Նա իմ ընկերն է:

— Այդպես էլ գիտեի, — աշխուժացավ ծերունին: — Լավ շունը լավ մարդու նման է: Մի լավ անուն տուր նրան, Փրրափ, մի այնպիսի անուն, որ աշխարհը զարմանա:

— Անունը դնենք Փրրափ:

— Աֆերիմ, — բացականչեց ծերունին: — Հիմա ես քեզ ցույց կտամ սնդուկը... Իմ մահճակալի տակն է, քաշիր բեր մոտս... Աֆերիմ, Փրրափ...

— Ծերուկը որ մեռնի, սնդուկը կմնա ձեզ, — ասում էին հարևանները: Փրրափի հայրը բարկանում էր. ինչի՞ մեռնի, է, ինձ խլամով լցված սնդուկ հազար տարի պե՞տք է: Մեջը ոսկի կա, ոսկիները կմնան ձեզ, նոր, երկհարկանի տուն կշինեք, ավտո կառնեք: Մայրը հավատում ու չէր հավատում հարևանների խոսքին, ծերունուն վերաբերում էր

համբերությամբ և զուսպ հարգանքով, լվանում, կերակրում էր նրան, հանկարծ նա սնդուկն ուրիշին, օրինակ՝ գյուղի աղջկան, որին աշխարհի չափ սիրում է, ժառանգություն չթողնի:

Դա հին, բայց ամուր, նախշազարդ պղնձով գոտևորված սնդուկ էր, գոգավոր կափարիչով, որի վրա բռնակ կար:

Ծերունի Փըրափիյօնը գրպանից հանեց սնդուկի մեծ, ծանր բանալին և մեկնեց թոռանը.

— Անցքի լեզվակը թեքիր, բանալին երկու լրիվ շրջան դարձրու աջ կողմ և սեղմիր առաջ: Կափարիչի բռնակը կքաշես վեր, հասկցճար:

Փոքր Փըրափիյօնը ամեն ինչ շատ լավ հասկացավ, միայն բանալին անցքում դժվար պտտվեց: Իսկ երբ ձեռքի բոլոր ուժով բարձրացնում էր սնդուկի կափարիչը, սիրտն այնպես թրթռաց, կարծես ուզում էր փախչել իրենից:

Հուզմունքը խեղդեց փոքր Փըրափիյօնի ուրախության ճիչը, երբ կափարիչը ետ գնաց, և այդքան տարի փակ սնդուկը միանգամից բացվեց նրա աչքերի առջև:

— Հը... ի՞նչ կասես, — ծերունին էլ էր հուզված:

Թոռնուհին պապանձվել էր:

— Մեկիկ-մեկիկ հանիր, զգույշ դիր գետնին, ինչ քեզ ցույց եմ տալու՝ ամենատակն է:

— Սա ի՞նչ է, ոսկի...

— Կավաման է, ոսկին ինչ է, հարըս դրանով թանապուր էր ուտում:

— Բա ոսկին ո՞ւր է:

— Ինչ տեսնում ես, ոսկուց թանկ է, սա պատմությունն է,

սիրելի, հարազատ մարդիկ, ոսկին ինչ է որ, պաղ, անսիրտ մետաղ, լավ գիտցիր, Փըրափ:

— Լամպ է, չէ:

— Քարյուղի ճրագ: Երբ ես քո տարիքին էի, այդ լամբարն էր լույս տալիս մեզ... Իսկ հիմա նայիր ինչ հզոր լույսեր կան, մեր տան լույսը, փողոցի լույսերը գիշեր ժամանակ, փողոցի լույսերը վառվում են, որ մարդիկ չմոլորվեն, հեշտ գտնեն իրենց տունը, իրենց հարազատներին: Բայց այդ լամբարը ինձ համար ամենաթանկն է:

— Գո-տի:

— Արծաթ գոտի, իմ մեծ քույր Մարիամն էր կապում եկեղեցի գնալիս:

— Ո՛ր է քո մեծ քույր Մարիամը:

— Ասկյարից փախավ, իրեն տվեց Եփրատի ալիքներին, գարուն էր, Եփրատը փրփրած, աչքովս տեսա:

— Հիմա ո՛ր է քո մեծ քույր Մարիամը:

— Եփրատին հարցրու:

— Իսկ սա թանաքաման է: Դու դպրոց գնացել ես, պապ: Ծերունի Փըրափիյոնի հիշողության մեջ արթնացավ հեռավոր այն օրը, երբ նա, մոր ձեռքը բռնած, առաջին անգամ դպրոց էր գնում, և ճանապարհին, որն անցնում էր շուկայի մոտով, իրենք երես երեսի եկան քավոր Պետրոսին: Քավոր Պետրոսը, այսօրվա պես հիշում է, իրեն մի կարմիր խնձոր տվեց և ասաց. ճամփադ երկար ըլլա, մանչս:

— Ձախ անկյունում, ահա այդտեղ, քավոր Պետրոսի ծխամորձն է, տուր տեսնեմ, — ասաց ծերունին, — տուր հոտ առնեմ քավոր Պետրոսի ծխամորձից: Այս ծխամորձը նա



12. Կապույտ երգչկա



ծխում էր միայն մեր տանք: Գալիս էր և ասում. ծխամորձս տվեք, կարողցեր եմ: Ամեն տանը մի ծխամորձ էր պահում: Երբ մեր տունը գաղթում էր, արդեն դռանը կողպեք դրել, փողոց էինք ելել, որը էշով, որը եզներով, որը ձիով, ով ինչ ուներ, մեկ էլ նա հեռվից տեսավ մեզ ու գոռաց. ծխամորձս լավ պահեք, հա՛, Երևանում ծխելու եմ, ինչպես միշտ թուրքունը իզմե: Նա ծխում էր Թրաբըզոնի թուրքուն, որ միշտ հետն էր, քեսեի մեջ:

— Բա ինչի՞ հիմա չի ծխում, ես քավոր Պենրոսին չեմ տեսել, ինչի մեր տուն չի գալիս, — ասաց փոքր Փըրափիյունը:

— Գաղթի ճանապարհին նրան էլ սպանեցին շատերի նման:

Փոքր Փըրափիյունը սնդուկից հանում էր իրերը և զգուշորեն դնում գետնին. փայտե շերեփ, պատի ժամացույցի կմախք՝ իր հին գեղեցկությունը դեռևս պահպանող թվատախտակով, սադափե մի զարդատուփ՝ գույնզգույն կոճակներով և ուլունքներով լցված, կարպետի մեջ փաթաթված կուժ՝ կոտրված ունկով, իսկ ներսը՝ դանակ-պատառաքաղներ ու աղաման:

— Վայ-վա՛խ, — տեսնելով կուժը, մղկտաց ծերունին, — հով է կոտրել քեզ... քանի անգամ ենք քեզ հետ միասին սառը ջուր բերել հայրիկիս համար:

— Մի լացիր, պապիկ...

— Ես լաց չեմ լինում, Փըրափ, բայց աշխարհում կան բաներ, որոնք չպիտի մեռնեն, չպիտի կոտրվեն երբեք, նրանք ապրելու են հավերժորեն, ինչպես արևն է ապրում: Ահա այս կուժը... Արժանի է, որ ապրի հազար և հազար տարիներ,

որովհետև իր կյանքը ազնիվ գործի է նվիրել... Կցավեմ, Փրբափ, իր վերքի համար, շատ կցավեմ, շատ կափսոսամ...

Փոքր Փրբափիյօնը գետնին դրեց ուրիշ իրեր, որոնց մեջ կար և մի կաշեկազմ գիրք:

— Մաթեոսի ավետարանն է, — ասաց մեծ Փրբափիյօնը, ձեռքը երկարելով դեպի գիրքը: — Տուր, տուր... — դողդողալով բացեց մի էջ և կարդաց: — Եվ մի վախենաք նրանցից, որ մարմինն են սպանում, բայց հոգին սպանել չեն կարող... Լսեցի՞ր, լսեցի՞ր ինչ ասաց Հիսուսը... հոգին սպանել չեն կարող:

— Հոգին ի՞նչ է:

Իր երկար կյանքում ծերիւնին դեռ չէր կանգնել այդքան դժվար մի հարցի առջև:

— Հոգին ես եմ, դու ես... մեր Հայկ Նահապետն է... Մեր Եփրատ գետն է, դու չգիտես, Փրբափ, դու դեռ փոքր ես, հոգին մեր Եփրատ գետն է, մեծ գետ է Եփրատը, մի անգամ որ տեսնես, հոգիդ կուժեղանա, հավերժական սերը կարթնանա հոգուդ մեջ:

Փոքր Փրբափիյօնը լսեց, բայց շատ բան չհասկացավ: Նրա խոշոր, սև աչքերը նայում էին ձեռքի բզկտված շալին:

— Մայրիկիս շալն ես, — շշնջաց ծերիւնին, — հիշո՞ւմ ես, մայրս քեզնով ծածկում էր ուսերը: Աշխարհում ամենաթանկ բանը այդ շալն է, Փրբափ, — ասաց նա բարձրաձայն, — մոր շալը չի մեռնում, սրտում է ապրում նա, ամենաապահով տեղը:

— Առ... — շալը մեկնեց ծերունուն:

— Ծալիր, զգուշորեն դիր սնդուկը:

Քիչ հետո, փոքր Փըրափիյօնը սնդուկից հանեց բավականին մեծ մի լուսանկար՝ ձվաձև շրջանակի մեջ, որ փորագրազարդ պղնձից էր:

— Ահա այդ էի ուզում քեզ ցույց տալ, — աշխուժացավ ծերունին: — Հիմա բոլորը նորից դիր տեղը, սնդուկը փակիր, բանալին տուր ինձ:

Աղջիկը ափսոսանքով փակեց սնդուկը. այնտեղ մի քանի իրեր կային, որոնց նրա ձեռքը դեռ չէր կապել: Ծերունին նկատեց նրա տրամադրությունը և ասաց.

— Փըրափ աղջիկ, այդ ամբողջ հարստությունը քոնն է, երբ ես չեմ լինի, բանալին գրպանիցս կհանես, տես, այստեղ է, բանալին էլ է քոնը:

Լուսանկարում տղամարդիկ, երեխաներ ու կանայք էին երեսունվեց հոգի, շարք-շարք նստել, երեխաները՝ գետնին, նրանց ոտքերի մոտ, և ակնապիշ նայում էին քեզ: Վերևում գրված էր. «Էրզընգա, 1912 թ.»:

Ծերունի Փըրափիյօնը հիշեց հեռավոր այն օրը, երբ Երզնկայի միակ հայ լուսանկարիչ Ափրահամ Սեփապոսյանը, քավոր Պետրոսի ընդարձակ բակում, նկարեց իրենց: Սուրբ Աստվածածնի տոնն էր: Երջանիկ օր էր այդ օրը, աստված էլ էր իրենց հետ, արևն էլ: Նկարվելուց հետո քավոր Պետրոսը առատ հյուրասիրություն արեց հավաքվածներին: Նրանցից շատերը 1916-ի օգոստոսին արդեն մեռած էին:

Փոքր Փըրափիյօնը տեսավ, թե ինչպես պապի աչքից արցունքը բաժանվեց, դանդաղ գլորվեց մազմզոտ այտով և լուռ ընկավ լուսանկարի վրա:

— Փըրափ, աթոռը բեր, նստիր մոտս, — ասաց ծերու-

նին: — Դու պիտի կարդաս այս լուսանկարը, ես քեզ կսովորեցնեմ: Դու հիշելու ես բոլոր դեմքերն ու անունները, նրանք քո արյունն են, լավ հիշիր, մինչև երկար կյանքիդ վերջը նրանց պահիր սրտիդ մեջ: Մինչև արևը անցնի, ես քեզ բոլորի հետ կծանոթացնեմ: Կկարծես դժվար է... բնավ... եթե ամբողջ սրտով նվիրվելու լինես այս գործին:

— Պապիկ, հանկարծ չմեռնես:

Մեծ Փըրափիյոնի հոգին երջանկացավ: Նա մտածեց, ո՞րինքը, համենայն դեպս, աշխարհից պիտի գոհ լինի, չնայած ինչքան ավեր, սուգ ու չարություն է տեսել կյանքում, էլ տեղ ու հաշիվ չկա:

— Այս մարդիկ, որոնց տեսնում ես այստեղ, Արմենակյան տոհմի ճյուղերն են, նրանց բարեկամները, ահավասիկ, մեծ Արմենակյանը, կենտրոնում, հորս մորական պապը, տես ինչ բեղ, աչք-ունք ունի, ինչ պարթևալանջ է, — լուսանկարը թռնուհու առջև պահելով, ասաց ծերունին: — Այդ ժամանակ նա կլիներ հարյուր քսան տարեկան, միտքը դեռ պայծառ, մինչև հիմա էլ ծիծաղը ականջիս մեջ է: Նա չուզեց թողնել իր երկիրը, մնաց տանը, հետո իմացանք՝ սպանել են՝ անպատմելի տանջանքներ պատճառելով: Փըրափ, դու սկսվում ես մեծ Արմենակյանից:

— Նա իմ պապն է:

— Քո պապը ես եմ, նա քո արմատի արմատն է:

— Իսկ սա ո՞վ է:

— Մն... Փըրափ, սա իմ քույրիկն է, հորեղբայր Քափրելի, ահա Քափրելը, Արուսյակ աղջիկը: Քափրելը չորս զավակ ուներ՝ Իսկուհի, Կալուստ, Եզեզել, Արուսյակ: Այն օրը, քավոր

Պետրոսի բակում, միայն Արուսյակն էր հոր հետ, վարդի պես աղջիկ էր Արուսյակը, մազերը՝ երկար, խնդումներես, հապա ինչպես էր երգում... Ասկյարները շատ կնամարդոց, աղջիկների հետ նրան էլ քաշեցին տարան, ինչ եղավ Արուսյակը, թրքացրին, անպատվեցին մարմինը, սրի բերանն ընկավ... Չգիտեմ, Փըրափ... Նրան շատ-շատ եմ տեսել երազիս մեջ, տեսել եմ Պարթուղին, Սեթրակ աղային, Էխսափեթին, Մամփրեին, հացթուխ Աքրիբազին:

— Ո՞րն է Աքրիբազը:

— Ահավասիկ:

— Ինչ լավ Աքրիբազ է:

— Նրա հացի անուշահոտությունը տարածվում էր երզնկայի վրա, մտնում տուն ու պարտեզ: Մի օր էլ, լավ միտքդ պահիր, Փըրափ, մի օր էլ օդի մեջ զգացինք Աքրիբազի հոտը... Նրան ողջ-ողջ խորովել էին փռում: Իսկ սա խենթ ենոքն է: Նա բարի ու զվարթ մարդ էր: Հիշում եմ, գալիս էր քարավանի ետևից: Հետո գնաց-գնաց դեպի Եփրատը... Եվ ես նրան այլևս չտեսա:

Ծերունի Փըրափիյօնը լուսանկարի մարդկանց մեկ-մեկ ծանոթացնում էր թռռնուհուն, համառոտ տեղեկություններ տալիս նրանց կյանքից, նրա սիրտը զարմանալի նրբությամբ հիշում էր ամեն մանրամասնություն:

— Դու լաց ես լինում, Փըրափ, — հարցրեց նա:

— Չէ, ես ուզում եմ լաց լինել:

— Բո պես աղջիկը լաց չի լինելու: Դու պետք է հիշողությամբ ուժեղանաս: Ես այդ եմ պահանջում քեզնից, հիշողությունը թող ավելի ուժ տա քեզ այս կյանքում:

— Ես Արթուրից ուժեղ եմ:

— Դու Արթուրից ուժեղ ես, որովհետև նա թույլ է: Չխաբվես, Փըրափ: Դու պարտավոր ես լինել ուժեղից էլ ուժեղ:

Լուսանկարից նրանց էին նայում քեռակին Օսանը, Միրթադը՝ գլխին ծոպավոր ֆես, Լուսիկը, Իսկուհին, ուսուցիչ Ջաքար Արիստակեսյանը, գորգավաճառ Վրթանես աղան՝ իր Սերոբ և Նազելի զավակների հետ, Մարուքե քահանան և Սուրբ Սարգիս եկեղեցու սպասավոր Մարտիրոսը, որոնք Ամանորին տնօրհներք էին անում հայոց թաղերում:

— Մարտիրոսը ծխացնում էր բուրվառը, իսկ Տեր-Մարուքեն աղոթք էր ասում երգելով, ինչ լավ էր երգում և ինչ անուշ էր այրվող խնկի հոտը: Իսպ սա ես եմ:

Փոքր Փըրափիյունը ավելի ուշադիր նայեց և տեսավ իր նման մի երեխա՝ մեծ Արմենակյանի ոտքի մոտ, գետնին ծալապատիկ նստած:

— Դ՞նու ես:

— Ես եմ:

— Ինչքան ինձ նման ես:

— Տեսնում ես, գնդակ ունեմ:

— Ո՞ւմ հետ էիր խաղում:

— Ափելի, Վռամշապուհի, Պայծառի, ահա Պայծառը, Խնդոյի, Հափեթնակի, սա էլ Հափեթը... Բոլորն էլ Քեմախ-Բողազում սպանվեցին, և ես նրանց յոթանասուն տարի պահեցի մտքիս մեջ:

Ծերունի Փըրափիյունի հիշողության մեջ արթնացավ հեռու հեռավոր այն օրը, երբ Հափեթը, Կեդրոնական

վարժարանի բակում, իր ականջին մի բան շշնջաց... Իր սիրտը տակնուվրա եղավ. Հափեթը սիրում է Պայծառին, ինքն էլ է Պայծառին սիրում, բայց Հափեթին չխոստովանեց: Այժմ էլ սիրում եմ նրան, — ասաց ծերունին, բայց այնքան ցածր ու մեղմ, որ ոչ թռռնուհին, ոչ էլ որևէ մարդ աշխարհում չլսեց:

Ժամը չորսին մոտ, աղջիկն արդեն բոլորի հետ ծանոթացել էր: Նա տխուր էր և, միաժամանակ, երջանիկ, որ այդքան բարի ու հարազատ մարդիկ են շրջապատում իրեն: Նա շփոթված էր. աշխարհում ինչ-որ բան նրան վախ էր պատճառում:

Ծերունին ասաց.

— Հիմա կրկնիր, տեսնեմ ամեն ինչ լավ հիշո՞ւմ ես:

Փոքր Փըրափիյոնի աչքերն անցան լուսանկարի շարքերով.

— Սա մեծ Արմենակյանն է, ճիշտ է, սա հորեղբայր Գաբրիելն է, նրա աղջիկը...

— Ի՞նչ է անունը...

— Անոնը...

— Անունը...

— Արու:

— Արուսյակ: Հետո՞...

— Բարթոլդ, Սեդրակ աղա, Աբրիբազ:

— Ո՞վ է Աբրիբազի կողքինը, հը, Փըրափ, ո՞վ է կողքինը:

— Վրթանեսը...

— Փըրափ, լավ հիշիր, Աբրիբազի մոտ կանգնած է Մամփրեն, հիշիր, Մամփրեն խումբ հավաքեց, գնաց կռվելու թուրքի դեմ, և ես նրան այլևս չտեսա:

— Լավ, էլի, լաց լինեմ, — խնդրեց փոքր Փըրափիյօնը:

— Ոչ, — ասաց ծերունին իր տարիքին անսովոր խրոխտ ձայնով, — սեղմիր ատամներդ, բռունցք արա, որ լաց չլինես: Գտիր Մարուքե քահանային: Գտ՛ւր: Հիմա գտիր Ջաքար Արիստակեսյանին: Ո՛վ է Ջաքարը:

— Ուսուցիչ:

— Այո, թվաբանություն էր սովորեցնում և հայոց լեզու: Մեծ բանաստեղծ էր Ջաքար Արիստակեսը, աշխարհի ամենամեծ բանաստեղծը, Փըրափ, ամենամեծը.

Այբ, բեն, գիմ,  
եւ, Հովակիմ.

Լուսինկա, լուսինկա.  
Լուսնէն ինկայ,  
Ծովուն վրա կանթեղ մը կար,  
Առնիմ ըսի մեջը ինկայ:

Ջաքար Արիստակեսյանին, նրա կնոջը՝ Անթառամին, նրանց Մելքոն, Յուդափեր, Հմայակ, Պաղդասար զավակներին քշեցին անապատ, և տանջեցին, խողխողեցին նրանց, և ոչ ոք, ոչ ոք նրանց այլևս չտեսավ: Ջաքարի առջևը՝ գետնին, Ափելն է:

— Ափել, Պայծառ, Խնդո, իսկ սա դու ես, — թվարկեց աղջիկը և ուրախացավ, որ ամեն ինչ ճիշտ ստացվեց:

— Ես եմ, բայց այսուհետ դու ես, հիշիր, լավ հիշիր, Փըրափ, հանկարծ չմոռանաս, այսուհետ ենը դու ես, ես չկամ, դու ես մնում, դու ես ապրելու յոթանասուն ու հազար տարի:

— Գաբրիել, Արուսյակ, Ջաքար, Վրթանես, մեծ Արմենակյան, Մարտիրոս, Հաբեթ, Աբրիբազ, Մամբրե:



— Աֆերիմ, — հիացալ ծերունին:

Երբ աղջկա ծնողներն աշխատանքից տուն եկան, արևը գնացել էր մայրամուտ, և նրանք դասն արդեն ավարտել էին:

Փոքր Փըրափիյօնը մորն իսկույն հայտնեց օրվա գլխավոր իրադարձությունը: Մոր աչքերը, աղջիկը լավ տեսավ, քիչ էր մնում զարմանքից դուրս թռչեին:

— Մնդուկում ի՞նչ կար:

— Շատ հարստություն, ոսկուց էլ թանկ, բոլորը իմն է, բանալին էլ է իմը, պապը ասաց:

Մայրը փաթաթվեց աղջկան և համբուրում էր անվերջ: Աղջիկը չհասկացավ, ինչու է նա առանց պատճառի այդպես իրեն սիրում, հո չի գժվել:

Շուտով բոլորը նստեցին ճաշելու: Այդ օրը սեղանին շատ բան կար՝ ջրալի և տապակած, տաք ու սառը, ամեն ինչ համով-հոտով: Մայրը նույնիսկ մի շիշ գինի դրեց:

— Օհն՛, — բացականչեց մեծ Փըրափիյօնը:

— Խմենք-հարբենք, — ասաց հայրը:

— Խմենք Փըրափի կենացը, — ուրախ-զվարթ ասաց մայրը, — Փըրափս մեծանա, շատ մեծ մարդ դառնա, աշխարհի աչքն էլ հանի:

— Ինչի՞ հանի, է, — հարցրեց հայրը:

— Իսկ ինչի՞ չհանի, — հարցրեց մայրը:

— Զարմանալի խոսք կխոսեք, աշխարհը աչք ունի, որ մեր Փըրափն էլ հանի, — ասաց ծերունին, — թե ունենար, կտեսներ, որ ամենասիրուն քաղաքը Երզնկան է, ամենատխուր գետը՝ Եփրատը, ամենատխուր գետը ամբողջ երկրի վրա:

Ուշ երեկոյան մայրը դուլլով ջուր տաքացրեց, լվաց ծերունու ոտք ու ձեռքը և պառկեցրեց մաքուր անկողնու մեջ:

Շուտով բուրրը քնեցին:

Մութ ու խոր քուն էր, և ծերունի Փըրափիյօնը չիմացավ, թե ինչպես գիշերվա մի ժամի մահը գրկեց իրեն:

Ծերունու թաղումն աղմկոտ չեղավ: Գարնանային արևոտ օր էր: Ծառերին ճռվողում էին ճնճղուկները: Հողից խոնավութուն էր ելնում: Դագաղը հանեցին դուրս, լուռ պտտեցին տան առաջ և շարժվեցին հին թաղամասի նեղլիկ փողոցներով:

Փոքր Փըրափիյօնը թափորի առջևից տանում էր պապի սև ժապավենով շրջանակված, մեծադիր լուսանկարը: Սպիտակ պոչով շնիկը, որի անունը, պապից բացի, ոչ ոք չգիտեր, տխուր քամսվում էր նրա ոտքերին: Ետևում, շատ մոտիկ, դագաղի կափարիչն էր: Այնուհետև, վեց հոգի ուսերին դրած բերում էին պապին: Դագաղի ետևից շարժվում էր մի երկու տասնյակ պառավ կին ու տղամարդ:

Փոքր Փըրափիյօնը ծուռ և տխուր ժպտում էր և չէր նայում իր աջ ու ձախում քայլող, ծամածռություններ անող երեխաներին:

— Փըրափ-Մըրափ, ղմ ես տանում, ասա, ղմ ես տանում, էդ ղվ է, ասա, ղվ է...

Երբ նրանք զգվեցրին, աղջիկը կողքանց նայեց լուսանկարին և ասաց.

— Ես եմ:

## **ԲՈՎԱՆԴԱԿՈՒԹՅՈՒՆ**

Արտույտ .....	3
Երբ ես մեռնեմ, ուրիշները կգան իմ տեղը .....	51
Ճերմակ, սև անմեռուկի գարունը .....	68
Թխակարմիր ձին .....	80
Տունը և հողը .....	119
Հրաժեշտ երկրին .....	127
Կապույտ երզնկա .....	139
Պատմության դասը .....	164

ԳՄԴ 8427

Ա 190

**Ադալյան Ն. Մ.**

Ա 190 Կապույտ երգնկա: Պատմվածքներ. Դպր. միջին և բարձր տարիքի համար (Նկ. Ռ. Ադալյան.— եր.: Սովետ. գրող, 1985: — 188 էջ, 16 նկ.

Գրքում զետեղված պատմվածքներն ունեն սյուժետային մի ամբողջություն Դրանք նվիրված են հայրենի երկրի գեղեցկություններին ու ծննդավայրի կարոտին, և օժտված են ոչ միայն գեղարվեստական, այլև ճանաչողական կարևոր արժանիքներով.

Ա 4803010200 (112) 85 «Տ»  
705 (01) 85

ԳՄԴ 8427

ՆՈՐԱՅՐ ՄԱՐՏԻՐՈՍԻ ԱԴԱԼՅԱՆ  
Կապույտ երգնկա

Պատմվածքներ

Միջին և բարձր դպրոցական տարիքի համար

НОРАЙР МАРТИРОСОВИЧ АДАЛЯН  
Синяя Ерзнка

Рассказы

Для среднего и старшего школьного возраста

(На армянском языке)

Издательство «Советакан грох»

Ереван, 1985

Խմբագիր՝ Գ. Խ. Դեվրիկյան

Նկարիչ՝ Ռ. Մ. Աղալյան

Գեղ. խմբագիր՝ Ջ. Ե. Գասպարյան

Տեխ. խմբագիր՝ Ս. Մ. Սիմոնյան

Վերստուգող սրբագրիչ՝ Օ. Ղ. Թերզյան

ИБ №5372

Հանձնված է շարվածքի 22.11.84: Ստորագրված է տպագրության 15.04.85. ՎՋ 05649: Ֆորմատ՝ 70X108/32: Թուղթ՝ օֆսեթ. Տառատեսակ՝ «Արարատ»: Տպագրություն՝ օֆսեթ, 8,22 պայմ. տպ. մամ., 8,47 պայմ. ներկ. թերթ, 6,5 հրատ. մամ.: Տպաքանակ՝ 20 000: Պատվեր՝ 4681: Գինը՝ 45 կոպ.:

«Սովետական գրող» հրատարակչություն, Երևան — 9, Տերյան 91

Издательство «Советакан грох», Ереван — 9, ул. Терьяна, 91

Հայկական ՍՍՀ հրատարակչությունների, պոլիգրաֆիայի և գրքի առևտրի գործերի պետական կոմիտեի գունավոր տպագրության տպարան, Երևան — 82, Ադմիրալ Իսակովի պող 48:

Типография цветной печати Госкомитета Арм ССР по делам издательств, полиграфии и книжной торговли. Ереван — 82, пр. Адмирала Исакова, 48.

45 474.

